



Bodleian Libraries

UNIVERSITY OF OXFORD

This book is part of the collection held by the Bodleian Libraries and scanned by Google, Inc. for the Google Books Library Project.

For more information see:

<http://www.bodleian.ox.ac.uk/dbooks>



This work is licensed under a Creative Commons Attribution-NonCommercial-ShareAlike 2.0 UK: England & Wales (CC BY-NC-SA 2.0) licence.






4

Larry Allison Pottinger.

1862



EXCERPTA

E

CORPORE STATUTORUM

UNIVERSITATIS OXONIENSIS.

PARECBOLE

SIVE

EXCERPTA

E

CORPORE STATUTORUM UNIVERSITATIS OXONIENSIS.

ACCEDUNT


ARTICULI RELIGIONIS XXXIX

IN ECCLESIA ANGLICANA RECEPTI:

NEC NON

Juramenta Fidelitatis et Suprematus.

IN USUM JUVENTUTIS ACADEMICÆ.



OXONII,

E TYPOGRAPHEO ACADEMICO.

MDCCCXLI.

*Gough MSS. Oxon.
No. 323.*

ELENCHUS

TITULORUM ET SECTIONUM

QUI IN CORPORE STATUTORUM CONTINENTUR.

TITULUS I.

DE TERMINIS ET VACATIONIBUS.

- ect. 1. De Terminorum numero, initio, et fine. Pag. 1.
2. De Precibus Solennibus ac Concione initio
cujusque Termini habendis. 3

TITULUS II.

DE MATRICULA UNIVERSITATIS.

- Sect. 1. De Matricula Universitatis custodienda. 4
2. De Tempore et conditionibus Matricula-
tionis. ibid.
3. De officio Præfectorum circa Scholares Ma-
triculandos. 5
4. De Laicis ad Privilegia Universitatis ad-
mittendis. 6
5. De Officiis in Universitate et Civitate simul
non gerendis. ibid.
6. De Feudis Matriculandorum, et de eorum
distributione. 7

ELENCHUS

TITULUS III.

DE SCHOLARIBUS IN COLLEGIA ET AULAS COMPELLENDIS.

- Sect. 1. Ne quis Scholaris in domibus privatis vic-
tinet, aut hospitetur. 7
2. Quales Tutores Scholaribus præficiendi sunt. 9
3. De non migrando sine venia ab uno Col-
legio vel Aula ad aliud. 10

TITULUS VI.

DE TEMPORE AD GRADUS CAPESSENDOS REQUISITO, ET EXERCITIIS PRO FORMA PRÆSTANDIS.

SECTIO I.

De Tempore et Exercitiis requisitis ad Gradum Bac- calaurei in Artibus.

- §. 1. Quot anni, in audiendis publicis Lectoribus
ponendi, requirantur ad Gradum Baccalaurei
in Artibus. 11
2. De Exercitiis præstandis pro Gradu Baccalaurei
in Artibus. 12
3. De Forma et Modo RESPONSIONUM. 14
4. De Officio ac Cura Vice-Cancellarii et Procu-
ratorum circa RESPONSIONES in Parviso. 17
5. De tempore intra quod habendi sunt Sophistæ
Generales. 18

SECTIO II.

De Tempore et Exercitiis requisitis ad Gradum Magistri in Artibus.

- §. 1. Quot anni, in audiendis publicis Lectoribus
ponendi, requirantur ad Gradum Magistri in
Artibus. 18

TITULORUM, &c.

- *2. De Determinatione Quadragesimali.
- *3. De Collectoribus Quadragesimalibus designandis.
- *4. De Officio Collectorum.
- *5. De Precibus et Concione Latina in die Cinerum, sive Carnis-privii, habendis. Et de Precibus habendis unoquoque die Saturni, durantibus **LECTIONIBUS** Quadragesimalibus, in Choro Templi B. Mariæ. Et de Junioris Procuratoris Oratione ad Determinatores habenda.
- *6. De Classibus Determinantium ordinandis: et de tempore **LECTIONIBUS** Quadragesimalibus præstituto.
- *7. De Forma Determinationis Quadragesimalis.

SECTIO III.

De Tempore et Exercitiis requisitis ad Gradus in Musica capessendos.

- §. 1. Quot anni ponendi sint in studio vel praxi Musices, pro Gradu Baccalaureatus in Musica. 19
- 2. De Exercitiis pro Gradu Baccalaurei in Musica præstandis. ibid.
- 3. Quot anni ponendi sint in studio vel praxi Musicæ, pro Gradu Doctoris in Musica. ibid.
- 4. De Exercitiis per Inceptorem in Musica præstandis. 20

SECTIO IV.

De Tempore et Exercitiis requisitis ad Gradus in Jure Civili capessendos.

- §. 1. Quot anni, in audiendo Professore publico Juris Civilis ponendi, requirantur ad Gradum Baccalaurei in Jure Civili. 20
- 2. Exercitia pro Gradu Baccalaureatus in Jure Civili præstanda. 21

ELENCHUS

3. Quot anni, in audiendo publico Professore Juris Civilis ponendi, requirantur ad Gradum Doctoris in Jure Civili. 22
4. Exercitia pro Gradu Doctoris in Jure Civili præstanda. 23

SECTIO V.

De Tempore et Exercitiis requisitis ad Gradus in Medicina capessendos.

- §. 1. Quot anni, in studio Medicinæ ponendi, requirantur ad Gradum Baccalaurei in Medicina. 23
2. De Examinatione pro Gradu Baccalaurei in Medicina, et de Examinatoribus designandis, et juramento onerandis. 24
3. De tempore, loco, et modo Examinationis. 25
4. De Examinatoribus remunerandis. 27
5. Quot anni, in studio Medicinæ ponendi, ad incipiendum in Medicina requirantur. ibid.
6. Exercitium pro Gradu Doctoris in Medicina præstandum. 28
7. De incorporandis sive Medicinæ studiosis, sive Graduatis. ibid.

SECTIO VI.

De Tempore et Exercitiis requisitis ad Gradus in Theologia capessendos.

- §. 1. Quot anni, in audiendo publico Theologiæ Professore ponendi, requirantur ad Gradum Baccalaurei in S. Theologia. 29
2. Exercitia pro Gradu Baccalaurei in S. Theologia præstanda. ibid.
3. Quot anni, in audiendo publico Theologiæ Professore ponendi, requirantur ad incipiendum in S. Theologia. 30

TITULORUM, &c.

4. Exercitia pro Gradu Doctoris in S. Theologia
præstanda. 30

SECTIO VII.

- Quomodo et unde computandum sit Tempus singulis
Gradibus capessendis præstitutum.* 31

TITULUS VII.

DE GENERALI INCEPTIONE IN SINGULIS FACULTATIBUS,
SIVE DE VESPERIIS ET COMITIIS.

SECTIO I.

Statuta specialia, ad Vesperias et Comitiam pertinentia.

- *§. 1. De Tempore Comitiorum.
- *2. De Prælectionibus in Vesperis ; et quod inceptores circumeant singulas Scholas.
- *3. De Disputationibus Vespertialibus.
- *4. De Disputationibus Vespertialibus in Philosophia.
- *5. De Conclusionibus Vespertiarum Philosophicarum : et de juramento inceptorum.
- *6. De Disputationibus Vespertialibus Juristarum.
- *7. De Disputationibus Vespertialibus Medicorum.
- *8. De Disputationibus Vespertialibus Theologorum.
- *9. De cœna Vespertiali.
De ulteriori explicatione Statuti de cœna Vespertiali.
- *10. De concionibus in die Dominico inter Vesperias et Comitiam habendis.
- *11. De precibus solennibus, et oblationibus, in die Comitiorum.
- *12. Quem locum in Comitiiis singulæ Facultates sortiantur.

ELENCHUS

- *13. De Disputationibus Philosophicis in Comitiiis.
- *14. De Actu Musico.
- *15. De Disputationibus Comitialibus in Medicina.
- *16. De Disputationibus Comitialibus in Jurisprudentia.
- *17. De Disputationibus Comitialibus in Theologia.
- *18. De Conclusionem Comitiorum.
- *19. De Congregatione, finitum Comitiiis, habenda.
- *20. De Concione Latina, habenda die proximo post Comitiam.

SECTIO II.

Statuta generalia ad Vesperias et Comitiam spectantia.

- *§. 1. Designatio Actorum in Vesperiiis et Comitiiis penes Procuratores est.
- *2. Quæstiones in singulis Facultatibus, discutendæ in Vesperiiis et Comitiiis, iudicio Congregationis approbandæ.
- *3. De compescendis contumeliis in exercitiis Vespertialibus et Comitialibus.
- *4. Habitus Vespertiales et Comitiales inceptorum in Artibus.
- *5. Habitus inceptorum in aliis Facultatibus.
- *6. De Senioritate inceptorum in quaque Facultate.
- *7. De Sedilibus inceptorum et extraneorum non occupandis.
- *8. De Vesperiiis et Comitiiis a B. Virginis Mariæ Templo transferendis ad Ædificium seu Theatrum publicum, impensis et munificentia Reverendissimi in Christo Patris, Gilberti Archiepiscopi Cantuariensis nuperrime extractum; aliisque capitibus negotium istud concernentibus.

TITULORUM, &c.

TITULUS VIII.

DE DISPUTATIONIBUS ORDINARIIS.

- *§. 1. De Disputationibus ordinariis in S. Theologia.
- *2. De Disputationibus ordinariis in Medicina.
- *3. De Disputationibus ordinariis in Jurisprudencia.
- *4. De Disputationibus Quodlibeticis habendis, vice ordinariarum, in Artibus.
- *5. De Disputantibus per Bedellos præmonendis.
- *6. Disputantium habitus. Præfandi leges.
- *7. De Officio Vice-Cancellarii et Procuratorum, circa has Disputationes.
- *8. De mulctandis delinquentibus circa has Disputationes.

TITULUS IX.

DE CONGREGATIONIBUS MAGISTRORUM REGENTIUM.

SECTIO I.

De tempore et negotiis Congregationum, et de personis ad eas spectantibus.

- §. 1. De Tempore Congregationum habendarum. 33
- 2. De negotiis in Domo Congregationis tractandis. 34
- 3. De personis ex quibus constat Congregatio; et penes quos sit potestas negandi quæ proponuntur. ibid.
- 4. De Magistris necessario Regentibus. 35
- 5. Formula admittendi Magistros ad regendum. 36
- 6. Qui sint Magistri Regentes ad placitum. 37

SECTIO II.

De Examinandis Graduum Candidatis.

- §. 1. De Examinatoribus designandis, et juramento onerandis, per Seniores Procuratores. 37

ELENCHUS

2. De EXAMINATIONIBUS habendis, et de Candidatorum admissione. 40
3. De Materie, Loco, Forma et Modo EXAMINATIONIS. 43
4. De Officio ac Cura Vice-Cancellarii et Procuratorum circa EXAMINATIONES; et de Examinatoribus remunerandis. 54

SECTIO III.

De Gratiis petendis.

- §. 1. Conditiones præviæ ad petitionem Gratiæ ex parte supplicis. 57
2. Conditiones proponendi Gratias. 58
3. Formula generalis petendi Gratias. 61
4. Formulæ speciales Gratiarum ad singulos Gradus pertinentium. 62
5. De Gratiis simpliciter concedendis vel negandis. 67
6. De suffragiis, in concedendis vel negandis Gratiis, non revelandis. ibid.
7. De causa gratiæ ter negatæ ostendenda, statim post tertiam Congregationem finitam. 68
8. Formula pronunciandi Gratias concessas. ibid.

SECTIO IV.

De Dispensationibus.

- §. 1. De dispensationibus in venerabili Domo Congregationis proponendis. Formula supplicandi. 69
2. De Materia Dispensabili, in qua Congregationi dispensare permissum est. 70

TITULORUM, &c.

SECTIO V.

De Præsentationibus Graduandorum.

- §. 1. De circuitione a præsentandis obeunda. 72
2. De solenni processu præsentandorum ad Do-
mum Congregationis. 74
3. De subscriptione ante præsentationem exigenda. 75
4. Ceremoniæ, sive ritus præsentationum. ibid.
5. Peculiares Formulæ præsentandi ad singulos
Gradus. 76

SECTIO VI.

De Juramentis Præsentandorum.

- §. 1. Statuta, in quæ singulos Præsentatos Jureju-
rando adiget Junior Procurator. Et admo-
nitio de habitu Gradui competente. 78
2. De Juramentis Primatus Regii et Fidelitatis, a
singulis Præsentatis exigendis. 81

SECTIO VII.

De Creatione et Licentiatione præsentati per Vice- Cancellarium peragenda. 81

SECTIO VIII.

De Incorporatione.

- §. 1. De incorporandis studiosis ab aliis Academiis
huc adventantibus. 83
2. Condiciones incorporandi alumnos Academiæ
Oxoniensis, vel Cantabrigiensis, apud exteras
Academias Gradus capessentes. 85
3. Quo loco et statu incorporati esse debent. 86

SECTIO IX.

De Licentiis concedendis.

- §. 1. De qualitate eorum, qui ad concionandum per
universam Angliam licentiandi sunt. 86

ELENCHUS

2. Formula petendi licentiam ad concionandum per universam Angliam. 87
3. Formula Literarum testimonialium. ibid.
4. De qualitate eorum, qui ad praxin in Medicina licentiandi sunt. 88
5. Formula petendi licentiam ad practicandum in Medicina. 89
6. Formula Literarum testimonialium. 90
7. De qualitate et conditione licentiandi ad praxin Chirurgiæ. ibid.
8. Formula Literarum testimonialium. 91

TITULUS X.

DE MAGNA CONGREGATIONE.

SECTIO I.

1. De Personis, ex quibus constat Magna Congregatio, sive Convocatio Magistrorum Regentium et non Regentium. 92
2. De modo ad magnam Convocationem conveniendi. 95

SECTIO II.

De Negotiis in Domo Convocationis tractandis.

- §. 1. Enumeratio negotiorum, quæ ad Domum Convocationis spectant. 96
2. De Statutis et Decretis in Domo Convocationis condendis et interpretandis. 97
 - *3. De Statutis Universitatis transcribendis et custodiendis.
 4. De Materia dispensabili, in qua Convocationi dispensandi potestas permissa est. 98
 5. De Materia indispensabili, in qua Convocationi dispensare non permittitur. 100
 6. De electionibus in Domo Convocationis habendis. 101

TITULORUM, &c.

7. De Delegatorum nominatione et munere. 104
*De Delegatorum Preli nominatione et munere.
*De Statis Delegatis pro Academiae Privilegiis
tuendis et conservandis.
*De Statis Delegatis pro curatione et elocatione
Terrarum ad Universitatem spectantium.
8. De Degradatione. 106

TITULUS XI.

DE CONGREGATIONIBUS ET CONVOCATIONIBUS STATUTA GENERALIA.

- §. 1. Congregationibus alii necessario, alii libere in-
tersunt : Convocationibus singuli, rite moniti,
tenentur per fidem interesse. 107
2. De ordine sedendi in Convocatione et Congre-
gatione. 108
3. In Domo Congregationis et Convocationis La-
tino idiomate utendum. Loquendi modus,
et vices servandæ. A contumeliis abstinend-
um. 109

TITULUS XII.

DE ASSIMILATIONIBUS PARVIS, SEU SIMILEPRIMO.

- *Negotia huic conventui permissa, item inter-
dicta.

TITULUS XIII.

DE HEBDOMADALI ET ORDINARIO CONVENTU PRÆ- FACTORUM COLLEGIORUM ET AULARUM. 109

TITULUS XIV.

DE VESTITU ET HABITU SCHOLASTICO.

- §. 1. De vestitu Præfactorum, Sociorum, et Schola-
rium Collegiorum; et de modo in vestibus
servando a cæteris. 111

ELENCHUS

2. De reprimendis et puniendis novos et insolitos habitus invehentibus. 111
3. De habitu Academico singulis Gradibus et Facultatibus competente. 112
De usu Habitus Academici. 115

TITULUS XV.

DE MORIBUS CONFORMANDIS.

- Sect. 1. De Reverentia Juniorum erga Seniores. 116
2. De coercendis otiosis et male feriatis Scholaribus in Civitate oberrantibus. 117
3. De Domibus Oppidanorum non frequentandis. ibid.
4. Quod Scholares Conventibus Municipii Oxoniensis, et Sessionibus et Assisis non intersint. 118
5. De Cœnopolyis, seu Tabernis vinariis, Popinis, et Diversoriis non frequentandis, necnon de Oppidanis epulas Scholaribus sine venia pretio præbentibus. 119
6. De Nocturna Vagatione reprimenda. ibid.
7. De Ludis prohibitis. 120
8. De famosis Libellis cohibendis, et de Contumeliis compescendis. 121
9. De Vi et Injuria prohibenda. 122
10. De Armis non gestandis. ibid.
11. De Conventiculis illicitis reprimendis. 123
- Sect. 12. De Auctoribus et Fautoribus Dissensionis puniendis. ibid.
13. De Oppugnatoribus et Violatoribus publicæ Auctoritatis, et Manuinentibus coercendis. 124
- Sect. 14. De Vehiculis. 125
15. De reprimendis sumptibus non Academicis. 126
16. De delictis contra quæ nullo speciali Statuto cautum est, et de pœnis pro arbitrio infligendis. 127

TITULORUM, &c.

TITULUS XVI.

DE CONCIONIBUS.

- §. 1. De Concionibus ante meridiem, diebus Dominicis intra Terminum, habendis. 128
2. De Concionibus habendis ante meridiem diebus Dominicis extra Terminum, necnon Dominicis Quadragesimalibus et diebus Festis ante meridiem, ac Dominicis post meridiem per totum Annum. 130
3. De Concionibus Quadragesimalibus et in Dominica Paschatis post meridiem. 131
4. De Concionibus quibusdam extraordinariis ad Ecclesiam B. Mariæ. ibid.
5. De Concionibus Anniversariis habendis extra Templum B. Mariæ. 133
6. De Concionatoribus approbandis. ibid.
7. De præmonendis Concionaturis, et pœna eorum qui deficiunt. 134
8. De selectis quibusdam Concionatoribus designandis. 135
9. De Concionatoribus remunerandis. 136
10. De Commemoratione publicorum Universitatis Benefactorum, præ Concionibus solennibus intra Universitatem habendis. 138
11. De Offensionis et Dissensionis materia in Concionibus evitanda. 140
12. De Officiis Divinis, seu Precibus solennibus juxta Liturgiam Ecclesiæ Anglicanæ, et Concionibus publicis, frequentandis. 141
- *[§. 8. De selectis quibusdam Concionatoribus designandis.
- *§. 11. De Offensionis et Dissensionis materia in Concionibus evitanda.]
- *De augendis Vicariorum quorundam stipendiis.

ELENCHUS

TITULUS XVII.

DE OFFICIARIIS UNIVERSITATIS.

SECTIO I.

De Cancellario Universitatis.

- *§. 1. De Cancellarii electione et admissione.
- *2. De officio, auctoritate, et potestate Cancellarii.

SECTIO II.

- **De Seneschallo et Sub-Seneschallo Universitatis, eorumque electione et officio.*

SECTIO III.

De Vice-Cancellario.

- *§. 1. De Cancellarii Commissario Generali, seu Vice-Cancellario, ejusque nominatione et admissione; et de Deputatis ipsius.
- *2. De auctoritate et officio Vice-Cancellarii.
- *3. De Computo Vice-Cancellarii, ejusque Salario.

SECTIO IV.

De Procuratoribus Universitatis.

- *§. 1. De pristina Procuratores eligendi forma abrogata, et nova per Sereniss. REG. CAROLUM invecta.
- *2. De novorum Procuratorum admissione ad officia sua.
- *3. De officio et auctoritate Procuratorum.
- *4. De Famulis Procuratorum.
- *5. De Computo Procuratorum et Salario.

TITULORUM, &c.

SECTIO V.

- §. 1. De Nominatione et Officio Magistrorum Scholarum. 142
2. De Magistris Scholarum et Procuratorum Deputatis remunerandis. 143

SECTIO VI.

De Magistris vicorum designandis, et eorum officio.
144

SECTIO VII.

**De Publico Oratore Universitatis.*

SECTIO VIII.

**De Clericis Mercatus.*

SECTIO IX.

**De Publico Archivorum Universitatis Custode.*

TITULUS XVIII.

DE MINISTRIS ET SERVIENTIBUS UNIVERSITATIS.

SECTIO I.

**De Registrario Universitatis.*

SECTIO II.

**De Bedellis.*

- *§. 1. De Bedellorum electione.
*2. De Bedellorum officii.
*3. De Bedellorum Baculis sive Columnis quotannis deponendis, seu resignandis.

SECTIO III.

**De Stationario seu Virgifero Universitatis.*

ELENCHU

SECTIO IV.

** De Clerico Universitatis ; et Tintinnabulario ejusdem.*

SECTIO V.

** De Typographis Universitatis.*

SECTIO VI.

** De Ballivo Universitatis.*

TITULUS XIX.

DE FEODIS AD UNIVERSITATEM, OFFICIARIOS, ET
SERVIENTES PERTINENTIBUS. 145

Supplementum ad Statutum Tit. XIX. 146

TITULUS XX.

DE BONIS ET LOCIS PUBLICIS UNIVERSITATIS.

*§. 1. De Communi Ærario, et Bonis Universitatis
in tuto custodiendis.

*2. De Chartis et Munimentis Universitatis cus-
todiendis.

*3. De Sigillis Universitatis.

*4. De Scholis Publicis.

*5. De Bibliotheca.

6. De platearum regimine. 147

TITULUS XXI.

DE JUDICIIS.

§. 1. De jurisdictione Universitatis tuenda. 149

2. De Curia Commissarii sive Vice-Cancellarii
Universitatis. 150

TITULORUM, &c.

3. De Assessore, sive Deputato Vice-Cancellarii. 151
4. De Registrario Curiae Vice-Cancellarii. 152
5. De Procuratoribus ad lites. 153
6. De contumacia coercenda, ibid.
7. Cum reus comparuerit in Judicio, quid agendum. 154
8. De modo procedendi in causis levioribus, et in causis quæ pecunia æstimandæ non sunt. 155
9. De modo procedendi in causis gravioribus. ibid.
10. De modo procedendi in causis criminalibus. 156
11. De incarceratione, custodiæ causa. ibid.
12. De iis qui majorum criminum suspicione tenentur. 157
13. De reis majorum criminum convictis. 158
14. De iis qui de se justitiam fieri non permittunt. ibid.
15. De iis, qui Universitatis juribus ac privilegiis adversantur, discommunicandis, vel disprivilegiandis. 159
16. De perturbatoribus pacis, sive iis quorum appellationes recipiendæ non sunt. 160
17. De causis in quibus dubitatur, utrum appellatio admittenda sit, necne. 162
18. De appellationibus admittendis in causis civilibus perturbationi pacis annexis. 163
19. Quo ordine appellandum sit. ibid.
20. De iudicibus delegatis in causis appellationum. 164
21. De cautionibus ab appellantibus deponendis penes Procuratores Universitatis, priusquam inhibitionem obtineant. 165
22. De modo procedendi in causis appellationum. 166

ELENCHUS

APPENDIX STATUTORUM,

In qua continentur,

- *Ordinatio Margaretæ Comitiss. Richmondiæ, circa
Lectorem in S. Theologia.
- Statuta Bibliothecæ Bodleianæ.
 - §. 6. De modo studendi. Necnon de libris in
quarto et octavo. 168
 - §. 12. De iis quos studendi causa ad Bibliothecam
admittere licet. 169
 - De Necessitatibus Bibliothecæ Bodleianæ sub-
veniendis. 173
 - Statutum novum Bibliothecæ publicæ Bodleianæ
1813. 175
- *Statuta Saviliana, de Professoribus Matheseos.
- *Dotatio Lecturæ Naturalis Philosophiæ per D. Guil.
Sedley.
- *Statuta Doctoris White, de Lectore Moralis Philo-
sophiæ.
- *Statuta Lecturæ Anatomicæ.
- *Statuta Doctoris Heather de Praxi Musices Heb-
domadali.
- *Statuta Lecturæ Arabicæ per rev. Guil. arch. Can-
tuar.
- *Statuta Lecturæ Poeticæ per Hen. Birkhead.
- *Statuta Vineriana.
- ΕΠΙΝΟΜΙΣ, seu explanatio juramenti, &c. 186
- Ordo sive Series Electionis Procuratorum, &c. 190
- Statuta CAROLINA de Cyclo Procuratorio. 192
- *Statuta Aularia.
- Statutum de Electione Scholarium qui ex bonis Col-
legii Hertfordensis annuo præmio donandi
sunt. 196
- Articuli Fidei et Religionis. 198

TITULORUM, &c.

Three Articles in the 36th Canon.	213
Oath of Allegiance.	ibid.
Oath of Supremacy.	214
Monition at the Matriculation of a Scholar.	ibid.
Oath at the Matriculation of a Privileged Person.	ibid.

PARECBOLE

PARECBOLÆ

SIVE

EXCERPTA

E

CORPORE STATUTORUM

UNIVERSITATIS OXONIENSIS.

TITULUS I.

De Terminis et Vacationibus.

Sect. I. *De Terminorum numero, initio, et fine.*

ORDINATUM est, quod Annus Academicus, prout consuetudo obtinuit, quatuor Terminos, in quibus omnes Actus Scholastici exercendi sunt, et totidem Vacationes contineat.

² E quibus primus Terminus incipiet in crastino S. Dionysii, scilicet decimo Octobris, (in

quo antiquitus Magistri Lectiones suas resumere solebant;) et octavo die ante Natalem Domini, scilicet decimo septimo Decembris, in crastino diei qui O Sapientia dici solet, terminabitur.

3 Secundus autem in crastino S. Hilarii, hoc est decimo quarto Januarii, inchoabitur; et in Vigilia Dominicæ Palmarum desinet.

4 Tertius autem die Mercurii post Dominicam in Albis, hoc est, decimo die post festum Paschatis, initium sumat; et in die Saturni proxime ante Pentecosten exeat.

5 Quartus die Mercurii post festum Pentecostes auspicietur; et continuetur ex prorogatione, virtute præsentis Statuti, (absque præjudicio vel incommodo Statutorum vel Consuetudinum alicujus Collegii vel Aulæ,) in diem Sabbati Comitia proxime sequentem; et ulterius, secundum beneplacitum Vice-Cancellarii, Procuratorum, et Magistrorum Regentium.

6 Quod si forte initium vel finis alicujus Termini in diem Festum inciderit, inchoatio vel terminatio ejusdem in diem immediate sequentem differatur. Proviso semper, quod si finis Termini tertii in diem Festum inciderit, Terminus iste in die antecedenti exeat.

7 Plenus autem Terminus, quoad exercitia in pleno Termino per Statuta necessario præstanda, inchoari intelligendus est primo die Hebdomadis sequentis primam Congregationem; utpote, si prima Congregatio fuerit die Lunæ, Dominica proxime sequens habeatur primus dies in pleno Termino.

Sect. 2. *De Precibus Solennibus ac Concione initio cujusque Terminis habendis.*

Quo auspiciatius simul et solennius Terminus quisque inchoetur, ordinatum est, quod post Preces publice secundum Liturgiam Ecclesiæ Anglicanæ in Ecclesia B. Mariæ Virginis celebratas, concio Latine ad Clerum habeatur.

- 2 Quam concionem obeant ii, qui juxta seriem Tit. XVI. §. 2. ordinatam concionandi vices sustinere debent. Si quis vero ante tres saltem menses a Præfecto Domus suæ, ejusve Deputato, rite præmonitus, se partes suas impleturum esse non indicaverit, neque ipse Domus Præfectus, vel ejus Deputatus, aliquem alium nominaverit, Vice-Cancellarius aliquem concionaturum designabit. Cauto semper quod S. Theol. Bedellus ante sex septimanas Vice-Cancellario renunciare teneatur, quandocumque nemo ad eam concionandi vicem supplendam nominatus fuerit.
- 3 Cuilibet autem hanc concionem habenti solvantur quinque libræ et quinque solidi, e pecuniis juxta ordinationes Tit. XVI. §. 9. receptis.
- 4 Litaniam Procuratores ipsi, vel alii duo magistri a Procuratoribus designati, solenniter ac devote cantare, aut legere, teneantur. Chorus autem respondeat.
- 5 Preces vero Vice-Cancellarius, aut ejus Deputatus, perlegat, et reliqua ibidem in Officiis Divinis præstanda celebret, ac peragat.
- 6 Demum post peractas Preces, finita etiam concione, ad sacram Synaxin decenter et reverenter celebrandam se accingant. Cui melioris notæ Academicos frequentes adesse, præter conscientiæ dictamen, publici exempli interest;

sicut et singulos ceremoniis et Canonibus Ecclesiæ conformes se præstare interest Disciplinæ Ecclesiasticæ, contra quam ne quid peccetur, sedulo curabit Vice-Cancellarius.

TITULUS II.

De Matricula Universitatis.

Sect. I. De Matricula Universitatis custodienda.

CUM multis eisdemque gravissimis de causis sanctissimæ nostræ Universitati non minus necessarium quam operæ pretium existimatum sit, ut certa aliqua ratio ineatur, qua facillime nulloque negotio intelligi semper perspicique possit omnium eorum cum numerus tum conditio, quos suo aliquando sinu complexa sit atque foverit; Idcirco conceptis verbis statuendum, novaque lege sancendum esse duxit, ut perpetuis posthæc temporibus sit et conservetur penes Cancellarium, vel ejus Commissarium qui pro tempore existet, unum Registrum sive Liber Matriculationis omnium Personarum tam Studentium, quam Servientium, aut Ministrorum eorundem; omniumque aliarum Privilegiatarum personarum, juribus sive libertatibus ejusdem Universitatis, quocunque titulo sive prætextu, utentium.

Sect. 2. De tempore et conditionibus Matriculationis.

Statutum est, quod nemo pro Studente, seu Scholari, habeatur, nec ullis Universitatis privilegiis, aut beneficiis, gaudeat, nisi qui in aliquod

Collegium vel Aulam admissus fuerit, et intra quindenam post talem admissionem in matriculam Universitatis fuerit relatus.

- 2 Quotquot autem in Matriculam Universitatis redigendi accedunt, si decimum sextum suæ ætatis annum attigerint, Articulis Fidei et Religionis subscribant; et de agnoscendo Primatu Regiæ Majestatis, corporale juramentum præsentent. Qua subscriptione peracta, singulis Vice-Cancellarius exemplar Statutorum in manus tradat, eosque sequentem in modum admoneat. *Scito te* [vel, si plures fuerint, *Scitote vos*] *in Matriculam Universitatis hodie relatum* [vel *relatos*] *esse, sub hac conditione, nempe ut omnia Statuta hoc libro comprehensa pro virili observes* [vel *observetis*].
- 3 Quod si infra decimum sextum et supra duodecimum ætatis annum extiterint, Articulis Fidei et Religionis duntaxat subscribent, et in matriculam redigentur.
- 4 Quod si duodecimum non excesserint, in matriculam duntaxat referentur; utrique tamen postmodo, ubi ad maturam ætatem pervenerint, qua cætera requisita præstare possint, tum demum ea præstare teneantur, sub pœna non sistentium se matriculandos.

Sect. 3. *De officio Præfactorum circa Scholares Matriculandos.*

Decretum est, quod omnes et singuli Præfecti sive Magistri Collegiorum aut Aularum, (sive quocunque alio titulo ac nomine cognoscantur, aut censeantur,) aut, ipsis absentibus, eorum Deputati, teneantur et obligentur, infra quindenam a tempore quo aliquis Scholarium sive Studentium in suum Collegium sive Aulam

fuerit admissus, eundem Scholarem sive Studentem coram Cancellario vel ejus Commissario qui pro tempore fuerit, personaliter sistendum curare, ut in Matriculam Universitatis nomen ejus debite referatur.

- 2 Una cum Matriculando accedat ipsius Tutor, qui de conditione matriculandi (utrum scilicet Nobilis, Equitis, Doctoris, Armigeri, Clerici, Generosi, an Plebeii filius sit) Vice-Cancellarium certiolem faciat.

Sect. 4. *De Laicis ad Privilegia Universitatis admittendis.*

Statutum est, quod quilibet Laicus ad privilegia Universitatis admittendus curet se in Matriculam Universitatis referendum; et tempore admissionis suæ juramentum præstet de Statutis, Privilegiis, et Consuetudinibus Universitatis, quatenus ad ipsum pertineant, observandis; et insuper juret, quod nunquam aliquam Causam suam coram Majore, Ballivis, aut aliis Civitatis Oxoniensis Officiariis attemptabit, nec coram eorum aliquo, tanquam suo Judice, respondebit, quamdiu in Universitatis obsequio permanserit.

Sect. 5. *De Officiis in Universitate et Civitate simul non gerendis.*

Statutum est, ne quispiam Officiarius, vel ejus Deputatus, vel Minister Universitatis Officio quovis in Civitate Oxoniensi simul fungatur. Et quod, cum primum innotuerit hujusmodi Officium, Deputatum, vel Ministerium tale munus in Civitate Oxoniensi obtinuisse,

aut serio ambiisse, e vestigio hujusmodi Officiarius Officio suo Academico privetur.

Sect. 6. *De Feudis Matriculandorum, et de eorum distributione.*

Ordinatum est, quod quilibet Scholaris sive studens, aut quivis alius cujuscunque ætatis aut conditionis, tempore Matriculationis, certam pecuniæ summam nomine Matriculationis juxta sanguinis et conditionis suæ qualitatem, persolvat; prout exprimitur in Tabula pensili, palam ac publice, in Apodyterio Domui Congregationis vicino, proponenda; et fiat distributio juxta ordinationes in Venerabili Domo Convocationis jam editas, vel edendas.

TITULUS III.

De Scholaribus in Collegia et Aulas compellendis.

Sect. I. *Ne quis Scholaris in domibus privatis victitet, aut hospitetur.*

CUM ad eruditionem et ingenuam Disciplinam promovendam plurimum conducatur, ut Scholares non solum sub publico sed etiam sub privato regimine contineantur; Statutum est, quod omnes Scholares, cujuscunque conditionis, in Collegio suo vel Aula victum sumere ac pernoctare teneantur, nec ullo modo, (nisi ex gravi aliqua et perurgenti causa per Cancellarium aut ejus Vice-Cancellarium approbanda,) in Domo

privata cujusquam (sive Privilegiati, sive non) hospitentur aut victitent: sub pœna quod si quis in hoc deliquerit, pro eo tempore quo sic deliquerit, Universitatis Privilegiis non fruatur, et, crescente contumacia, a Cancellario, aut Vice-Cancellario banniat. Proviso semper, quod causa allegata, per Præfectum Domus, vel, eo absente, per ejus Deputatum, in Scheda aliqua Chirographo suo munita, Vice-Cancellario significetur. Quod si Vice-Cancellarius causam istam ratam habuerit, licentiam pro certo aliquo tempore, non autem indefinite, concedat; quo etiam in casu hanc licentiam, Chirographo suo munitam, una cum Scheda ad se delata, in Registro aliquo peculiari penes ipsum adservando inserendam curabit; quod Registrum in singulis Congregationibus, præsto esse, ac demum, finito anno, ad succedentem Vice-Cancellarium transmitti oportet.

- 2 Quicumque vero aliter Scholarem in domo sua commorari, victitare, vel pernoctare permiserit, et, admonitus a Vice-Cancellario, in delicto perseveraverit, si Privilegiatus fuerit, Privilegiis Universitatis privetur: si Oppidanus, commercio cum Privilegiatis ei interdicator.
- 3 Proviso tamen, quod liceat Scholaribus in domibus quibusvis et tenementis, Collegiis vel Aulis annexis vel annectendis, in quibus oppidani familiam non alunt, hospitari: dummodo in annectendis servetur hæc cautio; ut ita sitæ sint, ut ad eas nullus pateat ingressus, nisi per commune Ostium Collegii, vel Aulæ. Cujus rei arbitrium et cura penes Cancellarium seu Vice-Cancellarium esto.

Sect. 2. *Quales Tutores Scholaribus præficiendi sunt.*

Statutum est, quod Scholares in quolibet Collegio vel Aula, statim a primo eorum ad Academiam adventu, singuli suos Tutores habeant, donec ad gradum aliquem promoti fuerint; vel saltem quatuor annos (ut in Jure Civili vel in Medicina studentes) in Academia compleverint.

- 2 Et quod nullus pro Tutore se gerat, nisi qui sit in aliqua facultate graduatus, Vir Probitate et Eruditione perspecta, Religione sincerus, judicio Præfecti Collegii sive Aulæ (in qua degit) comprobatus; vel, si circa hoc controversia oriatur, judicio Vice-Cancellarii approbandus.
- 3 Proviso insuper, quod, si per probationes legitimas innotescat Vice-Cancellario, cuiquam minus idoneo Tutoris munus fuisse demandatum, liceat Vice-Cancellario eidem Tutoris officio omnino interdicare.
- 4 Tutor vero Scholares tutelæ et regimini suo commissos probis moribus imbuat, et in probatis authoribus instituat; et maxime in rudimentis religionis et doctrinæ Articulis in Synodo *Londini* anno 1562 editis: ac pro virili suo disciplinæ in Ecclesia Anglicana publice receptæ eos conformes præstabit. Quod si quis in aliquo prædictorum deliquerit, arbitrio Cancellarii vel Vice-Cancellarii coerceatur.

Tutoris etiam muneri incumbit, quoad ea
5 quæ ipsius oculis quotidie sese ingerere necesse est, Pupillos suos intra modum a Statutis præscriptum continere.

Sect. 3. *De non migrando sine venia ab uno Collegio vel Aula ad aliud.*

Statutum est, quod non licebit alicui Collegii vel Aulæ Præfecto quenquam Scholarem sponte sua ab alio Collegio vel Aula discedentem, in Collegiam vel Aulam suam admittere, nisi veniam obtinuerit dictus Scholaris sub Chirographo Præfecti domus, e qua recesserit, una cum testimonio de honesta ac laudabili ejus conversatione; vel, testimonio prædicto non obtento, nisi per integrum annum dictus Scholaris extra Universitatem degerit, et data sit venia simpliciter a Præfecto domus e qua recesserit. Quod si quivis Scholaris ab uno Collegio vel Aula ad aliud alio quocunque modo migraverit, illi omnibus Universitatis Privilegiis interdicitur. Proviso semper, quod si causa recessus vel migrationis per Cancellarium Universitatis, vocato et audito Præfecto Domus e qua discedere cupit Scholaris, primitus fuerit approbata, licebit alii cuivis Collegii vel Aulæ Præfecto Scholarem prædictum in Ædem suam admittere.

- 2 Quod si quis a Collegio aliquo vel Aula expulsus fuerit, (id quod ante cujusquam admissionem explorare tenentur Præfecti Ædium,) nemo in Collegium vel Aulam suam eum admittat, donec Cancellarius (causa expulsionis cognita, et pœna eidem pro arbitrio suo prius irrogata) admittendum censuerit, sub pœna superius limitata Scholari infligenda.

TITULUS VI.

De Tempore ad Gradus capessendos requisito, et Exercitiis pro Forma præstandis.

SECTIO I.

De Tempore et Exercitiis requisitis ad Gradum Baccalaurei in Artibus.

§. 1. *Quot anni, in audiendis publicis Lectoribus ponendi, requirantur ad Gradum Baccalaurei in Artibus.*

STATUTUM est, quod Scholares in facultate Artium, antequam Gradum Baccalaureatus suscipiant, quatuor annos integros, sive sedecim Terminos, numerandos a die Matriculationis, in Studio Artium, et in publicis Lectoribus, prout Statuta requirunt, diligenter audiendis, in Academia (hoc est, minime in domo privata cujuspian hospitantes seu victitantes, sed in Collegio vel Aula quapian absque dolo malo degentes), ponere teneantur; exceptis Baronibus in superiori domo Parliamenti suffragii jus habentibus, aut, quando per ætatem congruerit, habituris, necnon Baronibus ex gente Scotica aut Hibernica, et horum omnium filiis; exceptis etiam filiis Baronissarum ea nobilitate jure proprio gaudentium, et filiis natu maximis filiorum natu maximorum Baronum, vel Baronissarum; exceptis etiam Baronettis, et illorum filiis natu maximis, et filiis natu maximis Equitum Auratorum, quibus indulget Academia, (modo ne Collegii alicujus Socii, aut Scholares, sive Alumni, fuerint, ea etiam conditione, ut sub hujusmodi titulo in Matriculam Universitatis re-

lati fuerint,) post integrum triennium in Studiis Academicis completum (vel etiam Baronibus, et Baronum, vel Baronissarum filiis, et filiis natu maximis filiorum natu maximorum Baronum, vel Baronissarum intra brevius temporis curriculum, si Cancellario videbitur) ut, præstitis Exercitiis ad eum Gradum requisitis, Gradum Baccalaurei in Artibus ambire possint.

§. 2. *De Exercitiis præstandis pro Gradu Baccalaurei in Artibus.*

STATUTUM est, quod priusquam quis ad Gradum Baccalaurei in Artibus admittatur, in Parviso semel Quæstionibus Magistrorum Scholarum respondeat.

RESPONSIONIBUS autem hisce assignentur in Termino Michaelis duæ Septimanæ a die vicesimo sexto mensis Octobris, duæ itidem in Termino Hilarii a die Mercurii Dominicam Septuagesimæ proxime sequenti, duæ insuper a die Lunæ post primam Dominicam in Termino Trinitatis, inclusive numerandæ. Qui autem in quovis trium horum Terminorum responsuri sunt, nomina sua, vel per se, vel per Tutores suos, coram Procuratore Juniore profiteantur, in Registro peculiari penes ipsum asservato, et in Terminos hosce rite distributo, inserenda; hac tamen lege, nequis serius quam triduo (ita ut tres dies integri supersint) ante RESPONSIONES inchoandas Procuratorem in hac re adeat.

Proviso semper, quod nemini RESPONSIO sua cedat pro forma ante inchoatum a tempore Matriculationis suæ sextum, nec post finitum nonum Terminum; exceptis iis quibus indulget Academia, ut integro triennio in Studiis Aca-

demicis completo ad Gradum promoveantur^a. Horum unicuique RESPONSIO suaccedat pro forma post inchoatum quartum Terminum, et ante septimum finitum, a tempore Matriculationis suæ computandum.

Si quis autem infirma valetudine aut gravi alia causa impeditus intra Terminos supra præfinitos non responderit, illi tamen licebit, cum consensu Vice-Cancellarii et Procuratorum, sequenti aliquo Termine respondere.

Nemo etiam ad respondendum admittatur, post Terminum Michaelis anno Millesimo Octingentesimo Nono, nisi qui RESPONSIONIBUS hisce uno saltem die per integrum tempus interfuerit: et quo unumquemque huic Statuto satisfecisse liquido appareat, dies quo interfuerit notetur, Testimonio ei perhibito ab uno ex Magistris Scholarum sub hac forma:

A. B. RESPONSIONIBUS in Parviso per integrum tempus interfuit, [die mensis et anni.]

Ita testor A. B.

Quod quidem Testimonium unusquisque per se, vel per Tutorem suum, teneatur exhibere, eo ipso tempore quo et nomen suum coram Juniore Procuratore profitetur; neque licebit Procuratori, Testimonio isto non exhibito, aliquem in RESPONDENTIUM numerum referre.

Procurator autem Junior, ubi tandem, modo supra præscripto, de iis omnibus qui in Termine aliquo respondere velint, certior factus fuerit, tenetur statim nomina eorum in Schedulam referre, serie Alphabetica; deinde Schedulam is-

^a Vide Tit. VI. Sect. I. §. I.

tam Chirographo suo munitam, et typis mandatam, sub hoc titulo,

[*Ordo RESPONENTIUM Termino A. D.*]

ad Vice-Cancellarium, ad singulos Collegiorum et Aularum Præfectos, ad Procuratorem Seniores, ad singulos Magistros Scholarum, et ad cujuslibet Collegii vel Aulæ Refectorium tam publicum quam privatum Magistrorum deferri, et ostiis etiam Bibliothecæ Bodleianæ, Scholæ Metaphysices, et Apodyterii Venerabilis Domus Convocationis affigi, curabit: quæ omnia ita agenda sunt, ut, si fieri potest, bini dies integri inter Schedulam hanc publici juris factam et RESPONSIONES inchoandas interjiciantur.

Et hæc Scheda Procuratoria, modo et forma præscriptis publicata, pro omni qualicunque licentia, monitione, et notificatione, tam ab ipsis Scholarum Magistris, quam a RESPONENTIBUS, habenda et accipienda est.

§. 3. *De Forma et Modo RESPONSIONUM.*

LOCUS hisce RESPONSIONIBUS assignetur Schola Metaphysices. In eam igitur Scholam Magistri Scholarum se conferant diebus in Terminis Michaelis, Hilarii, et Trinitatis, supra præscriptis, et hora decima matutina; et deinde continuentur RESPONSIONES (donec de omnibus RESPONENTIBUS provisum fuerit) a die in diem, nisi ob causam aliquam rationabilem Magistri Scholarum aliter visum fuerit; quo in casu monentur ut de die quem continuandis RESPONSIONIBUS destinaverint Academiam certiore faciant, Scheda monitoria ad Collegiorum et Aularum Præfectos deferenda, ad portam insuper Refectorii vel Promptuarii cujusque Collegii et Aulæ, et ad portam Scholæ Metaphysices, per Ædituum

Tit. VI. et Exercitiis pro Forma præstandis. 15

Universitatis ad minimum ante meridiem diei præcedentis affigenda. Formula vero Schedulæ hæc esto :

RESPONSIONES in Parviso in diem—prorogantur.

A. B.

C. D.

Hora autem decima matutina in RESPONSIONIBUS uniuscujusque diei incipiendis semper servetur. Excepto quod in die aliquo festo RESPONSIONES non incipiantur nisi post concionem publice coram Universitate habitam.

RESPONDENTES vero juxta ordinem Schedulæ Procuratoriæ a Magistris Scholarum nominatim ad respondendum citentur. Qui citatus non adfuerit, nisi ex causa rationabili per Vice-Cancellarium approbanda, omni loco in RESPONSIONIBUS istius Termini privetur; neque ad respondendum in alio Termino admittatur, nisi iterum coram Procuratore Juniore nomen suum professus fuerit; et citetur proximus, sub eadem lege, et sic deinceps. Quod si Vice-Cancellarius causam aliquam absentiae ratam habuerit, extremus tamen locus in Schedules isti RESPONDENTI assignetur. Proviso semper, quod non plures quam Octo eodem die ad respondendum admittentur.

Quæstiones autem in quibus exercendi sunt RESPONDENTES ad LITERAS HUMANIORES, ad RUDIMENTA LOGICES, et EUCLIDIS ELEMENTA GEOMETRIÆ spectent. Per LITERAS vero HUMANIORES, quod ad has RESPONSIONES attinet, intelligimus Linguas Græcam et Romanam. Adhibentur igitur semper bini ad minimum Scriptores melioris ævi et notæ, (hoc est, unus ad minimum in utraque lingua,) quorum Interpretatio ad accuratam Grammatices normam exigatur.

Magistris Scholarum insuper explorandum incumbit, qua quisque polleat facultate animi sui sensa lingua Latina explicandi: id quod explorare poterunt, porrecto aliquo libro, lingua vernacula conscripto, e quo RESPONDENS oblatum quemcumque locum lingua Latina reddat; aut alio quocumque demum modo, prout ipsis commodius visum fuerit.

Cæterum quod ad LOGICEN et GEOMETRIAM attinet, Magistris Scholarum liberum esto vel in utraque Scientia, vel in una tantum, Quæstiones suas proponere.

Proviso semper, quod, in omni hoc negotio, licebit aut Latino aut Anglicano idiomate uti, prout Magistris Scholarum magis expedire videbitur.

Unoquoque autem die, ubi visum fuerit Magistris Scholarum nullum alium RESPONDENTEM isto die citare, palam declarabit Magister Scholarum Senior diem RESPONSIONIBUS continuandis destinatum. Et post finitas RESPONSIONES uniuscujusque diei alii omnes Schola excedant præter ipsos Magistros Scholarum, qui de RESPONDENTIBUS inter se iudicium ferent, ac quemcumque dignum invenerint ei Testimonium perhibebunt sub his verbis:

A. B. [die mensis et anni] *Quæstionibus Magistrorum Scholarum in Parviso pro forma respondit.*

Ita testamur { *C. D.*
E. F.

Quod si forte contingat aliquem hujusmodi Testimonio indignum reperiri, licebit tamen illi in sequenti aliquo Termine, modo intra novem

menses, nomen suum coram Juniore Procuratore iterum profiteri, et sic deinceps.

§. 4. *De Officio ac Cura Vice-Cancellarii et Procuratorum circa RESPONSIONES in Parviseo.*

QUO Statutum hoc in futurum sancte et inviolabiliter observetur, Ordinatum est, quod in singulis Terminis ad RESPONSIONES in Parviseo destinatis Vice-Cancellarius saltem semel, Procuratores vero, singuli bis ad minimum, Exercitiis hisce intersint, exploraturi utrum omnia rite et secundum Statuta peragantur.

Statutum est etiam, quod Scholaris unusquisque, cum inter RESPONDENTES refertur a Procuratore Juniore, persolvat quindecim Solidos; et quod hæ pecuniæ, finito anno, a Procuratore ad Vice-Cancellarium deferantur.

Volumus insuper, quod Registrum peculiare penes Magistros Scholarum in Schola Metaphysices adservetur, in quo eorum omnium qui Testimonium obtinuerint nomina unoquoque die inserantur; ita ut, si de ista re quæstio aliquando oriatur, ad Registrum hoc perpetuo possit appellari.

Quoniam vero usu venit, ut dies et horas negotiis Academicis a Statutis destinatas mutare interdum commodius reperiatur, fas sit Venerabili Domui Congregationis, ex causa rationabili per Vice-Cancellarium approbata, diem aliquem aut horam hoc Statuto præscriptam pro RESPONSIONIBUS habendis mutare. Proviso tamen, quod Vice-Cancellarius ante triduum Academiam certiore faciat, si quando hujusmodi rem ad Venerabilem Domum Congregationis referendam censuerit.

§. 5. *De tempore intra quod habendi sunt Sophistæ Generales.*

STATUTUM est, quod Scholares in facultate Artium, qui Quæstionibus Magistrorum Scholarum in Parviso responderunt, post duos demum annos in universitate completos, et non antea, Sophistæ Generales, intermissa eos creandi formula, habeantur.

SECTIO II.

De Tempore et Exercitiis requisitis ad Gradum Magistri in Artibus.

§. 1. *Quot anni, in audiendis publicis Lectoribus ponendi, requirantur ad Gradum Magistri in Artibus.*

A TEMPORE admissionis ad Gradum Baccalaurei, tenentur singuli in audiendis publicis Lecturis sibi destinatis duodecim Terminos ponere; nec ante completum illud tempus, Gratiâ suam petere cuiquam fas esto.

Quod si quis Exercitia ad Gradum Magistralem requisita præstiterit, et reliquum temporis spatium in bonarum literarum studio posuerit in alia quacunque Academia, licebit ei tempus id omne imputari, ac si in hac ipsa Academia fuisset insumptum: Constet id modo, ac testatum sit sub Sigillo Academiae, in qua se studuisse profitetur, aut alioqui Testimonio fide digno.

SECTIO III.

De Tempore et Exercitiis requisitis ad Gradus
in Musica capessendos.

§. 1. *Quot anni ponendi sint in studio vel
praxi Musices, pro Gradu Baccalaureatus
in Musica.*

STATUTUM est, quod, qui Musicæ dat ope-
ram, antequam Gradum Baccalaurei in illa Fa-
cultate consequatur, septem annos in studio vel
praxi Musices ponat, et id ipsum sub chirogra-
phis hominum fide dignorum testatum afferat.

§. 2. *De Exercitiis pro Gradu Baccalaurei in
Musica præstandis.*

STATUTUM est, quod, qui ad Baccalaurea-
tum in Musica promoveri cupit, priusquam pro
gratia sua supplicet, unum canticum quinque
partium componat, quod in Schola Musicæ
(alio quovis die, quam illo qui ordinario ad
praxin Musicam designatus est) publice, tam
vocibus quam instrumentis Musicis, exhibeat;
sed prius valvis utriusque magnæ portæ Scho-
larum, ante tres dies, affixo programme, diem
et horam futuri speciminis significet.

§. 3. *Quot anni ponendi sint in studio vel
praxi Musicæ, pro Gradu Doctoris in Mu-
sica.*

STATUTUM est, quod Baccalaureus Musi-
cæ, priusquam ad Doctoratum promoveatur,
quinque annos, post susceptum Gradum, in stu-
dio vel praxi Musicæ ponat; et id ipsum sub

chirographis hominum fide dignorum testatum afferat.

§. 4. *De Exercitiis per Inceptorem in Musica præstandis.*

STATUTUM est, quod Baccalaureus Musicæ, priusquam ad incipiendum in eadem Facultate admittatur, unum canticum sex vel octo partium componat, quod in Schola Musicæ, tam vocibus quam instrumentis etiam Musicis (alio quovis die, quam illo qui ordinario ad praxin Musicam designatus est) publice exhibeat; sed prius, valvis utriusque magnæ portæ Scholarum, ante tres dies, affixo programme, diem ac horam futuri speciminis significet. Quibus Exercitiis per eundem præstitis, per publicum ejusdem Facultatis Prælectorem Heatherianum, aut alium quemvis per eundem assignatum, gratia ipsius in Venerabili Domo Congregationis proponatur; qua concessa, per alterutrum Professor. Savil. (qui ad hoc alternis præstandum tenentur,) vel per alium quemvis in Artibus Magistrum ab iis deputatum, ad Gradum præsentetur.

SECTIO IV.

De Tempore et Exercitiis requisitis ad Gradus in Jure Civili capessendos.

§. I. *Quot anni, in audiendo Professore publico Juris Civilis ponendi, requirantur ad Gradum Baccalauri in Jure Civili.*

STATUTUM est, quod, qui Juri Civili studet, antequam Baccalaureatum in illa Facultate

consequatur, si sit Magister Artium, per tres annos integros (numerandos a die suæ admissionis ad regendum) audiat publicum Juris Civilis Professore. Si quis vero Juri Civili det operam, qui non sit Magister Artium; per quinquennium completum, publicum Juris Civilis Prælectorem diligenter et attente audiat.

Quodque per biennium in Academia, Dialecticæ, Morali Philosophiæ, et Politicæ, aliisque Humanioribus Literis incumbat, priusquam quinquennium in studio juris ponere incipiat; nisi per Statuta Collegii, in quo moratur, citius ad juris studium se convertere teneatur.

§. 2. *Exercitia pro Gradu Baccalaureatus in Jure Civili præstanda.*

STATUTUM est, quod is, qui ad Baccalaureatum in Jure Civili promoveri cupit, priusquam pro gratia sua supplicet, bis in Disputationibus Juridicis pro forma, opponentis principalis (id est, primo vel secundo loco disputantis) munere fungatur; et semel per duas horas in Schola Jurisprudentiæ pro forma, scilicet ab hora prima pomeridiana ad tertiam, respondeat.

Quod si desit, qui pro forma ad consequendum gradum opponat, liceat publico Prælectori vel ejus vices gerenti, opponentis officium ustinere.

Nec hujusmodi Disputatio cuiquam cedat pro forma, nisi quæstiones suæ, una cum nominibus respondentis, et opponentis, per septem dies ante Disputationem, affigantur valvis utriusque exterioris portæ Scholarum; ac insuper

muris Collegii Omnium Animarum, et Oriel, qua Australis et Occidentalis parietes, plateam versus, in angulos coeunt.

§. 3. *Quot anni, in audiendo publico Professore Juris Civilis ponendi, requirantur ad Gradum Doctoris in Jure Civili.*

STATUTUM est, quod qui ad Doctoratum in Jure Civili promoveri cupit, si postquam in Artibus Magister fuerit, Gradum Baccalaurei in Jure Civili susceperit, quatuor annos integros (numerandos a die suæ admissionis ad Gradum prædictum) publicum Prælectorem Juris Civilis audiet, priusquam ad incipiendum in eadem Facultate admittatur.

Alioqui, si Baccalaureus in Jure fuerit, antequam incipiat in Artibus (sive Statutis privati Collegii sic exigentibus, sive sua ipsius optione factum fuerit,) quinque annos integros in audiendo publico Professore Juris Civilis ponere teneatur, priusquam incipere permittatur.

Qui vero in Curiis Ecclesiasticis et Maritimis hujusce Regni se exercere statuerit; illi conceditur, (modo in gratia proponenda causa exponatur, et Declaratio per supplicansem ante admissionem ad Gradum coram seniore Procuratore facta fuerit,) si Baccalaureus in Jure Civili fuerit, ut post quatuor annos integros in publico Professore Juris Civilis audiendo positos, ad incipiendum in eadem Facultate admittatur.

Formula Declarationis hæc esto.

“ Tu declarabis, te hunc Gradum Doctoris
“ ambire eo animo, ut in numerum et Collegium
“ Advocatorum Londinensium in Curiis Ec-

“ clesiasticis et Maritimis hujusce Regni se exercentium, bona fide admittaris ; et admissus in iisdem Curiis te realiter exerceas.” *Resp.* “ Eo animo hunc gradum ambio.”

§. 4. *Exercitia pro Gradu Doctoris in Jure Civili præstanda.*

STATUTUM est, quod Baccalaureus Juris Civilis, priusquam ad incipiendum in eadem Facultate admittatur, vel sex solennes Lectiones ab hora prima pomeridiana usque ad secundam, totidem diebus, publice leget, in quibus quamcunque velit totius corporis Juris Civilis partem explicet, vel aliquem e titulis de judiciis, de probationibus, sive de re judicata, in digestis vel codice, tribus ad minimum Lectionibus, cursorie exponet. Et priusquam vel solenniter, vel cursorie legere inceperit, programma, subjectum et tempus legendi indicans, ante triduum curabit affigi valvis utriusque exterioris portæ Scholarum, ac insuper muris Collegii Omnium Animarum, ac Oriel, qua Australis et Occidentalis parietes, plateam versus, in angulos coeunt.

SECTIO V.

De Tempore et Exercitiis requisitis ad Gradus in Medicina capessendos.

§. I. *Quot anni, in studio Medicinæ ponendi, requirantur ad Gradum Baccalaurei in Medicina.*

STATUTUM est, quod unusquisque antequam Baccalaureatum in Medicina consequatur, quatuor annos integros sive 16 Terminos eodem

modo quo Scholares in Facultate Artium, in Academia absque dolo malo degat, examen publicum inter eosdem subeat, et post examen illud, Medicinæ studio per triennium integrum (scil. 12 Terminos) operam dedisse teneatur.

Porro Studiosis in Medicina liceat Habitu Academico uti, qualem Academia Studiosis in Jure Civili indulget.

Magistris vero in Artibus, vel Baccalaureis in Jure Civili, licebit, (si modo examen subierint infra §. 3 sancitum,) Baccalaureatum in Medicina capessere; cauto tamen nequis ad hunc gradum admittatur ante completos 28 Terminos a die matriculationis suæ computandos.

§. 2. *De Examinatione pro Gradu Baccalauri in Medicina, et de Examinatoribus designandis, et juramento onerandis.*

STATUTUM est, quod qui ad Baccalaureatum in Medicina promoveri cupit, priusquam ad supplicandum pro Gratia admittatur, examen subeat.

Huic igitur rei quo melius prospiciatur, Academiae placuit ut tres in Medicinæ Facultate publici Examinatores constituentur; scilicet, Medicinæ Professor Regius (cujus semper erit huic negotio præesse) duo itidem ex Acad. Oxon. in Medicina Doctores, a Vice-Cancellario singulis Examinationibus nominandi, et deinceps a Domo Convocationis approbandi. Quod si Professor Regius propter gravem aliquam causam absentiae veniam a Vice-Cancellario impetraverit; alium quendam in Medicina Doctorem Vice-Cancellarius in ejus locum substituet.

Tit. VI. et Exercitiis pro Forma præstandis. 25

Singuli autem Examinatores antequam munera sua adeant, coram Vice-Cancellario, exigente Seniore Procuratore, juramentum præstabunt in hæc verba; viz.

Domine Doctor, tu jurabis, quod munus et officium Examinatoris publici in Facultate Medicinæ sedulo et fideliter pro virili exequeris, forma et modo per Statuta requisitis. Resp. Juro.

Item tu jurabis, quod, sepositis omni odio et amicitia, timore et spe, neque indigno cuius testimonium perhibebis, neque digno denegabis. Resp. Juro.

Item tu jurabis, quod nullo modo revelabis suffragium quod vel ipse tuleris, vel alius quis Examinator tulerit, de testimonio alicui perhibendo vel denegando. Resp. Juro.

§. 3. De tempore, loco, et modo Examinationis.

Semel quolibet anno, videlicet Hebdomada secunda pleni Terminii Trinitatis, EXAMINATIO in Facultate Medicinæ habeatur.

Huic EXAMINATIONI liceat Examinatoribus cum consensu Vice-Cancellarii locum aliquem idoneum assignare, modo ante EXAMINATIONEM habendam triduo saltem de hac re Academiam certiores faciant.

Instituatur examen in Theoria et Praxi Medicinæ—in Anatomice—Physiologia, Pathologia, et Materia Medica—insuper in Chemia et Botanice, quatenus eæ disciplinæ Artem Medicam illustrare videantur. Examinatoribus liberum esto, quemlibet Candidatum vel in hisce universis, vel in aliqua parte harum (prout ipsis satius visum fuerit) examinare. Porro nun-

quam non adjiciantur veteres illi Scriptores, Hippocrates, Aretæus, Galenus, et Celsus, quorum duo ad minimum in omni examine semper adhibentur.

Cujuslibet Candidati examen, partim viva voce, partim scriptis, peragatur, et quantum fieri poterit, uno decursu, vel saltem sine diei intervallo, absolvatur. Omnes Examinatores uniuscujusque examini per integrum tempus intersint, nisi aliquid in scriptis præstandum sit, quo in casu unus tantummodo adesse teneatur.

Inter examinandum, aut Latino aut Anglicano Idiomate uti licebit, prout Examinatoribus magis expedire videbitur.

Peracta demum EXAMINATIONE, Examinatores de Candidatis singulis inter se judicium ferent, et quemcunque dignum invenerint, ei testimonium perhibebunt sub hac forma:

A. B. [die mensis et anni] pro gradu Baccalaurei in Medicina examinatus, prout Statuta requirunt satisfecit nobis Examinatoribus.

Ita testamur { *C. D. P. M. R.*
E. F.
G. H.

Nomina quoque eorum qui Examinatoribus satisfecerunt in Registrum peculiare inserentur penes Registrarium Universitatis, finita quaque EXAMINATIONE, adservandum.

Quod si contingat aliquem hujusmodi Testimonio indignum reperiri, licebit illi in aliqua sequente EXAMINATIONE Candidatum se iterum profiteri.

Huic EXAMINATIONI interesse licebit omnibus Magistris in Artibus, Baccalaureis in Jure Civili, et quibuslibet superiore aliquo Gradu insignitis;

necnon Baccalaureis in Artibus, si modo coram Professore Regio sponderint Medicinæ se operam daturos. Sub eadem conditione licebit Juristis et aliis nondum graduatis, qui examen pro Gradu A. B. vel J. C. B. subierint, et qui quadriennium a die Matriculationis suæ compleverint, his Examinationibus interesse.

Unusquisque Candidatus examen subiturus, Professore Medicinæ Regium hac de re certio-rem facere tenebitur decimo quarto die ad minimum ante Hebdomadam EXAMINATIONI habendæ destinata. Quo quidem tempore, Professori in manus literas certificatorias tradendas curabit, quibus se, apud quoddam melioris notæ Nosocomium, cum morbis curandis interfuisse, tum Lecturis audiendis diligentem operam dedisse, liquido constet. Nec Professori Regio licebit, literis certificatoriis istis a majori parte Examinatorum non approbatis, aliquem ad examen subeundum admittere.

Cautum insuper esto ne quis se sistat examinandum, nisi qui septem annos (scil. 28 Terminos) a tempore matriculationis suæ compleverit.

§. 4. *De Examinatoribus remunerandis.*

STATUTUM est, quod Candidatus unusquisque ante EXAMINATIONEM inchoandam Professori Regio in manus deponet sex libras, ab eo, honorarii nomine, duobus reliquis Examinatoribus persolvendas. Ipse Professor feoda antiquitus imperata solus percipiat.

§. 5. *Quot anni, in studio Medicinæ ponendi, ad incipiendum in Medicina requirantur.*

STATUTUM est, quod qui ad Doctoratum in Medicina promoveri cupit, post Gradum

Baccalaurei in Medicina susceptum, per tres annos integros studio Medicinæ incumbat, priusquam ad incipiendum in eadem Facultate admittatur.

§. 6. *Exercitium pro Gradu Doctoris in Medicina præstandum.*

STATUTUM est, quod Baccalaureus in Medicina, priusquam ad incipiendum in eadem Facultate admittatur, dissertationem a se conscriptam de thesi quavis Medica, prius a Professore Regio approbata, publice intra Scholarum præcinctus coram Professore Regio recitare, eique ejusdem dissertationis exemplar, finita lectione, tradere tenebitur.

Denique, ad tollendam omnem dubitationem, pronunciamus quod omnes qui in Medicina inceperint, eodem suffragandi jure gaudeant, ac si in Artibus aliquando rexissent.

§. 7. *De incorporandis sive Medicinæ studiosis, sive Graduatiss.*

STATUTUM est, quod unusquisque sive Graduatiss in Medicina, sive studiosus, ex alia Academia hic incorporandus, priusquam in matriculam hujus Academiæ referatur, testimonia coram Vice-Cancellario exhibeat, quibus liquido pateat eum exercitia præstitisse omnia, quæ in sua Academia nondum Graduatiss pro Baccalaureatu in Artibus præstare tenentur. Cautum sit insuper nequis in Medicina Graduatiss incorporetur, nisi examen prius subierit, tempus compleverit, et reliqua præstiterit omnia, quæ per præsens hoc Statutum requiruntur.

SECTIO VI.

De Tempore et Exercitiis requisitis ad Gradus
in Theologia capessendos.

§. 1. *Quot anni, in audiendo publico Theologiæ
Professore ponendi, requirantur ad Gradum
Baccalaurei in S. Theologia.*

STATUTUM est, quod, qui S. Theologiæ dat
operam, antequam Baccalaureatum in illa Fa-
cultate consequatur, Gradum Magistri in Ar-
tibus suscipiat, et postquam in illa Facultate
inceperit, publicum S. Theologiæ Prælectorem,
per septennium completum (numerando a die
suæ admissionis ad regendum) audivisse te-
neatur.

§. 2. *Exercitia pro Gradu Baccalaurei in S.
Theologia præstanda.*

STATUTUM est, quod is, qui ad Gradum
Baccalaurei in S. Theologia promoveri cupit, pri-
usquam Gratiam proponat, bis in disputationibus
Theologicis pro Forma Opponentis principalis, (id
est, primo vel secundo loco disputantis,) munere
perfunctus fuerit, et semel per duas horas in
Schola Theologica pro Forma responderit.

Quodque ante hujusmodi Disputationes, Quæ-
stiones, una cum nominibus Opponentium et Re-
spondentis, per septem dies integros significen-
tur, programmata affixo valvis utriusque exte-
rioris portæ Scholarum, ac insuper muris Col-
legii Omnium Animarum, et Oriel, qua Australis
et Occidentalis parietes plateam versus in angu-
los coeunt.

Insuper statutum est, quod nemo ad Gradum Baccalaurei in Sacra Theologia admittatur, nisi qui in sacrum Presbyterorum ordinem prius fuerit admissus: qua de re Literas Testimoniales ab Episcopo, qui manus ei imposuerit, pro more concessas, vel saltem Certificatorium Registrarii Dioceseseos chirographo munitum, Vice-Cancellario, coram Congregatione Magistrorum regentium, exhibere teneatur.

§. 3. *Quot anni, in audiendo publico Theologiæ Professore ponendi, requirantur ad incipiendum in S. Theologia.*

STATUTUM est, quod, qui ad Doctoratum in S. Theologia aspirat, post susceptum Baccalaurei in Theologia Gradum, per quatuor annos integros publicum Theologiæ Prælectorem audiat, priusquam ad incipiendum in eadem Facultate admittatur.

§. 4. *Exercitia pro Gradu Doctoris in Sacra Theologia præstanda.*

STATUTUM est, quod Baccalaureus S. Theologiæ, antequam ad incipiendum in eadem Facultate admittatur, publice in Schola Theologica, ab hora prima usque ad secundam, Latine solenniter sexies legat, et explicet quamcunque velit S. Scripturæ partem: vel aliquam ex istis, quæ sequuntur, Apostolicis Epistolis, scilicet ad Galatas, vel unam aliquam ad Timotheum, vel Titum, vel unam S. Petri, tribus scilicet cursoriis Lectionibus ad minimum, explicet. Priusquam vero vel solenniter vel cursorie legere exordietur, tempus quo lecturus est, et subjectum de quo leget, ante tres dies signifi-

cabit, programmate affixo valvis utriusque exterioris portæ Scholarum, ac insuper muris Coll. Omnium Animarum, et Oriel, qua Australis et Occidentalis parietes, plateam versus, in angulos coeunt.

SECTIO VII.

Quomodo et unde computandum sit Tempus singulis Gradibus capessendis præstitutum.

QUONIAM Tempus singulis Gradibus capessendis præstitutum, alias Annorum, alias Terminorum numero, in his ipsis Statutis exprimitur, (ne qua inde cavillandi ansa subministretur,) præsentis Statuto cautum est, quod ubicunque tempus Gradui cuivis præstitutum per Annos computatur, eadem temporis Mensura in Terminos resoluta (singulis Annis quatuor Terminos deputando) præstituta esse intelligatur. Utpote, ubi tres Anni requiruntur, duodecim Termini; ubi quatuor, sedecim Termini intelligendi sunt; et sic in cæteris.

Insuper in iis Gradibus, qui a non Graduatis primo suscipiuntur, Tempus hujusmodi Gradui præstitutum a tempore Matriculationis computandum est: quod si quis Vacationis tempore matriculetur, a Termino Matriculationem suam sequente Terminos ad Gradum requisitos computabit.

In iis vero Gradibus, qui a Baccalaureis cujuslibet Facultatis capessuntur, a tempore præsentationis ad Gradum Baccalaurei in eadem Facultate:

In iis tandem Gradibus, qui Gradum Magistralem præsupponunt, e tempore admissionis ad regendum, computandum erit tempus.

Denique, quoniam haud pauci singulis Terminis, unum aut alterum Diem in Universitate commorantes, Officio suo et Statutis satisfecisse, et vel sic Terminos ad Gradum requisitos complevisse, se putant; Statutum est, quod nemo qui nondum Gradum aliquem adeptus fuerit, sive Collegii alicujus, sive Aulæ, fuerit Scholaris, Terminos ad Gradum suum requisitos complevisse reputandus sit, nisi qui singulis Terminis Michaelis et Hilarii per sex Septimanas, singulis autem Terminis Paschatis et Trinitatis per tres Septimanas, in Universitate commoratus fuerit. Excepto semper Termino, in quo quis Gradum suscepturus est; cujus primus Dies, juxta receptam antiquitus consuetudinem, habetur pro Termino completo. Excepto etiam Termino, in quo quis primum ad Academiam accedens matriculatur, cujus ultimus dies pro integro Termino reputatur.

Proviso semper, quod Baccalaurei Facultatis Artium Terminos ad Gradum Magistralem requisitos complevisse reputandi sint, si Terminis singulis, Michaelis, Hilarii, Paschatis, et Trinitatis, per tres Septimanas in Universitate commorati fuerint: eadem etiam Lex esto Studiosis in Jure Civili postquam duodecim Terminis, præter Terminum Matriculationis suæ, per Septimanas supra requisitas, in Universitate commorati fuerint, et (si examinari debuerint) Examen Publicum pro Gradu subierint.

TITULUS IX.

De Congregationibus Magistrorum Regentium.

SECTIO I.

De tempore et negotiis Congregationum, et de personis ad eas spectantibus.

§. I. *De Tempore Congregationum habendarum.*

UT Universitatis negotia, cum quæ ad gratias et Gradus spectant, tum alia, cum deliberatione et consilio mature expediantur; statutum est, quod, pro more antiquo, in principio cujusque Termini, Congregatio Magistrorum Regentium celebretur, quæ pro arbitrio Vice-Cancellarii a die in diem continuetur, et in ultimo cujusque Termini die dissolvatur. Quodque, quoties continget Congregationem celebrari, per pulsationem magnæ campanæ, statim post horam nonam ante meridiem, denunciatur. A cujus pulsationis cessatione, Dominus Vice-Cancellarius, Procuratores, et Magistri Regentes accedant, seque ad congregationem celebrandam accingant. Et præeunte Vice-Cancellario, et Procuratoribus, habitibus Gradui competentibus; altero Bedellorum submisso proclamante, *Intretis in Congregationem, Magistri, intretis*, omnes Domum Congregationibus destinatum ingrediuntur, ubi causa Congregationis tunc habendæ per Vice-Cancellarium exposita, ad expedienda negotia debite procedant.

§. 2. *De negotiis in Domo Congregationis tractandis.*

ORDINATUM est, quod, prout ab antiquo fieri consuevit, in venerabili Congregatione Magistrorum Regentium, gratiæ sive supplicationes eorum, quos ad Gradus Scholasticos promoveri par est, proponantur, et concedantur. Item, ut dispensationes, in quibus Congregationi per Statuta dispensare licebit, petantur. Deinde, ut digni et idonei ad Gradus Scholasticos præsententur, et admittantur. Item, ut ab aliis Academiis commendati incorporentur; et, pro more consueto, viri conditionis et eruditionis spectatæ, in singulis Facultatibus licentientur; iidemque atque alii, si opus fuerit, literis testimonialibus commendentur; et multa alia de quibus venerabili huic Congregationi decernendi hactenus potestas fuit, cum matura deliberatione et iudicio expediuntur.

§. 3. *De personis ex quibus constat Congregatio; et penes quos sit potestas negandi quæ proponuntur.*

ORDINATUM est etiam, quod, prout de more antiquo observatum fuit, Congregatio Regentium consistat e Cancellario sive Vice-Cancellario, et duobus Procuratoribus, vel eorum Deputatis, et Magistris necessario, atque etiam ad placitum Regentibus. Quodque nihil in hac venerabili Congregatione decernatur, cui Cancellarius sive Vice-Cancellarius, vel ambo Procuratores, sive eorum Deputati, vel major pars Magistrorum necessario, et ad placitum Regentium, qui interfuerint, (quorum numerum no-

venario minorem esse non oportet,) consensum non adhibuerint; sed pro non concesso habeatur, si vel Vice-Cancellarius, ejusve Deputatus, vel ambo Procuratores, eorumve Deputati, vel major pars Magistrorum necessario et ad placitum Regentium, dissenserint. Præterquam in electionibus, quas liberas esse volumus, secundum antiquam consuetudinem, per majorem partem omnium suffragantium.

§. 4. *De Magistris necessario Regentibus.*

DECRETUM est, quod, quolibet anno, de more recepto, statim post finita Comitia, Magistri in Artibus, necnon Doctores in S. Theologia, Medicina, et Jurisprudencia, in die solennis suæ creationis, petant, sive supplicent, ut in Domum Congregationis admittantur, et ad suam in Facultatibus Regentiam, hoc est, ad omnes et singulos actus necessariæ suæ Regentiæ exercendos, ante tertiam Congregationem (nisi grave aliquod crimen, unde Universitati scandalum oriatur, alicui aut aliquibus eorum objiciatur) admittantur; quodque, si ulterius differantur, licitum sit Cancellario, aut ejus locum tenenti, eosdem in Domum Congregationis accersere; et ibidem eosdem propria auctoritate admittere.

Qui Magistri et Doctores, necessario Regentes per integrum biennium habeantur, nisi (post alios Magistros et Doctores in Comitibus proxime sequentibus creatos, et pari modo in Domum Congregationis ad regendum admissos) cum ipsis pro secundo Regentiæ suæ anno (prout de more fieri solet) gratiose dispensetur.

§. 5. *Formula admittendi Magistros ad regendum.*

A MAGISTRIS, et Doctoribus singulis (tametsi antea rexerunt in Artibus) ad Regentiam admittendis, Procurator senior, sub hac verborum forma juramentum exiget.

“ Magister, tu jurabis quod in negotiis omnibus tractandis tam in hac Domo Congregationis quam in altera Domo Convocationis, bene et fideliter, ad honorem et profectum Universitatis, te geres.

“ Et specialiter, quod in negotiis quæ ad Grantias et Gradus spectant, non impedies dignos, nec indignos promovebis.

“ Item quod in Electionibus habendis unum aliquem, et unum tantum, semel (et non amplius, in singulis scrutiniis scribes et nominabis; et quod neminem nominabis, nisi quem habilem et idoneum certo sciveris, vel firmiter credideris.”

Quo juramento a singulis præstito, Vice-Cancellarius eosdem sic admittat: *Magister, Ego admitto Te in hanc Domum Congregationis, nec non in alteram Domum Convocationis.*

Deinde, ratione hujus admissionis persolvat quilibet Magister in Artibus, Bedello Facultatis suæ 4d. et Doctor 1s. ad eleemosynam, et usum pauperum, secundum discretionem Vice-Cancellarii et Procuratorum distribuendos. Insuper, quilibet in Artibus Magister (quoniam ab admissione sua ad regendum, computandum est tempus, ad ultiores Gradus in Facultatibus capessendos requisitum) solvet Registrario, admissionem suam in registrum referenti, 1s.

§. 6. *Qui sint Magistri Regentes ad placitum.*

MAGISTRI Regentes ad placitum, prout moris fuit antiqui, habeantur, qui ante aliquando rexerunt; Professores scilicet et Lectores publici, tam Regii, quam alii. Item Doctores omnes cujuscunque Facultatis, in Universitate residentes: necnon omnes Collegiorum et Aularum Præfecti, qui aliquando rexerunt in Artibus, iisque absentibus, eorum Deputati; item Magistri Scholarum; et quicumque in privatis Collegiis Decanorum vel Censorum munus obeunt: omnes insuper Magistri (durante secundo Regentiæ suæ anno), quibuscum, post finitum primum necessariæ Regentiæ annum, pro secundo Regentiæ suæ anno dispensatum fuerit.

SECTIO II.

De Examinandis Graduum Candidatis.

§. 1. *De Examinatoribus designandis, et juramento onerandis, per Seniores Procurores.*

QUO innotescat certius Congregationi Regentium eruditio et in bonis literis progressus eorum qui primum sibi Gradum, sive in Artibus, sive in Jure Civili, petunt; Statutum est, quod unusquisque nondum Graduatius, antequam ad supplicandum pro Gratia admittatur, examen subeat.

Compluribus autem de causis, præsertim in hac juvenum Academicorum frequentia, unde plus æquo et curæ et laboris, cum gravi temporis dispendio, Examinatoribus imponi vidimus, placuit Academiæ Statuta de ista re A. D. 1825 et A. D. 1826 condita abrogare, et præsens Statutum in eorum locum subrogare.

In posterum septem sunt **Examinatores Publici**, quorum omnium et singulorum munus erit **Candidatos** qui primum sibi **Gradum** sive in **Artibus**, sive in **Jure Civili** petunt, in **Literis Humanioribus** examinare. Qui tamen **Examinatores**, ut de uberiore **Candidatorum** quorundam tum in **Literis Humanioribus**, tum in **Disciplinis Mathematicis et Physicis** profectu exactior fiat perscrutatio, in duas tandem **Scholas** distribuendi sunt; quatuor scilicet in **Scholam Literarum Humaniorum**, tres itidem in **Scholam Disciplinarum Mathematicarum et Physicarum**. Hi vero **Examinatores Publici** sint ex eorum numero qui vel aliquando in **Artibus** inceperint, vel **Baccalaureatu** saltem in **Jure Civili** insigniti fuerint, per **Vice-Cancellarium** et utrumque **Procuratorem**, ex ipsorum consensu, nominandi, et deinceps a **Venerabili Domo Convocationis** pariter ac **Congregationis** approbandi; ita ut prima nominatio penes **Vice-Cancellarium** sit, secunda penes **Procuratorem Seniores**, tertia penes **Procuratorem Juniores**; et hic ordo nominationum in perpetuum servetur. Et ut omnia in hoc negotio cautius fiant et integrius, ista nominatio primum quidem in **Congregatione Domui** significetur; deinde in proxima **Congregatione Examinatorum** **Nomina** sigillatim suffragiis **Regentium** permittantur; et tandem post tres dies in frequenti **Convocatione**, eodem modo, a **Domo** approbanda demum, seu improbanda, proponantur. Cauto semper, quod hæc **Examinatorum** designatio ita fiat, ut duo **Examinatores** ex eodem **Collegio**, vel **Aula**, nunquam in eadem **Schola** simul existant.

Ex hisce **Examinatoribus** officio suo cedant quotannis duo in **Schola Literarum Humaniorum**; in **Schola** autem **Disciplinarum Mathema-**

ticarum et Physicarum alternatim vel unus vel duo, prout res exegerit, ii nempe qui priores ad officium suum nominati fuerint; ita ut e numero septenario cuique Examinatori post exactum biennium officii sui sit terminus. Subrogentur autem in eorum locum tot alii quot ad numerum septenarium explendum sufficiant, a Vice-Cancellario, et Procuratoribus, modo et ordine supra definitis, nominandi, et sub forma etiam supra definita, a Venerabili Domo Convocationis pariter et Congregationis approbandi.

Proviso semper, quod nemo, qui Examinatoris officio per biennium integrum functus fuerit, eodem officio in eadem Schola, nisi post annum elapsum, iterum fungatur.

In proximo tamen post statutum hocce conditum anno, donec eo res processerit ut Examinatores suo quisque ordine vicissim cedant, junioris erit loco cedere, nisi aliter Examinatores inter se statuunt.

Examinatores singuli, si modo in Artibus vel in Jure Civili inceperint, intra Scholarum præcinctus, singulis diebus EXAMINATIONIS, Procuratoribus absentibus, Procuratoria auctoritate muniantur, atque insuper durante officio suo (sicut Magistri Scholarum) sint Regentes ad placitum. Omnes autem et singuli in Domo Congregationis, antequam munus suum ineant, per Seniores Procuratorem juramento onerentur, in hæc verba:

Domine Doctor, vel Magister, vel Domine, tu jurabis, quod munus et officium Examinatoris Publici sedulo et fideliter pro virili exequeris, forma et modo per Statuta requisitis. Resp. Juro.

Item tu jurabis, quod, sepositis omni odio et

amicitia, timore et spe, neque indigno cuius testimonium perhibebis, neque digno denegabis, et quod in Scheda Candidatorum ordinanda classem unicuique secundum merita sua assignabis, et neque indignum aliquem admittes, neque dignum repudiabis. Resp. Juro.

Item tu jurabis, quod nullo modo revelabis suffragium quod vel ipse tuleris, vel alius quis Examiner tulerit, in iudicio de Candidatorum meritis pronunciando. Resp. Juro.

§. 2. De EXAMINATIONIBUS habendis, et de Candidatorum admissione.

EXAMINATIONIBUS habendis assignentur Terminus Michaelis et Terminus Paschatis, a secundo scilicet die mensis Novembris, et a die Veneris Dominicam secundam post Festum Paschatis proxime sequente, respective inchoandis. Quod si forte initium alicujus EXAMINATIONIS in diem Festum inciderit, inchoatio ejusdem in diem immediate sequentem differatur.

Qui autem in alterutro horum Terminorum examen subituri sunt, nomina sua vel per se, vel per Tutores suos, coram Procuratore Seniore profiteantur, in Registro peculiari penes Procuratorem Seniore asservato, et in Terminos hosce rite distributo, inserenda: quo etiam tempore, tenebitur unusquisque Candidatus Schedulam chirographo suo munitam rerum et librorum in quibus sese examinandum profitetur, Procuratoris in manus tradere; hac tamen lege, nequis serius quam sexto die ante EXAMINATIONEM inchoandam Procuratorem de his rebus adeat.

Proviso semper, quod nemini examen suum cedat pro forma, qui se examinandum sistet ante in-

choatum a tempore Matriculationis suæ quartum annum^a; exceptis iis quibus indulget Academia, ut integrotriennio in studiis Academicis completo ad Gradum promoveantur^b. Hisce omnibus licebit post inchoatum tertium annum, a tempore Matriculationis suæ computandum, examen subire.

Nemo autem ad examen subeundum admittatur, nisi qui Quæstionibus Magistrorum Scholarum in Parviso pro forma responderit.

Nemo etiam ad examen subeundum admittatur, nisi qui uno die ad minimum EXAMINATIONI Publicæ per integrum tempus interfuerit: proviso tamen, quod Candidati honorem aliquem in Disciplinis Mathematicis et Physicis ambituri, Examinationi in Schola Mathematices interfuerint necesse sit. Et quo unumquemque huic Statuto satisfecisse liquido appareat, Examinationis cui interfuerit dies in registro quodam peculiari notetur; et Testimonium ei perhibeatur ab uno Examinatorum sub hac forma:

A. B. Examinationi Publicæ in Literis Humanioribus per integrum tempus interfuit.

(die mensis et anni) *Ita testor C. D. Examinator Publicus.*

Vel,

E. F. Examinationi Publicæ in Disciplinis Mathematicis et Physicis per integrum tempus interfuit.

(die mensis et anni) *Ita testor G. H. Examinator in Disciplinis Math. et Phys.*

Quod quidem Testimonium, atque insuper Testimonium RESPONSIONIS suæ in Parviso sub Chirographo duorum e Magistris Scholarum,

^a Vide Tit. VI. Sect. VII. ^b Vide Tit. VI. Sect. I. §. 1.

quilibet Candidatus per se vel per Tutorem suum coram Seniore Procuratore teneatur exhibere, eo ipso tempore quo et nomen suum inter Candidatos profitetur; neque licebit Procuratori, Testimoniis istis non exhibitis, aliquem in Candidatorum numerum referre.

Procurator autem Senior, ubi tandem, modo supra præscripto, de iis omnibus, qui sese Candidatos in Termino aliquo profiteri velint, certior factus fuerit, tenetur statim nomina eorum in Schedulam referre, serie Alphabetica; deinde Schedulam istam Chirographo suo munitam et typis mandatam sub hoc titulo [*Nomina Examinandorum Termino A. D.*] ad Vice-Cancellarium, ad singulos Collegiorum et Aula-
rum Præfectos, ad Procuratorem Juniorem, ad singulos Examinatores, et ad cujuslibet Collegii vel Aulæ Refectorium tam publicum quam privatum Magistrorum deferri, et ostiis etiam Bibliothecæ Bodleianæ, Scholæ Metaphysices, et Apodyterii Venerabilis Domus Convocationis affigi, curabit: quæ omnia ita agenda sunt, ut quatuor dies integri inter Schedulam hanc publici juris factam et EXAMINATIONEM inchoandam interjiciantur.

Et hæc Scheda Procuratoria, modo et forma præscriptis publicata, pro licentia, monitione, et notificatione generali, tam ab ipsis Examinatoribus, quam a Candidatis, habenda et accipienda est.

Insuper ad Examinatorem in Literis Humanioribus Seniore Schedulas rerum et librorum, in quibus unusquisque Candidatus sese examinandum profitetur, Procurator Senior eodem tempore deferri curabit.

§. 3. *De Materie, Loco, Forma et Modo*
EXAMINATIONIS.

Instituatur EXAMINATIO in RUDIMENTIS RELIGIONIS, in LITERIS HUMANIORIBUS, et in MATHEMATICARUM SCIENTIARUM et PHYSICES ELEMENTIS.

Præ cæteris omnibus primum sibi locum vindicant RELIGIONIS RUDIMENTA. Meminerint Examinatores, et hanc sibi sanctam habeant juramenti sui interpretationem, defectum in hac re nullis aliis quibuscunque Candidatorum meritis compensari posse, ita ut qui in gravissima hac materie Examinatoribus non satisfecerit, nullum omnino Testimonium obtineat.

Adhibentor semper S. S. Evangelia Græca, e quibus locus aliquis Candidato interpretandus proponatur, et Quæstiones ex ista interpretatione oriundæ, necnon ex Historia tam Veteris quam Novi Testamenti, excutiantur.

Adhibentor etiam Doctrinæ Articuli in Synodo Londini anno 1562 editi; in quibus, juxta Academiæ Statuta, a Tutoribus instituendi sunt omnes qui illorum tutelæ committuntur^c. De ipsis Dogmatibus breves sunt et dilucidæ Quæstiones; deinde ad locos S. S. Scripturæ provocetur, ex quibus Dogmati isti de quo agitur fides præcipue adstruenda sit.

Porro et Evidentiæ quas vocant, sive argumenta quibus innitur Religionis tam Naturalis quam Revelatæ veritas, ab hac EXAMINATIONE nequaquam alienæ censendæ sunt.

Per LITERAS vero HUMANIORES intelligimus,

^c Vide Tit. III. §. 2.

non tantum Linguas Græcam et Latinam, sed et Historias Græcam et Romanam, eas videlicet quæ antiquæ habentur, Rhetoricam quoque et Poeticam, Moralem insuper et Politicam Scientias, quatenus a Scriptoribus veteribus derivandæ sint, quas tamen aliquando, prout expedire videbitur, ex neotericorum scriptis illustrari permittimus. Dialecticam itidem hisce Literis adnumeramus; atque in eadem profectum laudabilem ad Classem primam, secundam, aut tertiam in Literis Humanioribus consequendam aliquid momenti habere volumus.

Adhibentor igitur tres ad minimum Scriptores Græci et Romani, melioris ævi et notæ.

Examinatoribus insuper explorandum incumbit, qua quisque polleat facultate animi sui sensa lingua Latina explicandi. Id quod explorare poterunt, porrecto aliquo libro, lingua vernacula conscripto, e quo oblatum quemcunque locum lingua Latina reddere Candidatus quisque tenetur; aut alio quocunque demum modo, quo sibi commodius satisfacturos Examinatores probabile sit.

Cæterum quod ad LITERAS HUMANIORES et MATHEMATICARUM SCIENTIARUM et PHYSICES ELEMENTA attinet, Examinatoribus liberum esto quemlibet Candidatum vel in hisce universis, vel in aliqua parte horum, (prout ipsis satius visum fuerit,) examinare; modo ut tres isti Scriptores Græci et Romani semper adhibeantur. Proviso insuper, quoad Candidatos omnes Classem primam, secundam, aut tertiam, vel in Literis Humanioribus vel in Disciplinis Mathematicis et Physicis ambientes, ut Dialecticæ ratio nunquam non habeatur. Quod ad cæteros attinet, Examinatoribus liberum esto Candida-

tum quemlibet vel in Dialectica, vel in quatuor ad minimum Euclidis Geometriæ libris, examinare.

Nihil vero triste aut asperum molimur. Lenitati ubique consultum volumus, modo ne ea sit, quæ Juniorum socordiæ patrocinari videatur. Nemo igitur non dignus testimonio habeatur qui in materie Examinationis modo præscripta satisfecerit Examinatoribus. Meminerint tamen Examinatores quod nemini cujuslibet rei causa, vel perhibeant vel denegent testimonium, nisi in quantum profectus sui tum in Religionis Rudimentis, tum in Literis Humanioribus documenta inter ipsum Examen præstiterit. Proviso semper, quod non licebit cuivis Examinatori Candidatum aliquem ex eadem Domo ex qua sit ipse examinare.

EXAMINATIONIBUS habendis assignentur Schola Metaphysices et Schola Musices. Liceat tamen Vice-Cancellario et Procuratoribus, cum consensu Ven. Domus Congregationis, locum aliquem alium vel plures, si opus fuerit, assignare, modo de hac re Academiam triduo ante certiozem fecerint.

Postquam igitur Examinator in Literis Humanioribus Senior Schedulas istas rerum et librorum, in quibus Candidatus unusquisque sese examinandum profitetur, a Procuratore Seniore acceperit, protinus reliquos Examinatores sibi adsciscat, quo facilius, istarum Scedularum ratione habita, Candidati omnes in duplicem seriem referantur. In primam scilicet referantur ii, qui nullum, in alteram, qui aliquem locum in tribus Classibus superioribus in Schola Literarum Humaniorum ambire videantur. Quam quidem seriem duplicem, manu scriptam, Examinatorum omnium chirographo munitam, et

in Scholis adservandam inspiciendi Candidatis, si quando opus fuerit, facultas detur.

Terminis autem Michaelis et Paschatis, diebus supra præscriptis, hora decima matutina in Scholas publicas se conferant septem illi Examinatores, atque ibi, prout inter ipsos convenit, tres in Schola Metaphysices, tres itidem in Schola Musices, de die in diem EXAMINATIONI continuam operam impendant. Qui superest Examinator, pro re nata, Candidatis, dum ab iis aliquid sit in scriptis præstandum, invigilet. Dein sex illi Examinatores, quorum tres in utraque Schola uniuscujusque diei Examinationi adesse volumus, Candidatos in primam seriem antehac relatos statim ad examen subeundum citent. Eo veruntamen et numero et ordine citatos examinent, quo, cum majore operæ compendio, se officio suo satisfacturos fore arbitrentur.

Inter examinandum vero si quis Candidatus ita sese commendet ut honore aliquo in Literis Humanioribus dignus esse videatur, idem, a tribus istis Examinatoribus in utraque Schola, vel statim in quartam Classem postea typis mandandam referatur; vel, si id velint Examinatores et consentiat ipse, cum cæteris in alteram seriem relatis ad amplius et honorificentius examen subeundum admittatur: sub ea tamen lege, ut questionum jam antea ab illo enucleatarum ratio habeatur, et tandem, peracto illius examine, si laude insigniore parum dignus reperiatur, in quarta Classe locum omnino sibi vindicet.

Peracta demum eorum Examinatione qui in primam seriem fuerint relati, deinceps ad reliquos examinandos procedatur. Horum Exami-

nationi quatuor illos in Literis Humanioribus Examinatores adesse atque operam impigram impendere volumus; nisi quis propter infirmiorē valetudinem, aut aliam causam perurgentem, a Vice-Cancellario et Procuratoribus absentiae veniam sibi impetraverit.

Ad examen subeundum ordine priores citentur ii, qui sese in Schola Mathematices examinandos sistere velint; postea reliqui, eo verumtamen et numero et ordine, quo cum facilius tum accuratius Examinatores cujusque ingenium et eruditionem se exploraturos et perspecturos judicent. Iisdem enim quæstionibus excutiendis, iisdem locis e Scriptoribus antiquis et nostratibus Græce, Latine, Anglice, pro rei ratione, reddendis, vel alio quocunque demum modo, Examinatoribus licebit complures simul pertentare. Et ut hæc Examinationis pars cautius et integrius peragatur, quæstiones istæ, et res, quæcunque in scriptis disserendæ Candidatis proponantur, omnium et singulorum Examinatorum si commode fieri poterit, iudicio subjiciantur et approbentur. Quinetiam si propter loci angustias, vel quamcunque ob causam expedire videatur, Candidati ad scribendum in aliam Scholam seorsim transferantur, vel, si res aliter effici nequeat, cæteri Examinationis labores intermittantur. Candidatis vero inter scribendum unus saltem e septem Examinatoribus semper intersit et invigilet.

- In omni EXAMINATIONE, quilibet Candidatus pridie ante ejus examen habendum chartis monitoriis Examinatoris chirographo munitis per Ædituum Universitatis citetur. Si vero quis ad examen subeundum nominatim citatus non responderit, nisi ex causa rationabili per Vice-Cancellarium approbanda, omni loco in EXAMINA-

TIONE istius Termini privetur; neque ad aliam aliquam EXAMINATIONEM tanquam Candidatus admittatur, nisi iterum coram Procuratore Seniore nomen suum professus fuerit; et citetur proximus Candidatus, sub eadem lege, et sic deinceps. Quod si Vice-Cancellarius causam aliquam absentiae ratam habuerit, alius locus in Scheda pro arbitrio Examinatorum isti Candidato assignetur.

Candidati uniuscujusque examen a Religionis Rudimentis inchoatum, viva voce omnino, si fieri poterit, quatenus ad gravissimam hanc materiam attinet, peragendum est. Porro ita continuandum volumus examen, ut in iis etiam quæ supersint saluberrimus ille viva voce examinandi modus nunquam non obtineat.

Unoquoque autem die ubi visum fuerit Examinatoribus nullum alium Candidatum isto die examinare, palam declaret Examinator Senior diem EXAMINATIONI continuandæ destinatum. Et post finitam uniuscujusque diei Examinationem alii omnes Schola excedant præter ipsos Examinatores, qui de Candidatis inter se iudicium ferant, ac quemcunque dignum invenerint, ei Testimonium perhibeant sub hac forma:

A. B. [die mensis et anni] *examinatus prout Statuta requirunt, satisfecit nobis Examinatoribus.*

Ita testamur $\left\{ \begin{array}{l} C. D. \\ E. F. \\ G. H. \end{array} \right\}$ *Examinatores.*

vel

Ita testamur $\left\{ \begin{array}{l} I. K. \\ C. D. \\ L. M. \\ E. F. \end{array} \right\}$ *Examinatores
in Literis
Humanioribus.*

Quod si forte contingat aliquem hujusmodi Testimonio indignum reperiri, licebit tamen illi in sequente alicujus Terminis EXAMINATIONE Candidatum se iterum profiteri.

Interea vero, statim post confectam in Literis Humanioribus Examinationem eorum qui in Disciplinis Mathematicis et Physicis honorem ambiant, Candidatorum omnium quorumcunque nomina, qui in Schola Mathematices honorem aliquem ambientes in Literis Humanioribus satisfecerint Examinatoribus, in novam Schedulam referantur. Quam quidem Schedulam Examinator in Literis Humanioribus Senior suo chirographo munitam ad Mathematicos Examinatores eodem die deferri curabit sub hoc titulo: *Nomina Examinandorum in Disciplinis Mathematicis et Physicis.*

Examinatores autem Mathematici, post Schedulam istam ad se delatam, diem publicæ Examinationi in istis disciplinis intra viginti et duos dies habendæ constituent. De eo autem Academiam certiore faciant Scheda monitoria ad Collegiorum et Aularum Præfectos deferenda, et ad portam insuper Refectorii vel Promptuarii cujusque Collegii et Aulæ affigenda, sub hac forma:

Examinatio Publica in Disciplinis Mathematicis et Physicis die habenda est.

*A. B. } Examinatores in Disciplinis
C. D. } Mathematicis et Physicis.
E. F. }*

Die autem constituto in locum Examinationi Mathematicæ assignatum se conferant Examinatores, ibique hujusmodi Candidatos modo præ-

finito pridie citatos pro re nata examinent, et post finitam uniuscujusque diei Examinationem de illorum meritis privatim inter se iudicium ferant.

Tres Examinatores Mathematicos uniuscujusque Candidati examini omnino operam impigram impendere volumus: Statuimus etiam, quod in his quoque disciplinis Examinatio non in scriptis solummodo, sed, quantum commode fieri poterit, viva voce agatur. Si vero post examen viva voce peractum, supersit aliquod scriptis a quolibet Candidato præstandum, unus ex his Examinatoribus (absentiæ vicibus juxta Senioritatem, nisi aliter ipsis visum fuerit, inter se constitutis) in Schola semper adesse teneatur.

Quod si quis e tribus Examinatoribus Mathematicis propter infirmiolem valetudinem aut aliam causam perurgentem, a Vice-Cancellario et Procuratoribus absentiae veniam sibi impetrauerit, alius ex nominatione Vice-Cancellarii et Procuratorum a Ven. Domo Convocationis approbandus pro hac vice in illius locum substituat. Nemini tamen istiusmodi venia ultra unam EXAMINATIONEM prorogetur.

Liceat vero Examinatoribus tum in Literis Humanioribus, tum in Disciplinis Mathematicis et Physicis, in omni hoc Examinationis negotio aut Latino aut Anglicano idiomate uti; et quæcunque Candidati in scriptis præstiterint, ea etiam extra locum Examinationis inspicere et perpendere.

Continuetur autem Examinatio in unaquaque Schola (donec de omnibus Candidatis provisum fuerit) de die in diem, nisi ob causam aliquam rationabilem Examinatoribus aliter visum fuerit;

quo in casu monentur Examinatores, ut de die quem continuandæ EXAMINATIONI destinaverint Academiam certiozem faciant. Schedula monitoria ad Collegiorum et Aularum Præfectos deferenda, ad portam insuper Refectorii vel Promptuarii cujusque Collegii et Aulæ, et ad portam Scholæ Metaphysices per Ædituum Universitatis ad minimum ante meridiem diei præcedentis affigenda. Formula vero Schemulæ hæc esto :

Examinatio publica die habenda est.

A. B.

C. D.

E. F.

Hora autem decima matutina in Examinatione uniuscujusque diei incipienda semper servetur. Excepto quod in die aliquo festo Examinatio non incipiatur nisi post con sionem publice coram Universitate habitam.

Peracta demum in utraque Schola EXAMINATIONE, Examinatores in ista Schola eo ipso die, si fieri potest, sin minus postridie, Candidatorum omnium nomina in Classes distribuant, et in Schemulam quandam, forma infra præscripta, redigant.

Classium vero Series duplex esto, quarum altera ad LITERAS HUMANIORES, altera ad MATHEMATICAS et PHYSICAS DISCIPLINAS pertinere censenda est.

Et qui vel in his vel in illis eo usque profecisse visi fuerint, ut insigniore aliqua laude digni censeantur, in PRIMAM ISTIUS SERIEI CLASSEM referendi sunt ; proximi his in SECUNDAM, in TERTIAM, aut in QUARTAM referantur, prout de

cujusque meritis judicium tulerint Examinatores. In Quintam vero Classem referendi sunt cæteri omnes qui Examinatoribus satisfecerint.

Forma autem Schedulæ hæc esto :

NOMINA CANDIDATORUM

TERMINO A. D.

QUI HONORE DIGNI SUNT HABITI,

IN UNAQUAQUE CLASSE SECUNDUM ORDINEM ALPHABETICUM DISPOSITA.

IN LITERIS HUMANIORIBUS.		IN DISCIPLINIS MATHEMATICIS ET PHYSICIS.	
CLASSIS I.	{ A. B. e Coll. C. D. e Coll. &c. &c.	{ A. B. e Coll. C. D. e Coll. &c. &c.	
CLASSIS II.	{ A. B. e Coll. C. D. e Coll. E. F. e Coll. &c. &c.	{ A. B. e Coll. C. D. e Coll. E. F. e Coll. &c. &c.	
CLASSIS III.	{ A. B. e Coll. C. D. e Coll. E. F. e Coll. &c. &c.	{ A. B. e Coll. C. D. e Coll. E. F. e Coll. &c. &c.	
CLASSIS IV.	{ A. B. e Coll. C. D. e Coll. E. F. e Coll. &c. &c.	{ A. B. e Coll. C. D. e Coll. E. F. e Coll. &c. &c.	
A. B. } C. D. } E. F. } G. H. }	Examinatores in Literis Humanioribus.	I. K. } L. M. } N. O. }	Examinatores in Disciplinis Mathe- maticis et Physicis.

SUMMA QUINTÆ CLASSIS,
SIVE CÆTERORUM OMNIUM QUI EXAMINA-
TORIBUS SATISFECERUNT.

XXXXX.

Nomina autem in quatuor superioribus Classibus respective, secundum ordinem Alphabeticum disponantur. Cauto semper, quod si Candidatus aliquis IN LITERIS HUMANIORIBUS non satisfecerit Examinatoribus, nullum omnino Testimonium aut locum in Scheda ista obtineat. Volumus etiam quod neque in Testimoniis perhibendis, neque in hac Scheda ordinanda, Examinator de Candidato quovis suffragium vel iudicium suum ferat, nisi cujus examini operam impigram impenderit.

Sin autem in Scheda hac ordinanda Examinatores pari utrinque suffragiorum numero in diversas sententias abierint, ea demum sententia rata esto, pro qua steterit Examinator Senior in alterutra Schola, modo ne sit ex eadem domo unde Candidatus ipse de quo agitur: in quo casu auctoritas simpliciter Senioris ad proxime Seniore transferenda est. Quæ quidem Senioritas hoc modo æstimanda est; scilicet, Doctorum, juxta Ordinationes Tit. XI. §. 2. Baccalaureorum vero in quavis facultate, pariter ac Magistrorum, juxta prioritatem præsentationis suæ sive ad Gradum Magistri in Artibus, sive ad Baccalaureatum in Jure Civili.

Denique hanc Schedulam, propriis omnium Examinatorum nominibus signatam, et typis mandatam, ad Dominum Cancellarium et Vice-Cancellarium, ad singulos Collegiorum et Aularum Præfectos, ad utrumque Procuratorem, necnon ad cujuslibet Collegii et Aulæ Refectorium, tam publicum quam privatum Magistrorum, Examinator Senior in Schola Disciplinarum Mathematicarum et Physicarum curabit deferri.

Attamen ne moræ aliquid Candidatorum justæ expectationi interponatur, volumus ut, priusquam hujus Schedulæ duplex et numeris omnibus absoluta series in lucem prodeat, eorum nomina vulgentur, qui in Literis Humanioribus Examinatoribus sese commendaverint. Idcirco, cujusque Termini peracta in Literis Humanioribus Examine, Examinator in ea Schola Senior, Schedulam eorum nomina complectentem qui honore aliquo digni in Classes juxta formam supra præscriptam relati fuerint, Examinatorum chirographis munitam, ad portam Scholæ Metaphysices, et ad portam Apodyterii Domus Convocationis affigi curabit.

§. 4. *De Officio ac Cura Vice-Cancellarii et Procuratorum circa EXAMINATIONES ; et de Examinatoribus remunerandis.*

QUO Statutum hoc de examinandis Candidatis in futurum sancte et inviolabiliter observetur, Ordinatum est, quod unicuique EXAMINATIONI Vice-Cancellarius saltem bis, Procuratores vero, singuli quater ad minimum, intersint, exploraturi utrum omnia rite et secundum Statuta peragantur.

Si quis vero Examinator vel fatis concesserit, vel se officio suo abdicaverit, vel (quod absit) in gravissimo hoc munere obeundo ita se gesserit ut, ex Vice-Cancellarii, vel amborum Procuratorum, sententia, ab officio suo amoveatur, tanquam qui neque Matris Academiæ dignitati, neque juramenti sui obligationi, satisfecerit ; alius in ejus locum, qui vices ejus suppleat in partem biennii nondum elapsam, forma et modo supra præfinitis, continuo subrogetur.

Et quo Examinatoribus accedant non modo Gratia, quas illis usque aget habebitque Academia maximas, sed et remunerationes quaedam pecuniariae, Statutum est, quod Candidatus unusquisque, cum inter examinandos refertur a Procuratore, persolvat xxi Solidos; et quod hae pecuniae (exceptis tribus Solidis, in Famuli Procuratoris usum, viritim pro numero examinandorum reservandis) a Procuratore ad Vice-Cancellarium deferantur; qui aliis insuper, quantum opus fuerit, e Cista Academica Pecuniis depromptis, (iis scilicet, quae per Decretum Convocationis anno 1802 sancitum ab Academicis exiguntur,) id semper curabit, ut unicuique Examinatori annua centum Librarum Pensio persolvatur.

Ordinatum est insuper quod Statutum hocce (excepto quod ad Examinatorum nominationem spectat) vim et vigorem suum obtinebit Termino Paschatis A. D. 1831.

Termino autem Hilarii proxime sequenti Examinatores, forma et modo supra praefinitis, nominentur; proviso quod Vice-Cancellario et Procuratoribus Examinatorem quemlibet auctoritate Statuti A. D. 1825 designatum nominare fas sit. Perpetuis vero futuris temporibus haec Examinatorum Publicorum nominatio Termino Hilarii in Congregatione post Diem Cinerum proxime habenda, et in prima Congregatione Termino Trinitatis, annuatim Domui significetur; et deinceps peragantur etiam reliqua quae ad illorum designationem spectant, prout superius ordinatum est. Et Examinatores sic designati Termino designationem suam proxime sequente munus suum inibunt.

Volumus insuper, quod Registrum peculiare penes Examinatores in Schola Metaphysices adseruetur, in quo eorum omnium qui Testimonium obtinuerint nomina unoquoque Examinationis die inserantur; ita ut, si in Congregatione Regentium de ista re quæstio aliquando oriatur, ad Registrum hoc perpetuo possit appellari.

Quoniam vero usu venit, ut dies et horas negotiis Academicis a Statutis destinatas mutare interdum commodius reperiatur, fas sit Venerabili Domui Congregationis, ex causa rationabili per Vice-Cancellarium approbata, diem aliquem aut horam hoc Statuto præscriptam pro Examinationibus habendis mutare. Proviso tamen, quod Vice-Cancellarius ante triduum Academiam certiores faciat, si quando hujusmodi rem ad Venerabilem Domum Congregationis referendam censuerit.

Denique, ad tollendam omnem dubitationem, expresse pronunciamus, quod examen nondum Graduati, virtute prioris alicujus Statuti habitum, effectum habeat Examinis pro primo Gradu præsentis Statuti auctoritate imperati. Quod vero ad Testimonia attinet quæ Candidati coram Procuratore Seniore exhibere tenentur priusquam nomina in Scheda Examinandorum inserantur, valeant ea quæ Auctoritate Statuti A. D. 1825 perhibita fuerint.

SECTIO III.

De Gratiis petendis.

§. 1. *Conditiones præviæ ad petitionem Gratiæ ex parte supplicis.*

STATUTUM est primo, ne cujusquam Gratia in Venerabili Domo Congregationis proponatur, nisi qui, eo ipso tempore, in matricula Universitatis nomen inscriptum habeat; et, a tempore matriculationis suæ, annos, ad primum quem ambit Gradum, requisitos compleverit; quique alicujus Collegii vel Aulæ alumnus censeatur.

Deinde requiritur, ut quilibet candidatus, sive pro Gradu aliquo supplicans, non solum sit probis moribus, et omnia ad Gradum requisita recte compleverit; verum etiam (si Gradum in Artibus capessat, vel in Jurisprudentia, secundum Statuta quorundam Collegiorum, antequam in Artibus inceperit) ut secundum Statuta debitum examen subierit, et ab Examinatoribus testimonium reportaverit, a Magistro Gratiam ipsius proponente, ante Gratiæ petitionem, vel a Magistro præsentante, (si candidatus pro Gratia non supplicet,) ante præsentationem, palam in Domo Congregationis recitandum.

Quodque inter supplicandum, suis duntaxat viribus et meritis nitatur; nec prece, nec pretio, nec muneribus aut promissis, pacto aut conditione, gratiam aut favorem cujusquam captet; nec Magnatum literis, ut quicumque sibi pro forma requisitum condonetur aut indulgeatur, satagat, cujusmodi ambitus si convictus fuerit,

eo ipso inhabilis ad omnem ulteriorem Gradum Scholasticum habeatur.

§. 2. *Conditiones proponendi Gratias.*

STATUTUM est, quod nemo Magistrorum Gratiam vel dispensationem quamcunque cujusquam pro Gradu supplicantis proponat, nisi fuerit ejusdem Collegii vel Aulæ, cujus is est qui supplicat; præterquam Procuratorum alter, vel alius, cui Vice-Cancellarius licentiam proponendi concesserit.

Cum vero Collegium unumquodque et Aulam moribus suorum invigilare oporteat, ac præ aliis cavere, ne qui indigni sunt Gradus ambire præsumant; Statutum est, quod nemo, quacunque de causa, Gratiam cujusquam in Domo Congregationis proponat, nisi prius Candidatum suum Gratiam pro Gradu quem ambit a Collegio suo, vel Aula sua, obtinuisse testatus fuerit sub hac forma :

Ego A. B. Decanus, vel Censor, Collegii, vel Aulæ, C. D. (vel Decani, aut Censoris, vicem-gerens) testor E. F. Gratiam a Collegio suo, vel Aula sua, pro Gradu G. H. concessam fuisse, fide mea data huic Universitati.

Statutum est insuper, quod nemo Gratiam cujusquam qui Examen subire debuerit unquam proponat, nisi prius Testimonium Examinatorum de Candidato suo palam in Domo Congregationis recitaverit. Neque Gratiam quamlibet cuiquam licebit proponere, nisi prius Decanus, vel Censor, Collegii sui, vel Aulæ, (*vel Decani, aut Censoris, vicem-gerens,*) Schedulam Chirographo suo munitam Vice-Cancellario exhibuerit, in qua certiore eum fecerit de redditibus annuis Candidati sui.

Ad hanc autem comparandam tenetur Candi-

datum quisque, Decano vel Censori suo, (*vel Decani aut Censoris vicem-gerenti,*) interroganti, utrum habeat beneficium vel beneficia Ecclesiastica ad valorem quadraginta librarum, aut alios redditus Ecclesiasticos, vel Civiles, sive in terris sive in pecuniis, ad valorem trecentarum librarum, per annum, (exceptis proventibus Academicis,) fide sua data huic Universitati, respondere, "Habeo," vel "Non habeo." Quod si respondeat se non habere, interrogabitur iterum, "an habeat redditus Ecclesiasticos ad valorem quinque solidorum, aut Civiles ad valorem quinque librarum, per annum?" cui respondebit, ut prius; et si fateatur se habere, solvet pro vino tantum. Hæ autem summæ quoad beneficia Ecclesiastica, non attenduntur penes verum et proprium rei æstimatæ valorem, sed penes primitias et censum Regium, inde in fisco Regis Henrici Octavi taxatas.

Formula vero Scedularum Vice-Cancellario exhibendarum esto :

Ego, A. B. Decanus, vel Censor, Collegii, vel Aulæ, C. D. (vel Decani, aut Censoris, vicem-gerens,)

Testor *E. F.*
 G. H.
 I. K.

fide sua data huic Universitati declarasse, se non habere redditus Ecclesiasticos ad valorem quinque solidorum, aut Civiles ad valorem quinque librarum, per annum, exceptis proventibus Academicis.

Testorque *L. M.*
 N. O.

fide sua data huic Universitati declarasse, se

non habere beneficium vel beneficia Ecclesiastica ad valorem quadraginta librarum, aut alios redditus Ecclesiasticos, vel Civiles, sive in terris, sive in pecuniis, ad valorem trecentarum librarum, per annum; exceptis proventibus Academicis.

A. B. Decanus, vel Censor, Coll. vel Aul. C. D.

Quod si sacris ordinibus initiatus non comorans fuerit, qui Gradum in aliqua e superioribus Facultatibus ambit, nemo Gratiam hujusmodi, sub pœna perjurii, proponere præsumat, nisi prius literas testimoniales ab Episcopo Dioceseos, ubi degit candidatus, signatas, de conformitate ipsius tum quoad doctrinam, tum quoad disciplinam in Ecclesia Anglicana receptam, palam in Domo Congregationis recitaverit. Ac postmodo e schedula quadam, formam sive tenorem Gratiæ continente, supplicantis nomen, necnon Collegii sive Aulæ, unde fuerit, exprimet. Et si non graduatus fuerit, cujus Gratia proponitur, quod per integrum tempus ad talem Gradum per Statuta requisitum, in eo Collegio vel Aula, (vel alio quopiam,) non in domo privata cujusquam victitaverit, et hospitatus fuerit.

Item, quod plures Gratiæ simul, seu confuse, eodem tempore non proponantur: sed uniuscujusque personæ supplicantis nomen et prænomen distincte ac divisim recitentur.

Item, quod eadem Gratia sæpius in eadem Congregatione non proponatur.

Item, quod Gratia sit vera, hoc est, vera intentione, et non animo deludendi, prolata vel petita. Et quod, proximis quibusque et immediate sequentibus Congregationibus, supplicationem sub

eadem forma continuet, donec Gratia concessa vel denegata penitus fuerit. Et postremo, quod in singulis Congregationibus quota vice, prima, secunda, tertia, quartave supplicetur, publice recenseat.

§. 3. *Formula generalis petendi Gratias.*

CONSUETUDO etiam est, quod Magister, pro alicujus Gratia vel dispensatione supplicans, in medium prodeat: et facta debita coram Cancellario et Procuratoribus reverentia, petitionem suam e schedula recitet; inque eodem loco stans permaneat, quoad, quid de petitione sua factum fuerit, intelligat: recitata autem sive proposita supplicatione, Procuratores, a sellis exsurgentes, primo Cancellarii votum conjunctim perscrutentur, quo secreto in eorum aures, vel per aliquod signum externum, deposito, mox a se invicem divisi, ad alios Doctores (si qui adfuerint) utrinque Cancellario assidentes, se conferant, eorum itidem suffragia excepturi. Et deinceps aliorum Magistrorum, ad utramque domus partem considendum, vota singulatim et accurate exquirent. Quibus peractis, Procuratores ad loca sua revertantur, ubi stantes, de scrutinio hujusmodi inter se diligenter conferant; et pro numero sive ratione suffragiorum, in verbo *placet*, vel *non placet*, per eosdem exceptorum, eandem Gratiam sive dispensationem, Procuratorum alter concessam (si concessa fuerit) pronunciet, vel (non concessam) ante quartam vicem, silentio tantum indicet; quarta autem vice, si non concessa fuerit, palam pronuncietur negata. Magister autem supplicans ad locum suum, unde prius prodierat, se recipiat.

§. 4. *Formulae speciales Gratiarum ad singulos Gradus pertinentium.*

Pro Baccalaureo in Artibus.

SUPPLICAT Venerabili Congregationi Doctorum et Magistrorum Regentium A. B. Scholaris Facultatis Artium e Collegio C. in quo, (*vel, si tempus non in uno aliquo Collegio vel Aula compleverit, in quo partim, partim in Collegio vel Aula A.*) non in domo aliqua privata, per integrum tempus ad Gradum Baccalaurei in Artibus per Statuta requisitum, ipsum cubile et victum continue sumpsisse scio, quatenus 16 Terminos in studio Dialecticæ et aliarum Artium juxta Statuta posuerit; publicos artium Prælectores diligenter audiverit; Sophista Generalis habitus fuerit; Examen Publicum pro Gradu subierit; et reliqua compleverit omnia, quæ per Statuta Universitatis requiruntur; ut hæc sibi sufficiant, quo admittatur ad lectionem cujuslibet libri Logices Aristotelis, et insuper earum Artium, quas et quatenus, per Statuta tenetur audivisse.

Si plures fuerint; tunc, Supplicant sub eadem forma (primo vel secundo, &c. B. C. &c.)

His verbis ab unoquoque Magistro post Seniores pro alicujus Gratia supplicante adhibitis: "Quem omnia quæ per Statuta requiruntur complevisse scio."

Cauto semper, quod si quis pro eodem gradu sub diversa forma supplicet (sive fuerit privilegiatus sive alia quacunque de causa) hujus Gratia (si fieri possit) ante aliorum supplicantium Gratias recitetur.

Si sit filius Baronis, in superiori Parlamento Domo suffragii jus habentis; (sive etiam Baron. fil. e gente Scotica vel Hibernica,) aut Ba-

ronetti, vel Equitis Aurati filius natu maximus, &c. Supplicat &c. A. B. filius &c. Scholaris Facultatis Artium &c. e Col. C. &c. quatenus duodecim terminos in studio, &c. ut supra.

Si quis super aliquo dispensabili per Domum Congregationis dispensationem obtinuerit, Supplicat &c. ut supra. Et reliqua compleverit omnia, quæ per Statuta Universitatis requiruntur, nisi quatenus cum eo dispensatum fuerit, &c.

Pro Gradu Inceptoris in Artibus.

Supplicat &c. A. B. Baccalaureus Facultatis Artium ex Aula A. quatenus 12 Terminos in studio Philosophiæ et aliarum Artium juxta Statuta posuerit; publicos Lectores diligenter audiverit; in Quadragesima determinaverit; reliquaque compleverit omnia, quæ per Statuta requiruntur; ut hæc sibi sufficiant, quo admittatur ad incipiendum in eadem Facultate.

Pro Gradu Baccalaurei in Musica.

Supplicat &c. A. B. Scholaris in Musica, e Collegio L. quatenus 7 annos in studio vel praxi Musices posuerit, et unum Canticum 5 partium in Schola Musices ediderit: et reliqua præstiterit, quæ per Statuta requiruntur, (nisi quatenus cum eo dispensatum fuerit,) ut hæc sibi sufficiant, quo admittatur ad lectionem cujuslibet libri Boethii.

Pro Gradu Inceptoris in Musica.

Supplicat &c. A. B. Baccalaureus Musicæ, quatenus a tempore suscepti Gradus Baccalaureatus sui, 5 annos in studio vel praxi Musices posuerit; unum Canticum 6 vel 8 partium in Schola Musices ediderit; et cætera præstiterit omnia, quæ per Statuta requiruntur, (nisi quatenus cum eo dispensatum fuerit,) ut hæc sibi

sufficiant, quo admittatur ad incipiendum in eadem Facultate.

Pro Gradu Baccalaurei in Medicina.

Supplicat &c. A. B. Magister [*vel Baccalaureus*] Facultatis Artium, [*vel Baccalaureus in Jure Civili,*] e Coll. [*vel Aula*] M. quatenus 28 Terminos a die matriculationis suæ compleverit; per triennium Medicinæ operam dederit, examen subierit, et reliqua omnia præstiterit, quæ per Statuta requiruntur, (nisi quatenus secum dispensatum fuerit,) ut hæc sibi sufficiant, quo admittatur ad lectionem cujuslibet libri Aphorismorum Hippocratis.

Si non Graduatus fuerit.

Supplicat &c. A. B. Medicinæ Studiosus e Coll. [*vel Aula*] M. in quo non in domo aliqua privata per 16 Terminos ipsum cubile et victum continuo sumpsisse scio, quatenus exercitia omnia præstiterit, quæ ad Gradum Baccalaurei in Artibus requiruntur; 28 Terminos a die &c. *ut supra.*

Pro Gradu Inceptoris in Medicina.

Supplicat &c. A. B. Medicinæ Baccalaureus, e Collegio [*vel Aula*] N. quatenus post susceptum Gradum Baccalaurei in Medicina, tres annos in studio Medicinæ posuerit; dissertationem scripserit et coram Professore recitaverit, et reliqua omnia præstiterit, quæ per Statuta requiruntur, (nisi quatenus secum dispensatum fuerit,) ut hæc sibi sufficiant ad incipiendum in eadem Facultate.

Pro Gradu Baccalaurei Juris Civilis.

Supplicat &c. A. B. Magister Facultatis Artium, e Collegio O. quatenus tres annos a tempore admissionis suæ ad regendum, in studio

Juris Civilis posuerit; publicum Professore[m] diligenter audiverit; in Schola Jurisprudentiæ pro forma semel responderit, et bis opposuerit; et reliqua præstiterit omnia, quæ per Statuta requiruntur; ut hæc sibi sufficiant, quo admittatur ad lectionem cujuslibet libri Institutionum Imperialium.

Si non inceperit in Artibus, nec per Statuta Collegii sui Juris studio deputatus fuerit.

Supplicat &c. A. B. Scholaris in Facultate Juris ex Aula A. in qua, non in domo aliqua privata, per integrum tempus ad Gradum Baccalaurei in Jure Civili per Statuta requisitum, ipsum cubile et victum continue sumpsisse scio; [*vel, si tempus non in uno aliquo Collegio vel Aula compleverit, in qua partim, partim in Collegio vel Aula A.*] quatenus, post biennium positum in studio Dialecticæ, Moralis Philosophiæ, et Politicæ, aliarumque humaniorum Literarum, et in audiendis lecturis sibi per Statuta Universitatis destinatis, quinque annos in studio Juris Civilis posuerit; &c. *ut supra.*

Si non inceperit in Artibus, et per Statuta Collegii sui, statim a primo ad Academiam adventu, Juris studio deputatus fuerit.

Supplicat &c. A. B. Scholaris in Facultate Juris e Collegio M. quatenus lecturas sibi per Statuta Universitatis destinatas diligenter audiverit; quinque annos in studio Juris Civilis posuerit; publicum Professore[m] &c. *ut supra.*

Pro Gradu Inceptoris in Jure Civili.

Supplicat &c. B. C. Baccalaureus in Jure Civili e Collegio M. quatenus, a suscepto Baccalaureatus Gradu, quatuor annos in studio juris

Civilis posuerit; publicum Prælectorem diligenter audiverit; lectiones pro forma in Schola Jurisprudentiæ habuerit; reliquaque præstiterit omnia, quæ per Statuta requiruntur; ut hæc sibi sufficiant, quo admittatur ad incipiendum in eadem Facultate.

Si non inceperit in Artibus, priusquam Baccalaureus in Jure foret.

Supplicat &c. B. C. Baccalaureus in Jure Civili e Collegio N. quatenus &c. quinque annos in studio Juris Civilis, &c.

Pro Gradu Baccalaurei in S. Theologia.

Supplicat &c. A. B. Magister Facultatis Artium e Collegio T. quatenus septem annos a tempore admissionis suæ ad regendum in studio S. Theologiæ posuerit; publicum Professore diligenter audiverit; in Schola Theologica pro forma semel responderit, et bis opposuerit; et reliqua præstiterit omnia, quæ per Statuta requiruntur; ut hæc sibi sufficiant, quo admittatur ad lectionem alicujus Epistolarum Divi Pauli.

Pro Gradu Inceptoris in S. Theologia.

Supplicat &c. A. B. Sacræ Theologiæ Baccalaureus e Collegio E. quatenus, a suscepto Baccalaureatus Gradu in S. Theologia, quatuor annos integros in eadem Facultate posuerit; publicum Prælectorem diligenter audiverit; in Schola Theologica pro forma sex solennes lectiones, vel tres ad minimum cursorias, habuerit; et reliqua præstiterit omnia, quæ per Statuta requiruntur; ut hæc sibi sufficiant, quo admittatur ad incipiendum in eadem Facultate.

Si in aliqua Facultate quis Gradum Baccalauræi et Doctoris cumulare cupit.

Supplicat &c. A. B. quatenus—annos in studio—posuerit; pro Gradibus cumulandis, secum per Venerabilem Domum Convocationis dispensatum fuerit; Gratiam ad lectiones pro forma habendas in hac Venerabili Domo adeptus sit; pro forma in Schola—legerit; cæteraque omnia compleverit, quæ per Statuta requiruntur; ut hæc sibi sufficiant, quo—&c.

§. 5. *De Gratiis simpliciter concedendis vel negandis.*

QUONIAM factiosi homines nonnunquam, sprete jurisjurandi religione, conjurant inter se adversus supplicantes, quos vitæ ac eruditionis merita commendant; nec iis Gratias concedere volunt, nisi indignis etiam eadem Gratia fiat; statutum est, quod quilibet Regens, Gratiam concessurus vel negaturus, absque comparatione vel relatione Gratiæ ad Gratiam, et absque aliqua conditione interposita, simpliciter et absolute, eandem vel concedat, vel deneget: quod si quis secus fecerit, illius votum vel suffragium pro nullo habeatur.

Si quis autem pro Gratia concedenda munus aliquod exegisse vel recepisse, (mediate vel immediate,) convictus fuerit, a Domo Congregationis perpetuo sit exclusus: et duplum illius, quod sic receperit vel exegerit, ad usum Universitatis solvere teneatur.

§. 6. *De Suffragiis, in concedendis vel negandis Gratiis, non revelandis.*

STATUTUM est, quod Magister quilibet, in

Gratia concedenda vel deneganda, suffragium suum Procuratoris auri insusurrabit, ita ut alius nemo exaudiat; quodque nec verbo, nutu, vel signo, quo illius propositum aliis innotescat, indicium faciat; nec cuiquam antea vel postea denunciaret; sub pœna, si secus fecerit, exclusionis perpetuæ a Domo Congregationis.

Quodque Procuratores, neminem, qui Gratiam concesserit vel denegaverit, quoquo modo revelare, virtute juramenti teneantur.

§. 7. *De Causa Gratiæ ter negatæ ostendenda, statim post tertiam Congregationem finitam.*

CUM vetera statuta singulis Magistris Regentibus eam concedant libertatem, ut quivis, si modo velit, pro arbitrio suo, ter cujusquam Gratiam, suspendendo, denegare possit; ordinatum est, quod, quotiescunque Gratia aliqua tertio petita, vel ab uno vel a pluribus denegabitur, denegationis causa Vice-Cancellario et Procuratoribus eodem die ostendatur; et probationes coram eisdem summarie proferentur; quæ causa, et probatio ejusdem, celato nomine objicientis, in proxima Congregatione publicabitur; et, si Vice-Cancellario, Procuratoribus, et majori parti Regentium justa videbitur, tum Gratia denegata censetur; et qui supplicavit, per annum integrum ad denuo supplicandum inhabilis reddetur.

Quod si causa allegata minus justa aut probabilis videatur, Gratia quarto proposita pro concessa habeatur, nisi Vice-Cancellario, aut Procuratoribus, aut majori parti Regentium videbitur, aliam ob causam, deneganda.

§. 8. *Formula pronunciandi Grantias concessas.*

STATUTUM est, quod, cum alicujus Gratia

concessa fuerit, schedula, ex qua petebatur, in manus alterius Procuratoris (cui Gratiam concessam pronunciare incumbet) ab eo qui petiit tradita, Procurator loco suo stans, Gratiam concessam sub hac forma pronunciet: *Hæc Gratia concessa est simpliciter, et sic pronunciamus concessam.*

Quod si sit pro Baccalaureo in Artibus, *Pronunciamus concessam, modo determinaverit proxima Quadragesima*: nisi ex speciali aliqua ratione, Gratiam concessam simpliciter, Procuratori pronunciare videbitur.

Si sit Gratia Inceptoris in qualibet Facultate, *Pronunciamus concessam, modo steterit in proximis Comitiis.*

Si fuerit Gratia Inceptoris in Musica, *Pronunciamus concessam, modo steterit in proximis Comitiis, et unum canticum 6 vel 8 partium in iisdem Comitiis exhibuerit.*

“ Si sit Gratia licentiandi ad praxin Chirurgiæ,
“ *Pronunciamus concessam, modo quatuor sal-*
“ *tem pauperes gratis et intuitu charitatis curet,*
“ *cum ad hoc ab iis fuerit requisitus^a.*”

SECTIO IV.

De Dispensationibus.

§. I. *De Dispensationibus in Venerabili Domo Congregationis proponendis. Formula supplicandi.*

CUM justa quandoque impedimenta interve-
niant, quo minus ea omnia, quæ ad Gradus et
alia exercitia Universitatis requiruntur, modo

^a Vide Tit. IX. Sect. IX. §. 7.

et forma per Statuta requisitis rite peragantur ; consuevit Congregatio Regentium in hujusmodi causis cum personis aliquibus in materia dispensabili aliquoties gratiose dispensare.

Formula supplicandi hæc est : Magister, qui e schedula dispensationem petit, (impetrata prius a Vice-Cancellario et Procuratoribus licentia,) nomen supplicantis, ejusque conditionem, et Collegium vel Aulam ubi commoratur, et id, in quo secum dispensari cupit, una cum speciali causa, exprimet sub hac vel consimili forma : *Supplicat, &c. Scholaris Facultatis Artium, e Coll. N. ut gratiose secum dispensetur, &c. causa est, quod, &c.* Cui petitioni si Dominus Vice-Cancellarius, ambo Procuratores, et major pars Regentium tunc præsentium, consensum suum adhibuerint, pro concessa habeatur. Et tum, eodem modo quo Gratias concessas pronunciare solet, dispensationem concessam pronuntiabit Procurator.

§. 2. *De Materia Dispensabili, in qua Congregationi dispensare permissum est.*

MATERIA in qua Venerabilis Domus Congregationis dispensare potest, et solet, hujusmodi est.

1. Pro absentia Terminorum duorum, si Gradum Baccalaurei in Artibus ambiat quis ; trium, si Gradum Magistralem.
2. Pro ingressu in Bibliothecam publicam.
3. Ut Termini in alia Academia in studio positi pro positis in hac Academia habeantur.
4. Pro minus diligenti publicorum Lectorum auditione.
5. Pro omissione Circuitus.
6. Quod Circuitus pridie ante Terminum inchoatum peractus sufficiat.

7. Pro Gratia per Magistrum alterius Domus proponenda, si nullus sit Magister in ipsa Domo unde Supplicans est.
8. Ut Gratia rata sit, licet intra tres Congregationes registrata non fuerit.
9. Ut Gratia superiori Anno concessa rata habeatur.
10. Ut Baccalaureus qui in Festo Ovorum ad determinandum præsentari debuerat, tamen post Festum istud elapsum præsentetur ad determinandum eadem Quadragesima.
11. Ut qui Gradum Baccalaurei elapso Festo Ovorum susceperit, præsentetur ad determinandum eadem Quadragesima, in causa ægritudinis, vel extremæ alicujus necessitatis; proviso semper, quod causa allegata, per Præfectum Domus, vel, eo absente, per ejus Deputatum, in Scheda aliqua Chirographo suo munita Vice-Cancellario significetur, postea in Domo Congregationis recitanda, et suffragiis venerabilis Domus permittenda.
12. ^aUt Baccalaureus, qui præterita Quadragesima determinare debuerat, determinet sequenti aliqua Quadragesima.
13. Ut Magister Cumulatus, pro Habitu coccineo, nigro et solito, post peracta præsentationis solennia, uti possit.
14. Ut Doctores Ocreas, et Magistri Crepidas et Socculos, quibus ex antiquo ritu uti tenentur, exuant.
15. Ut Cantabrigienses, vel alterius Academiæ Studiosi, eodem sint Gradu et statu apud nos, quo apud suos sunt.
16. Ut Terminus prorogetur.

^a Tit. VI. Sect. II. §. 3.

17. Pro necessaria Regentia.

18. Quatenus Præsentandus (ad practicandum in Medicina vel Chirurgia) secundum Statuta Testimonium non affert, nec fidem facit, quod interfuerit uni saltem integræ Dissectioni Anatomicæ, uniusque integræ Lectioni de Sceletō, ut gratiose secum dispensetur pro hujusmodi istius Omissione^b.

Denique si quæ alia causa sit his consimilis; vel in qua, speciali aliquo Statuto, Venerabili Domui Congregationis Dispensandi potestas indulgeatur.

SECTIO V.

De Præsentationibus Graduandorum.

§. I. *De Circuitione a præsentandis obeunda.*

STATUTUM est, quod, pro more antiquo, postquam Gratia concessa fuerit, quilibet præsentandus, (impetrata prius per eundem veniam a Domino Vice-Cancellario, ut habeatur Congregatio,) præsentatorem suum habitu Gradui competente indutum sequens, ipse etiam habitu congruo et nudato capite incedens, præeuntibus Bedellis vel eorum aliquo, primo Vice-Cancellarium, deinde Procuratorem Seniore, postea Procuratorem Juniore, ante occasum solis, in hospitiiis suis adeat. Quem, si inveniri possit, præsentator sic alloquatur:

Supplicamus dominationi vestræ, quatenus præesse dignetur crastinæ Congregationi, ut Scholaris vel Baccalaureus meus ad Gradum suum præsentetur.

Deinde, si quis ipsorum ad incipiendum in Ar-

^b Stat. Tit. IV. Sect. I. §. 15.

tibus præsentandus fuerit, deponet penes Vice-Cancellarium pecuniariam cautionem 40s. vel (si tenuioris conditionis fuerit) fidejussoriam, (duobus interpositis sponsoribus, qui alicujus Collegii Socii sint,) quod proximis Comitibus incipiet; et, statim post Comitibus, ad Regentiam admittendum se curabit: in quorum alterutro si defecerit, cautio protinus cedat fisco Universitatis; sin vero inceperit, et ad Regendum admissus fuerit, cautionem usque penes se retineat Vice-Cancellarius, quoad annus necessariæ Regentiæ completus fuerit: si quam ratione inceptiois aut Regentiæ mulctam incurrerit, inde subtrahere ut liceat; deinde in fine anni residuum restituatur. Quicumque autem ex iis ad Gradum Baccalaurei in Artibus præsentandi sunt, obligentur itidem cautione sive pecuniaria sive fidejussoria (ut prædicitur) ejusdem valoris 40s. penes Vice-Cancellarium deposita, ad sistendum se in Festo Ovorum ineunte proxima Quadragesima.

Procuratores vero, sic: *Supplicamus reverentibus vestris, ut crastinæ Congregationi interesse dignemini, &c.* Quibus annuentibus, recedet.

Si vero præsentandus cumulatus fuerit, præeuntibus Stationario, i. e. Virgifero Universitatis, Bedellis omnibus, et Proto-Bibliothecario (vice Capellani Universitatis), adibit primo Procuratorem Junioem; deinde, cum illo, Procuratorem Senioem; et post, cum utroque Procuratore, Vice-Cancellarium; singulisque ut Congregationi intersint rogatis, a Vice-Cancellario et Procuratoribus Domum deducetur.

Quod si Magistrorum quivis (habito examine) præsentandum quemvis, quoad eruditionem, Gradui suo imparem deprehenderit, eoque no-

mine eum ad Vice-Cancellarium vel Procuratores detulerit, oportebit Vice-Cancellarium vel Procuratores præsentationem ipsius tantisper morari, donec (habito publico examine in Domo Congregationis) ulterius dispiciatur, utrum dignus sit Gradu quem ambit, necne. Alioqui non licebit Vice-Cancellario aut Procuratoribus, ex privata cujusvis suggestionem aut interpellationem, cujusquam præsentationem aut admissionem impedire: nisi quid de novo admiserit post Gratiam impetratam; aliquidve fecisse manifesto probetur, quod repulsam mereatur, quodque prius latebat.

§. 2. *De solenni Processu præsentandorum ad Domum Congregationis.*

IN die præsentationis, statim a pulsatione magnæ campanæ, præsentandus vel præsentandi, (si plures candidati fuerint,) nudis capitibus, juniore reliquis præcedente, omnes præeunte Viatore sive Bedello, sequente præsentatore et Collegii sive Aulæ Præfecto una cum Sociis vel Commensalibus universis, habitibus Gradibus suis competentibus indutis, a Domo sua ad Apodyterium Domui Congregationis vicinum solenniter deducuntur.

Et, si Cumulator fuerit, Vice-Cancellarius et Procuratores cum Proto-Bibliothecario, omnibusque Bedellis et Stationario Universitatis comitabuntur.

Consuetudo autem est, quod Doctorem vel Baccalaureum in Medicina præsentandum, omnes Medicinæ Doctores, Baccalaurei, et quotquot huic professioni nomina dederunt, in Universitate præsentem, a domo sua ubicunque intra Universitatis præinctum fuerit, una cum Be-

dello Facultatis suæ, ad Apodyterium Domui Congregationis vicinum solenniter deducant, et eo nomine chirothecas singuli a præsentando recipiant.

§. 3. *De Subscriptione ante Præsentationem exigenda.*

CUM præsentandus vel præsentandi ad Apodyterium Domui Congregationis vicinum devenierint, eorum quilibet articulis Fidei et Religionis in Synodo Londini anno Dom. 1562. editis et confirmatis (lectis prius, vel alio recitante auditis, in præsentia præsentatoris sui) necnon tribus articulis in 36^o Canone comprehensis (lectis prius ibidem, et publice, coram præsentatore, in præsentia Procuratorum) subscribet; qui quidem tres articuli descripti sunt Canone 36^o libri Constitutionum et Canonum Ecclesiasticorum, in Synodo Londini cœpta anno Dom. 1603.

§. 4. *Ceremoniæ, sive Ritus Præsentationum.*

PERACTA subscriptione, et Vice-Cancellario, Procuratoribus, et Magistris Regentibus in Domo Congregationis considentibus, præsentatores cujusque Facultatis, (*secundum dignitatem Facultatis*, ubi fit præsentatio ad eundem Gradum in diversis Facultatibus; si unus e præsentandis fuerit Theologus; alioqui, secundum senioritatem præsentatoris: ubi vero præsentatio fit ad diversos Gradus; *secundum dignitatem Gradus*: et in eadem Facultate et Gradu, *secundum senioritatem præsentatorum*,) ad præsentandum procedant. Et quisque, (Bedello præeunte, et candidatis sive præsentandis, prout seniores fuerint, proxime sequentibus,) Domum Congregationis conscendet; et cum debita reve-

rentia ad superiorem partem Domus procedens, præsentandos a dextero latere sistet; deinde præsentandi cujusque, prout ordine sistitur, manum dexteramprehendens, coram Vice-Cancellario producet; et ea, qua par est, reverentia, sub peculiari formula, Vice-Cancellario et Procuratoribus præsentabit.

§. 5. *Peculiares Formulæ præsentandi ad singulos Gradus.*

Ad Baccalaureatum in Artibus.

INSIGNISSIME Vice-Cancellarie, vosque egregii Procuratores, præsentō vobis hunc meum Scholarem in Facultate Artium, ut admittatur ad lectionem cujuslibet libri Logices Aristotelis, et earum insuper Artium, quas et quatenus per Statuta tenetur audivisse; testorque illum in præsentia mea legisse (*vel lectos audivisse*) articulos Fidei et Religionis, quibus modo subscripsit coram Procuratoribus; ac speciatim tres articulos in Canone 36^o comprehensos; fide mea data huic Universitati.

Ad determinandum.

Insignissime &c. præsentō vobis hunc meum Baccalaureum Facultatis Artium, ut admittatur ad determinandum hac proxima Quadragesima.

Ad incipiendum in Artibus.

Insignissime &c. præsentō vobis hunc Baccalaureum in Facultate Artium, ut admittatur ad incipiendum in eadem Facultate; testorque illum, &c.

Ad Baccalaureatum in Musica.

Insignissime &c. præsentō vobis hunc Scho-

larem in Facultate Musicæ, ut admittatur ad lectionem cujuslibet libri Boethii: ad quam admissionem eum aptum, habilem, et idoneum esse, sub chirographis hominum in Arte Musica peritissimorum abunde testatum accepistis.

Ad incipiendum in Musica.

Insignissime &c. præsentō vobis hunc Baccalaureum in Facultate Musicæ, ut admittatur ad incipiendum in eadem Facultate: ad quam admissionem, &c.

Ad Baccalaureatum in Medicina.

Insignissime &c. præsentō vobis hunc Studiosum in Medicina, ut admittatur ad lectionem cujuslibet libri Aphorismorum Hippocratis; testorque illum, &c.

Ad incipiendum in Medicina.

Insignissime &c. præsentō vobis hunc Baccalaureum in Medicina, ut admittatur ad incipiendum in eadem Facultate; testorque illum, &c.

Ad Baccalaureatum Juris Civilis.

Insignissime &c. præsentō vobis hunc Studiosum in Jure Civili, ut admittatur ad lectionem cujuslibet libri Institutionum Imperialium; testorque illum, &c.

Ad incipiendum in Jure Civili.

Insignissime &c. præsentō vobis hunc Baccalaureum in Jure Civili, ut admittatur ad incipiendum in eadem Facultate; testorque illum, &c.

Ad Baccalaureatum in S. Theologia.

Insignissime &c. præsentō vobis hunc Studi-

osum in S. Theologia, ut admittatur ad lectionem cujuslibet Epistolarum Beati Pauli; testorque illum, &c.

Ad incipiendum in S. Theologia.

Insignissime &c. præsento vobis hunc Baccalaureum in S. Theologia, ut admittatur ad incipiendum in eadem Facultate; testorque illum, &c.

Statuit autem et declarat Academia, quod in omni præsentatione censendus est semper Præsentator (præter id quod cuilibet præsentando a Domo sua testimonium perhibetur) suum quoque, ex ipsa præsentatione, testimonium adjicere: scilicet, *non videri sibi præsentatum istum eo Gradu quem ambit indignum esse.*

Deinde, peracta hujusmodi præsentationis formula, quilibet præsentatus, prout præsentatur, ad alteram partem Domus Congregationis transibit: singulisque sic præsentatis, Procurator Senior eorum subscriptionem articulis Fidei et Religionis sic testabitur: Nos Procuratores testamur, A. B. C. D. T. omnibus articulis Fidei et Religionis in hoc libro contentis (necnon tribus articulis in 36^o Canone comprehensis, prius in præsentia nostra lectis) subscripsisse.

SECTIO VI.

De Juramentis præsentandorum.

§. 1. *Statuta, in quæ singulos præsentatos Jurjurando adiget Junior Procurator. Et Admonitio de habitu Gradui competente.*

POST absolutam præsentationem, Procurator Junior a Seniore inter præsentatos ad genua sua

accidente, reliquis circumstantibus audientibusque, juramentum exiget in hæc verba :

“ (Dom. Doctor, Magister, vel Domine) tu
“ dabis fidem ad observandum Statuta, Privi-
“ legia, Consuetudines, et Libertates istius Uni-
“ versitatis.” *Respond.* “ Do.”

“ Jurabis etiam, quod pacem istius Univer-
“ sitatis per te non perturbabis, nec per alium
“ vel alios qualitercunque perturbari procura-
“ bis; nec perturbatorem vel perturbatores, ali-
“ quem vel aliquos, in perturbatione pacis, ope
“ vel consilio juvabis; nec impedies per te, vel
“ per alium vel alios, quo minus de pacis per-
“ turbatore vel perturbatoribus fiat justitia.”
Respond. “ Juro.”

“ Item specialiter tu jurabis, quod inter nullas
“ communitates vel personas istius Universita-
“ tis, impedies pacem, concordiam, et amorem.
“ Et si aliqua dissensio inter aliquas communi-
“ tates vel personas exorta fuerit, illam nullo
“ modo fovebis, vel accendes; nec conventiculis
“ interesse debes, nec eis tacite vel expresse
“ consentire, sed ea potius, modis quibus pote-
“ ris, impedire.”

*Forma Juramenti admittendorum ad publicam
Bibliothecam.*

“ Tu etiam promittes, sancteque coram Deo
“ Optimo Maximo recipies, quod, quoties in pub-
“ licam Academiæ Bibliothecam venire te conti-
“ gerit, animum ad studia per modestiam et si-
“ lentium accommodabis; libros, cæterumque
“ cultum sic tractabis, ut superesse quam diutis-
“ sime possint. Item, quod neque tu in persona
“ tua aliquem vel aliquos libros surripies, per-
“ mutabis, rades, deformabis, lacerabis, scindes,

“annotabis, interscribes, sponte corrumpes, ob-
 “literabis contaminabis, aut alio quocunque
 “modo detruncabis, abuteris, deteres, aut im-
 “minues; nec alii cuiquam auctor eris horum
 “quidvis perpetrandi; sed, quantum in te est,
 “delinquentem, vel delinquentes impedies, ipso-
 “rumque maleficia Vice-Cancellario, ejusve De-
 “putato, intra triduum postquam tibi innotu-
 “erint, denunciabis: Ita te Deus adjuvet tactis
 “sacrosanctis Christi Evangeliiis.”

Lectis singulis jurisjurandi articulis, Procura-
 tor seniore inter præsentatos juramento hoc
 modo onerabit:

“Hæc omnia prædicta te fideliter observatu-
 “rum promittes, sicut Deus te adjuvet, per Je-
 “sum Christum hoc sacrosancto Evangelio an-
 “nunciatum.”

Deinde librum deosculandum exhibebit; quæ-
 sitoque senioris nomine, si plures præsententur,
 quinque vel sex eorum manus simul libro impo-
 nentibus, iisdem dicet:

“Idem juramentum, quod præstitit A. B. in
 “persona sua, vos præstabit in personis vestris,
 “et quilibet vestrum in persona sua, sicut Deus
 “vos adjuvet,” &c.

Admonitio pro habitu Gradui competente.

Præstito demum a singulis juramento, Procura-
 tor singulis etiam sic denunciabit: “Item tu
 “teneris (vel vos tenemini) quod sis habiturus
 “(vel sitis habituri) intra quindenam, habitum
 “de proprio, Gradui competentem; et ipsum
 “vel similem servabis, quamdiu in Universitate
 “contigerit te morari; ad effectum, ut non so-
 “lum in eo actus Scholasticos possis exercere;
 “verum etiam Universitatem Matrem nostram,

“ in processionibus, et aliis Universitatis nego-
 “ tiis (cum vocatus et præmonitus fueris) cum
 “ eodem valeas honorare; idque sub pœnis in
 “ Statutis Universitatis limitatis.”

§. 2. *De Juramentis Primatus Regii, et Fide-
 litatis a singulis præsentatis exigendis.*

EXACTIS præstitisque coram Junio Pro-
 curatore juramentis, ad Seniore Procureto-
 rem se conferent præsentati, quorum senior Jura-
 mentum Primatus Regii clara voce (ut ab omni-
 bus aliis audiatur) publice leget, et Evangelium
 a Procureto exporrectum osculabitur, et post
 eum alii, quotquot eodem die præsententur: et
 postremo, eodem Juramentum Fidelitatis sive
 Allegiantie præeunte, distincte alii omnes ver-
 batim recitabunt, et in confirmationem Jura-
 menti omnes ordine librum deosculabuntur.

SECTIO VII.

De Creatione et Licentiatione præsentati per
 Vice-Cancellarium peragenda.

PRÆSTITIS ab omnibus præsentatis coram
 Seniore Procureto juramentis, tum, si præsen-
 tentur ad Gradum Baccalaurei in Artibus, omni-
 bus ad præsentatorem redeuntibus, et juxta ip-
 sum coram Vice-Cancellario consistentibus, Vice-
 Cancellarius dicet, “ Domine, (vel *Domini*, si
 “ plures fuerint,) ego admitto te (vel *vos*) ad
 “ lectionem cujuslibet libri Logices Aristotelis;
 “ et insuper earum Artium, quas et quatenus
 “ per Statuta audivisse teneris (vel *tenemini*);
 “ insuper autoritate mea et totius Universitatis,
 “ do tibi (vel *vobis*) potestatem intrandi Scho-
 “ las, legendi, disputandi, et reliqua omnia faci-

“endi, quæ ad Gradum Baccalaurei in Artibus
“spectant.”

Si fuerit Baccalaureus Juris Civilis: “Do-
“mine vel Magister, (vel *Domini* aut *Magistri*,
“si plures fuerint,) ego admitto te (vel *vos*) ad
“lectionem Institutionum Imperialium.”

Si Medicinæ Baccalaureus fuerit: “Magister,
“ (vel *Magistri*, si plures fuerint,) ego admitto
“te (vel *vos*) ad lectionem Aphorismorum Hip-
“pocratis.”

Si denique S. Theologiæ Baccalaureus fuerit:
“Magister, (vel *Magistri*, si plures fuerint,) ego
“admitto te (vel *vos*) ad lectionem Epistolarum
“B. Pauli.”

Deinde, Vice-Cancellarius, librum capitibus
ipsorum imponens, dicet, “Ad honorem Do-
“mini nostri Jesu Christi, et ad profectum Sa-
“crosanctæ Matris Ecclesiæ et studii, ego au-
“toritate mea et totius Universitatis do tibi (vel
“*vobis*) licentiam incipiendi in Facultate Ar-
“tium (vel Facultate Juris, Medicinæ, Theolo-
“giæ), legendi, disputandi, et cætera omnia faci-
“endi, quæ ad statum Doctoris seu Magistri in
“eadem Facultate pertinent, cum ea compleve-
“ris (vel *compleveritis*) quæ ad talem pertinent
“solennitatem; in nomine Domini, Patris, Filii,
“et Spiritus Sancti:” hæc postrema dum pro-
nunciat, debita cum reverentia, caput aperi-
endo.

Quibus sic peractis, et facta per candidatos re-
verentia Domino Vice-Cancellario, Procuratori-
bus, et Magistris Regentibus, (Bedello et præsen-
tatore præeuntibus,) eodem ordine Domo egre-
dientur, quo ingressi sunt; et extra cancellos
Domus habitum, competentem Gradui ad quem

admissi sunt, induentes, illico (Bedello et præsentatore præeuntibus) in Domum redibunt; et præstita Domino Vice-Cancellario, Procuratoribus, et Magistris Regentibus reverentia debita, seniore reliquis præcedente (aliter atque accesserunt) discedent.

SECTIO VIII.

De Incorporatione.

§. I. *De incorporandis studiosis ab aliis Academicis huc adventantibus.*

CUM Universitas Oxoniensis a Cantabrigiensi et ab Academicis exteris, per totum pene Terrarum Orbem, adventantes, (modo alienigenæ sint, nec intra regnum Angliæ sedem figere meditentur) eodem affectu recipere amplectique consuescat, quo suos in Academia Cantabrigiensi exterisque Gymnasiis recipi perspexerit; id quo facilius fieri possit, Domui Congregationis eos, qui incorporari gestiunt, incorporandi potestatem permittit. Per alienigenas vero hic non intelligimus natos intra regnum Scotiæ aut Hiberniæ; quibus incorporari permittitur, si tempore in Academia sua requisito, et præstitis prius Exercitiis, Gradus susceperint.

Proviso semper, ut nemini, sive Graduato sive nondum Graduato, huc migranti, tempus apud aliam Academiam Gradibus capessendis præstitutum computare liceat, nisi qui, intra 21 dies in pleno Termino post matriculationem suam, Literis Certificatoriis publice recitatis Domum Congregationis certiores fecerit, se per Terminos illos quorum computum haberi velit, juxta hujus

Universitatis vel Cantabrigiensis statuta et consuetudines intra Academiæ suæ limites bona fide commoratum esse.

Solet vero is, qui incorporari cupit, per aliquem e Magistris (recitatis prius publice in Domino Congregationis Literis Certificatoriis et Testimonio sub sigillo Universitatis in qua Gradum suscepit, non aliter,) Gratiam suam sub huiusmodi formula proponere: “Supplicat A. N. Baccalaureus vel Magister Facultatis Artium in Academia (A. B. C.) creatus, ut bona vestra cum venia admittatur ad eundem Gradum, Statum, et Dignitatem apud Oxonienses, quibus ornatus est apud suos (A. B. C.)”

Qua quidem Gratia sic petita, et eodem modo, quo alias fieri consuevit, pronunciata; Præsentatio Incorporandi ad hunc modum sequitur:

“Insignissime &c. præsentō vobis hunc Magistrum Facultatis Artium in Academia (A. B. C.) creatum, ut sit eodem Gradu, Statu, et Dignitate apud nos Oxonienses, quibus ornatus est apud suos, (A. B. C.)” Et post Præsentationem, Juramentum istiusmodi ab altero Procuratorum ei deferretur:

“Magister, tu dabis fidem ad observandum Statuta, Privilegia, Consuetudines, et Libertates istius Universitatis, quatenus Statutis, et Privilegiis, Consuetudinibus, et Libertatibus Universitatis (A. B. C.) non repugnant.”

Denique a Vice-Cancellario sic admittetur: “Magister, ego admitto te ad eundem Statum, Gradum, et Dignitatem hic apud nos Oxonienses, quibus ornatus es apud tuos (A. B. C.)” Eadem quoque Gratiæ, Præsentationis, Jura-

menti, et Admissionis formula, mutatis mutandis, adhibenda est, cum aliquis nondum Graduat^{us} Terminorum apud aliam Academiam rationem sibi apud nos Oxonienses imputandam velit.

Cautum tamen est, quod nullus in S. Theologia, Medicina, vel Jure Civili Doctor incorporetur, nisi de expresso consensu Vice-Cancellarii, Professoris, et trium insuper Doctorum in eadem Facultate, et Procuratorum; vel majoris partis eorundem.

§. 2. *Conditiones incorporandi Alumnos Academicæ Oxoniensis, vel Cantabrigiensis, apud exter^{as} Academias Gradus capessentes.*

CUM nonnulli aliquando, post aliquod tempus in Academiis domesticis bonarum literarum studio insumptum, ad exter^{as} Academias se conferant, ubi (nec temporis nec exercitiorum ratione habita) ad Gradus supremos promoventur; deinde huc reversi, se ad eosdem Gradus admitti postulant; unde indirecte omnis ordo et disciplina Universitatis violatur:

Placuit Universitati decernere et statuere, ne quis in posterum (qui aliquando hujus Academicæ, aut Cantabrigiensis, alumnus fuit, et in Academia quacunq^{ue} extera Gradum aliquem suscepit,) ad eundem Gradum in hac nostra Universitate admittatur, nisi completo tempore, quod (juxta Statuta hujus Universitatis, vel suæ Cantabrigiensis) ad hujusmodi Gradum capessendum requiritur: et, tum demum, de expresso consensu Vice-Cancellarii, Professoris, et trium insuper Doctorum in eadem Facultate, et Procuratorum; vel majoris partis eorundem.

§. 3. *Quo Loco et Statu incorporati esse debent.*

STATUTUM est, quod quilibet, incorporationis beneficium nactus, eodem habeatur loco et statu, quibus in aliqua alia Universitate gauderat: ita tamen, quod (utcunque prius ad Gradum aliquem alibi sit admissus) nihilominus junior habeatur iis omnibus, qui ad eundem Gradum Oxoniæ sunt admissi eodem anno, id est, intra idem temporis spatium, inter duo deinceps Comitiam, interjectum.

SECTIO IX.

De Licentiis concedendis.

§. 1. *De Qualitate eorum, qui ad concionandum per universam Angliam licentiandi sunt.*

CUM de consuetudine antiqua, penes Universitatem Oxoniensem potestas fuerit concedendi licentias concionandi per universam Angliam, eamque potestatem per Congregationem Magistrorum Regentium exercere consueverit; ad præcavendum abusus, qui circa hujusmodi licentiationem contingere possunt; statutum est et decretum, quod nemini in posterum pro hujusmodi Gratia supplicare permittatur, qui non sit Magister Artium, Baccalaureus Juris, vel S. Theologiæ Baccalaureus; quorum quilibet septem annos in studio S. Theologiæ in Universitate posuerit, et semel saltem in Disputatione Theologica (in Theologica Schola vel in Comitiiis) publice responderit: et quatuor conciones laudabiles coram

Universitate habuerit, sive in Ecclesia B. Mariæ Virginis, sive in alia aliqua Ecclesia Collegiata, sive in Templo S. Petri ad Orientem.

§. 2. *Formula petendi Licentiam ad concionandum per universam Angliam.*

STATUTUM est, quod Gratia pro licentiatione ad concionandum, prout alia Gratia in Venerabili Domo Congregationis, proponentur sub hujusmodi formula :

Supplicat A. B. Magister Facultatis Artium e Colleg. M. quatenus septem annos in studio Sacrae Theologiae in Universitate posuerit, in Schola Theologica (vel in Comitibus) responderit, quatuor conciones coram Universitate habuerit ; ut hæc ei sufficiant, quo admittatur ad annunciandum Dei verbum per universam Angliam.

Quæ Gratia, cum concessa fuerit eodem modo quo alia, a Procuratore pronunciabitur, et postea, Literæ Testimoniales de eadem fient ; quibus, autoritate et decreto ejusdem Congregationis, sigillum publicum Universitatis appendetur.

§. 3. *Formula Literarum Testimonialium.*

CANCELLARIUS, Magistri, et Scholares Universitatis Oxon. dilecto nobis in Christo A. B., S. Theologiae Baccalaureo, et Coll. N. intra Universitatem prædictam Socio, salutem in Domino sempiternam. Cum omnia nostra studia, consilia, et actiones ad Dei gloriam et fratrum salutem referri debeant ; nos Cancellarius, Magistri, et Scholares Universitatis prædictæ (pro ea opinione quam de scientia tua, vitæque et morum integritate, habemus) liberam tibi, tenore præsentium, concedimus facultatem

et potestatem prædicandi verbum Dei, juxta talentum a Deo tibi concreditum, in quibuscunque Ecclesiis Angliæ, et conventibus publicis Ecclesiasticis ad hoc accommodatis, in perpetuum duraturam; modo nihil interim feceris aut prædicaveris, contra ritus et canones in Ecclesia publice receptos et approbatos; quo in casu, si quid tale admiseris, hanc nostram licentiam statim irritam et cassam esse volumus. Teque serio admonemus, et in Domino obsecramus, ut juxta gratiam a Deo tibi datam, auditores tuos præcipue excites, ut Dei tum præcepta, tum etiam exemplum, in verbo ipsius proposita, vere in omni vita, integritate et pietate exprimere conentur; adeoque glorificent cœlestem Patrem, honorent Regiam Majestatem, et charitatem inter se colant Christianam. Nos igitur Cancellarius, Magistri, et Scholares antedicti testamur, præfatum A. B. juramentum de primatu Regiæ Majestatis suscepisse, et subscripsisse tam omnibus articulis Fidei et Religionis in Ecclesia Anglicana receptis et approbatis, quam tribus illis articulis comprehensis in canone 36^o libri Constitutionum et Canonum Ecclesiasticorum editorum in Synodo Londini cœpta 1603, et Regni Domini nostri Jacobi &c. primo; in quorum omnium majorem fidem et plenius testimonium, sigillum Universitatis Oxon. commune, quo hac in parte utimur, præsentibus apponi fecimus. Datum in Domo nostræ Congregationis, &c.

§. 4. *De Qualitate eorum, qui ad Praxin in Medicina licentiandi sunt.*

STATUTUM est, quod Doctor quilibet in Medicina, post inaugurationem seu admissionem

suam, praticare licite poterit in omni medicandi genere. Alius vero nemo in Medicina publice praticare Oxoniæ permittatur, nisi Gradum Baccalaurei in Medicina susceperit, et a Cancellario sive ejus Commissario, et Congregatione Magistorum Regentium, ad praticandum more consueto admissus fuerit. Chirurgiam vero nullus exerceat, intra præcinctum Universitatis, nisi licentia a Cancellario sive Vice-Cancellario impetrata.

Quod si quis secus præsumserit, non solum ab ulteriore promotione repellatur, et privilegiis Universitatis privetur; sed etiam (si monitus non desistat) sicut perturbator pacis puniatur.

§. 5. *Formula petendi Licentiam ad praticandum in Medicina.*

PRO qualitate personæ supplicantis, in Gratia exprimantur, quæ ad hujusmodi licentiam necessario requiruntur, sub hac formula: Supplicat, &c. A. B. e Coll. [*vel Aula*] N., quatenus in hac Universitate Gradum Baccalaurei in Medicina susceperit, et chirographo vel professoris et unius alterius Doctoris in Medicina, vel trium quorumcunque Doctorum in Medicina, in Universitate residentium, approbatus fuerit; et reliqua præstiterit omnia, quæ per Statuta requiruntur; ut hæc sibi sufficiant ad praticandum in eadem Facultate per universam Angliam.

Qua Gratia concessa et pronunciata, prout aliæ solent, Literæ etiam Testimoniales, de eadem fient, et (eodem modo quo testimoniales licentiæ ad prædicandum in Domo Congregationis ratæ habebantur) sigillo publico Universitatis munientur.

§. 6. *Formula Literarum Testimonialium.*

CANCELLARIUS, Magistri, et Scholares Universitatis Oxon. dilecto nobis in Christo A. B. Baccalaureo in Medicina e Coll. [*vel Aula*] N. intra Universitatem prædictam, salutem in Domino sempiternam. Cum omnia nostra studia, consilia, et actiones ad Dei gloriam et fratrum salutem referri debeant; cumque Medicina ad hæc, inter reliquas Facultates, plurimum conferat; hinc est, quod nos Cancellarius, Magistri, et Scholares antedicti (pro ea opinione, quam de scientia tua, vitæque ac morum integritate, habemus) liberam tibi, tenore præsentium, concedimus potestatem et facultatem practicandi in Medicina, et ea omnia faciendi, quæ ad eam spectant Facultatem, ubivis per universum Angliæ regnum, in perpetuum duraturam. Nos etiam Cancellarius, Magistri, et Scholares antedicti, testamur præfatum A. B. juramentum de primatu Regiæ Majestatis suscepisse, &c. *prout supra, in forma licentiæ ad publice concionandum.*

§. 7. *De Qualitate et Conditione licentiandi ad Praxin Chirurgiæ.*

Formula supplicandi.

STATUTUM est, quod ita demum Chirurgiæ studiosus ad praxin per universam Angliam admittatur, si per septem annos integros in ea arte se perite, probe, et honeste exercuerit; duas Anatomias dissecuerit; et tres ad minimum curationes præstiterit; et chirographo vel Professoris Regii in Medicina, et unius alterius Doctoris in eadem Facultate, vel trium quorumcunque Doctorum in Medicina, in Universitate re-

sidentium, approbatus fuerit; quodque hæ in forma Gratiae recenseantur hoc modo:

Supplicat A.B. in Chirurgia studiosus, quatenus septem annos in studio et praxi Chirurgiæ posuerit, duas Anatomias administraverit, et tres curationes fecerit; et chirographo vel Professoris Regii in Medicina, et unius alterius Doctoris in eadem Facultate, vel trium Doctorum in Medicina, in eadem Universitate residentium approbatus fuerit, et reliqua præstiterit omnia, quæ per Statuta requiruntur; ut hæc sibi sufficiant, quo admittatur ad practicandum in Chirurgia per universum Angliæ regnum.

Cujusmodi Gratiae concessio sic pronunciari solet: “Hæc Gratia concessa est, modo quatuor
“saltem pauperes gratis et intuitu charitatis
“curet, cum ad hoc ab iis fuerit requisitus.”

§. 8. *Formula Literarum Testimonialium.*

CANCELLARIUS, Magistri, et Scholares Universitatis Oxon. dilecto nobis in Christo A. B. in Chirurgia *studioso* (vel *bene exercitato*) salutem in Domino sempiternam. Cum omnia nostra studia, consilia, et actiones ad Dei gloriam et fratrum salutem referri debeant; cumque Chirurgia ad hæc, inter cæteras artes, plurimum conferat; hinc est, quod nos Cancellarius, Magistri, et Scholares antedicti (pro ea opinione, quam de scientia tua, vitæque ac morum integritate habemus) liberam tibi, tenore præsentium, concedimus potestatem et facultatem practicandi in Chirurgia, ubivis per universum Angliæ regnum, perpetuo duraturam; sub conditionibus subscriptis.

Primo, scil. quod quatuor saltem pauperes, gratis et intuitu charitatis (quamprimum sese

occasio tulerit) cures, cum ad hoc ab ipsis fueris requisitus.

Secundo, quod fines artis tuæ non excedas, aut Medicinam practices.

Tertio, quod nimium pro salario non exigas; aut curationem aliquam retardes, uberioris lucri intuitu: quod si in harum quapiam deliqueris, licentiam hanc nostram, tibi super præmissis factam, ipso facto vacare intelliges.

Nos etiam Cancellarius, &c. *ut supra de licentiandis ad praxin in Medicina*

TITULUS X.

De Magna Congregatione.

SECTIO I.

§. 1. *De Personis, ex quibus constat Magna Congregatio, sive Convocatio Magistrorum Regentium et non Regentium.*

CUM nullo Statuto hactenus satis accurate definitum sit ex quibus personis constat Magna Congregatio, sive Convocatio Magistrorum Regentium et non Regentium, unde haud leves oriri poterunt lites, et quæstiones non facile dirimendæ; visum est Academiæ novo Statuto remedium huic malo adhibere.

Statutum est igitur, quod ad Magnam Congregationem sive Convocationem accedant, et jus ibidem deliberandi et suffragandi habeant, Doctores tantum et Magistri inferius descripti:

Primo, Cancellarius, sive Vice-Cancellarius, et ambo Procuratores, sive eorum deputati.

Secundo, Omnes Doctores in Sacra Theologia, Medicina, vel Jure Civili, necessario Regentes; et Magistri durante primo anno necessariæ suæ Regentiæ.

Tertio, Omnes Collegiorum et Aularum Præfecti, et eorum deputati; omnes itidem quotquot de fundatione alicujus Collegii sint, qui aliquando in Jure Civili vel Artibus rexerunt.

Quarto, Omnes Doctores in S. Theologia, Medicina, vel Jure Civili, intra Universitatis præcinctum familiam alentes; omnes itidem Professores et Prælectores publici, qui aliquando in Jure Civili vel Artibus rexerunt, si modo exercitia a Statutis præscripta suis vicibus per se vel per alium præstiterint, et Feoda Universitati et ejus officiariis debita persolverint. Qui vero hæc exercitia præstare, aut Feoda persolvere, aut recusaverint, aut moniti neglexerint, iis, cujuscunque sint ordinis, nullum jus suffragandi concedimus.

Quinto, Omnes Convictores, qui aliquando in Jure Civili vel Artibus rexerunt, qui a tempore capessendi Gradum sive Magistri in Artibus, sive Doctoris, in aliqua prædictarum Facultatum, in libro Promptuarii alicujus sive Collegii, sive Aulæ, nomina inscripta habuerunt, qui suas concionandi et disputandi vices sustinuerunt, et qui Feoda Universitati, et ejus officiariis, debita persolverunt.

Quod si quis ab uno Collegio, vel Aula, ad aliud, juxta formam in Statuto Tit. III. Sect. 3. descriptam, migraverit, modo intra tres menses in aliud Collegium, sive Aulam, se receperit, neque interim aliquod exercitium aut onus Academicum detrectaverit, is reputabitur, non obstante

hoc intervallo, per omne suum tempus nomen in aliquo Collegio, sive Aula, retinuisse.

Si quis vero Doctor, vel Magister Artium, ab Universitate discesserit, et postea rursus studendi causa huc commigraverit, vel si quis ab alia Academia adventans hic incorporatus fuerit; talis, postquam per centum et octoginta dies continuos, sive discontinuos, intra unius anni spatium in Universitate personaliter resederit, se coram Vice-Cancellario, in Convocatione, sive Congregatione, sistat, qui testimonio residentiae suae a Praefecto Collegii sui sive Aulæ, sive ejus vicem gerente, adducto, eum ad jus suffragandi in Domo Convocationis teneatur admittere. Postquam admissionem eum jus suffragandi habere statuimus, modo nomen inscriptum in libro Promptuarii alicujus Collegii sive Aulæ haberit, et omnia exercitia et onera ab ista admissione subierit.

Proviso tamen, quod hoc Statutum non extendatur ad eos Doctores et Magistros, qui nomina habuerunt in libro promptuarii alicujus Collegii sive Aulæ ante festum D. Johannis Baptistæ proxime elapsum; quibus jus suffragandi concedimus, modo Feoda Universitati debita persolverint, et suas in posterum concionandi et disputandi vices præstiterint.

Insuper statutum est, quod omnes sub conditionibus supra limitatis suffragandi jure gaudeant, qui ad Gradus, quibus insigniti sunt, per Diploma, vel per Decretum Convocationis, non autem qui tantum honoris causa, admissi fuerunt.

Ut melius vero constet quibus jus suffragandi competit, statutum est, quod unus Bedellorum, ad hoc negotium a Vice-Cancellario deputandus,

a Promo uniuscujusque Collegii et Aulæ Schedulam manu Præfecti Domus, sive ejus vicem gerentis, consignatam, continentem nomina omnium Doctorum et Magistrorum istius Domus jus suffragii secundum conditiones prædictas vendicantium, quotannis post Comitata finita exigat et recipiat; quorum nomina una cum nominibus necessario Regentium, Doctorum commorantium, et Professorum et Prælectorum extra Collegia vel Aulas degentium, in librum referat, cujus libri exemplar apud Vice-Cancellarium reponatur. Omnes autem quorum nomina sic, ut præfertur, in illum referuntur librum, ad omnia exercitia præstanda, et onera subeunda, Gradui suo competentia, se firmiter teneri noverint.

§. 2. *De Modo ad magnam Convocationem conveniendi.*

POST monitionem a Bedello factam, singuli Doctores, Magistri Regentes et non Regentes in Universitate tunc præsentés, a propriis Collegiis et Aulis, (habitu Gradui competente induti,) hora constituta ad Domum Convocationis accedant; et, præeunte Vice-Cancellario, et uno e Bedellis proclamante, (*Magistri, intretis in Convocationem, per fidem intretis,*) locum Convocationi destinatum ingrediantur; eodemque habitu, necnon pileis suis (sicut et in Congregationibus) induti, in locis illic sibi assignatis consideant.

Causa Convocationis per Vice-Cancellarium exposita, de negotiis propositis mature deliberent; et (pro natura negotii) vel scriptis per scrutinium, vel viva voce, vel in aures Procuratoris,

vel denique per secessionem ad alteram partem Domus, suffragia ferant.

Nihil autem pro decreto aut concessio habeatur, quod Cancellarius sive ejus Vice-Cancellarius, vel ambo Procuratores sive eorum deputati, vel major pars Regentium et non Regentium negaverint. Præterquam in electionibus, quas liberas esse volumus, secundum antiquam consuetudinem, per majorem partem omnium suffragantium.

SECTIO II.

De Negotiis in Domo Convocationis tractandis.

§. I. *Enumeratio Negotiorum, quæ ad Domum Convocationis spectant.*

QUANDOQUIDEM negotia majoris momenti cum majore deliberatione sunt tractanda; et quæ ad universam spectant Academiam, ab universis approbari congruum est; statutum est, ut in Convocatione Doctorum, Magistrorum Regentium et non Regentium (prout de antiquo fieri consuevit) de majoribus negotiis, ac totum Universitatis corpus tangentibus, deliberetur et determinetur.

Veluti de legibus et Statutis rogandis, vel etiam abrogandis, interpretandis, moderandis; de Officiorum electionibus; de Delegatis ad certa negotia nominandis; de Dispensationibus licitis concedendis; de Præsentationibus ad Beneficia; de Computis sive Ratiociniis examinandis et approbandis; de Fundis sive Prædiis Universitatis dimittendis sive elocandis; de Literis ad Regiam Majestatem, Prælatos, Proceres, ac Judices sive alios quoscunque conscribendis; de amovendis

Academiæ dehonestamentis, et Gradu privandis. Denique, de quibuscunque ad statum, dignitatem, et incolumitatem Universitatisspectantibus.

§. 2. *De Statutis et Decretis in Domo Convocationis condendis et interpretandis.*

SI quando ex usu Academiæ futurum videbitur, aliquid de novo statuere vel decernere; vel, si quando circa Decreta et Statuta jam condita vel in posterum condenda, dubitatio aliqua emergat, unde ulterior eorundem explanatio requiratur, (modo ne, sub explanandi obtentu, sensus statuto cuivis affigatur, omnem ipsius vim eludens aut enervans; neve hæc explanandi potestas ad Statuta Regia auctoritate sancita vel confirmata extendatur, sine speciali ipsius Regis licentia;) statutum est, quod priusquam lex roganda, vel Statutum explanandum suffragiis Magistrorum Regentium et non Regentium permittatur, primo, ad hebdomadalem consessum Præfectorum Collegiorum et Aularum per Vice-Cancellarium referatur negotium.

Atque ubi, re mature perpensa, inter eos convenerit de verbis conceptis, sub quibus lex sciscenda aut Statutum explanandum illis videbitur, sub iisdem terminis res ad Magistros Regentes in Domo Congregationis, per Procuratores referetur, triduo ante Convocationem habendam.

In Convocatione autem sequente, iisdem verbis, quibus in Congregatione proposita fuerat, per Registrarium, mandato Vice-Cancellarii, palam recitetur. Ac demum, ubi Vice-Cancellarius, Procuratores, et major pars Regentium et non Regentium in terminos consenserint, sub quibus lex sciscenda, aut Statutum explanandum videbitur, sub iisdem terminis per Regis-

trarium palam ibidem recitentur; et de iisdem Regentium et non Regentium suffragia rogentur. Sub iisdem etiam terminis, in quos consensum fuerit, in Acta redigantur; nec ante diem trigesimum, immediate sequentem publicationem sive recitationem eorundem in Domo Convocationis, vim aut auctoritatem Decretorum sive Statutorum sortiantur.

Si quid vero interim (dum suspensa manet Statutorum auctoritas) contra quam iis cautum est, pœna dignum committi contigerit; vel (in universum) si quod delictum inciderit, contra quod speciali nullo Statuto cautum fuerit; Vice-Cancellarius (assidentibus sibi Procuratoribus et Præfectis Ædium in Conventu ordinario) pro arbitrio pœnam irrogabit: donec speciali aliquo Statuto, contra hujusmodi delictum, provisum fuerit.

§. 4. *De Materia dispensabili, in qua Convocationi dispensandi Potestas permissa est.*

CUM Statutorum rigorem, modo privatis hominum commoditatibus, modo necessitatibus ipsorum attemperari quandoque expediat; consuevit V. Domus Convocationis (penes quam est potestas Statuta et Decreta condendi) ex rationabili causa cum nonnullis dispensare.

Et primo, si a Statutis alicujus Collegii Statuta Universitatis in aliquo dissentiant, vel repugnent; statuit Universitas et declarat, quod cum Præfectis, Sociis, et Scholaribus quibuscunque hujusmodi Collegii, super observatione Statutorum Universitatis a Collegii Statutis dissentientium, eisque repugnantium, absque ulteriore aliqua supplicatione sive petitione, ipso jure dispensatum habeatur.

Deinde, si quis Lectiones vel Disputationes (ordinarias, et non pro forma) per alium præstare necessum habuerit.

Vel, si qui, olim hujus Universitatis alumni, perspectæ probitatis et eruditionis viri; quique per 15 aut 16 annorum spatium (computandum ab admissione sua ad Regendum) Theologiæ operam navarunt (iidemque ultra spatium 30 milliarium ab Universitate remoti) præstitis prius omnibus exercitiis, Gradus accumulare, sive simul capessere desiderent.

Vel, si qui propter interveniens impedimentum, vel causam sonticam (quo minus in proximis Comitibus realiter incipere possint, vel potuerint) in Convocatione vel Congregatione creari et inaugurari desiderent.

Vel, si qui Prælati, Magnates, vel Nobiles, honoris causa, Gradus Academicos intra Academiam suscipere cupiant.

Vel, si Universitati eosdem extra Academiam (missis qui Cancellarium, Procuratores, et Magistros Regentes repræsentent) iisdem Gradibus ornare visum fuerit.

Et universim, si qui alii fuerint casus, in quibus per Statuta Universitatis dispensare non negatum est, quique disciplinæ Academicæ non repugnant; in iis, ex necessaria et perurgenti aliqua causa (prius per Dominum Cancellarium, arbitrio Vice-Cancellarii, Procuratorum, et Præfectorum permissa, et per ipsos vel eorundem majorem partem approbata in conventu ipsorum hebdomadali) dispensationes in Domo Convocationis proponi licebit, et pro concessis haberi; si Vice-Cancellarius, Procuratores, et major pars Regentium et non Regentium assensum præbuerint.

§. 5. *De Materia indispensabili, in qua Convocationi dispensare non permittitur.*

QUIA ex nimia dispensandi licentia grave incommodum Universitati antehac obortum est, (nec aliter fieri potuit;) statuit et decrevit Universitas, ne, in posterum, dispensationes ullatenus proponantur in casibus sequentibus. Et primo, statuit et declarat, ne super aliquo Statuto vel Decreto (auctoritate Regia jubente vel monente) condito vel condendo, in toto vel in parte dispensatio proponatur, nisi pari auctoritate Regia, ejusdem mutatio, vel aliqualis relaxatio, expresse mandata vel permissa fuerit.

Secundo, statuit et declarat, ne circa supremas Benefactorum defunctorum voluntates, aut ordinationes eorum quascunque Universitati commendatas, nec circa conventiones vel compositiones inter ipsos Benefactores (dum superstites essent) et Universitatem initas (absque speciali et expresse ipsorum consensu), nec circa ordinationes aliquas ex Benefactorum voto vel rogatu, cum Universitatis consensu, editas vel edendas, aut Literas alicujus ipsorum (super Lecturis aut Lectoribus suis) Patentes, quicquam postea immutetur, vel de eodem immutando petitio aliqua in V. Domo Convocationis fieri permittatur.

Tertio, ne pro defectu temporis aut exercitiorum (ad aliquem Gradum Baccalaurei, Magistri, vel Doctoris in aliqua Facultate requisitorum), nec pro exercitiis (ad Gradum requisitis) post susceptum Gradum præstandis, præcipue, nec pro concione Latina post Gradum Baccalaureatus (ut olim) habenda, ullo modo dispensatio proponatur.

Quarto, ne dispensatio proponatur, ut quis-

quam Collegii Præfectus, Socius, vel Capellanus, vel in Aula aliqua commorans, vel intra quinquaginta milliaria ab Universitate habitans, (exceptis iis, qui in studio Theologiæ 15 vel 16 annos posuerunt, quibuscum si ultra 30 milliaria ab Universitate habitent, pro Gradibus cumulandis dispensare licebit,) ad cumulandos Gradus, vel ad Gradum Baccalaurei, et Magistri seu Doctoris, simul suscipiendum admittatur.

Denique statutum est, ne in aliquo casu præmisso (vel alio, de quo speciali Statuto, ne super eo dispensatio proponatur, cautum est) quisquam, sub pœna bannitionis, dispensationem proponat; nisi Cancellarius Præfectorum arbitrio rem permiserit, ut de consilio maturo in conventu ipsorum ordinario prius habito, ex necessaria et perurgenti aliqua causa (per Vice-Cancellarium, Collegiorum et Aularum Præfectos, et Procuratores, vel majorem partem eorundem, approbanda) hujusmodi dispensationem in Domo Convocationis proponi permittant.

§. 6. *De Electionibus in Domo Convocationis habendis.*

CUM in locum alicujus publici Prælectoris, aut Officiarii, aut communis ministri seu servientis (defuncti, cedentis, vel amoti) alterius electio; vel ad beneficium aliquod vacans (ad quod nominationis sive præsentationis jus Universitati competit) alicujus idonei electio habenda fuerit; statutum est, quod ante Convocationem habendam, negotium hujusmodi electionis vel nominationis, per Bedellos singulis Collegiorum et Aularum Præfectis, et per Præfectos Doctoribus et Magistris cujusque Domus die præcedente denunciatur.

Quodque, præter electionem Burgensium Parliamenti, (quam, viva voce, aut pedibus eundo in sententiam, fieri oportere, occasione litis motæ super ea re, Commissarii Parliamenti decrevere,) omnis electio ad officia et publicas lecturas, et nominatio ad beneficia, fiat per scrutinium in scriptis, in quo (Vice-Cancellario præsidente) Procuratores scrutatores erunt. Insuper, si in locum alicujus lectoris, officarii, aut servientis munus suum resignantis, habenda sit electio; fiat resignatio simpliciter et absolute, absque ulla resumendi conditione.

Juramentum Procuratorum.

1. *Qui a Vice-Cancellario juramento adstringentur, quod fideliter se in illo scrutinio gerent.*

2. *Et quod eum pro electo vel nominato pronuntiabunt, in quem major pars suffragantium consenserit.*

In scrutinio vero, ubi Vice-Cancellarius et Procuratores suffragati fuerint, quisque Doctorum, Magistrorum Regentium et non Regentium, secundum ordinem senioritatis, (quantum fieri potest,) accedat; et (Procuratoribus a latere Vice-Cancellarii utrinque sedentibus, et eorum altero schedulam sic accedenti exhibente) votum suum simpliciter et absolute inscribat.

Nec scrutatores prædicti, aut eorum alter, ante peractam electionem (nisi ex causa necessitatis) discedant. Quo in casu, schedula apud Vice-Cancellarium deposita, Vice-Cancellarius (aut alius ab ipso deputatus) ejusdem, dum abest, vices sustinebit.

Cum autem longius in electione processum fuerit, defecerintque qui suffragentur; priusquam scrutatores suffragiorum numerum ineant, superior Facultatis Artium Bedellus, per Domum Convocationis, ad suffragandum, alta voce præconizabit: *Magistri, ad suffragandum, prima vice*; deinde, ex intervallo unius horæ quadrantis, *Magistri, ad suffragandum, secunda vice*; et tertio, post alium horæ quadrantem, *Magistri, ad suffragandum, tertia vice*.

Tandem (postquam aliquamdiu accessuros expectaverint, nec quisquam accedat) prædicti scrutatores, eum, in quem, computatis suffragiis, majorem numero partem consensisse compererint (schedulis interim, quibus singulorum vota inscripta fuerint, penitus abolitis, et igni traditis) pro electo palam pronuntiabunt.

Si duo vel plures æqualem suffragiorum numerum sortiti sint, si Graduati fuerint, eorum senior, si Graduati non fuerint, tunc is, in quem Cancellarius (vel Vice-Cancellarius pro tempore existens) consenserit, pro electo habeatur; et ad officium suum (peractis præstitisque singulis, quæ ad hujusmodi admissionem requiruntur) e vestigio, si præsens fuerit, admittatur.

Postremo cautum est, quod in omni electione (antequam ad suffragandum accedatur) præsens Statutum, una cum Statuto regni de electionibus *Elizabethæ* 31. legatur.

Placuit Universitati ut nemo ad Regentiam ante Terminum Paschatis 1836. admissus in Electione aliqua suffragium ferre præsumat, priusquam Juramentum aliquando præstiterit sub hac forma:

“ Tu jurabis quod in Electionibus habendis

“ unum aliquem, et unum tantum semel (et non
 “ amplius) in singulis scrutiniis scribes et nomi-
 “ nabis; et quod neminem nominabis, nisi quem
 “ habilem et idoneum certo sciveris, vel firmiter
 “ credideris.”

§. 7. *De Delegatorum Nominatione et Munere.*

CUM varia Universitatis negotia, a paucis citius et commodius, quam a pluribus, expediuntur; eoque nomine, selectis quibusdam hominibus per Domum Convocationis delegentur, qui de iisdem deliberandi vel statuendi, cum nuda relatione ad Domum, vel cum relatione et approbatione simul, (prout prædictæ Domui videbitur,) potestatem habent; quos Delegatos nominandi jus penes Procuratores esse consuevit:

Ordinatum est, quod e singulis Facultatibus, et ex Doctoribus, Magistris Regentibus et non Regentibus aliqui seligantur, qui impositum sibi onus subire.

Quicquid vero Delegati omnes, vel major ipsorum pars, determinaverint in negotiis delegatis, cum nuda relatione ad Domum, sine ulteriore disceptatione ratum est; in delegatis vero cum relatione ad Domum, et approbatione ejusdem, totius Domus suffragiis denuo permittitur.

Cum præter Delegatos ad expedienda negotia intra Universitatem, opus sit nonnunquam delegari quosdam ad proseguenda negotia extra Universitatis præinctum; Statutum est, quod (quoties hoc usu venerit) ad mandatum Vice-Cancellarii et Procuratorum, singuli ad hujusmodi ne-

gotia, pro virili, prosequenda (modo hoc fiat expensis Universitatis) paratos se præstent.

Quoniam vero ad computandas rationes Vice-Cancellarii, Procuratorum, et aliorum, novos quotannis Delegatos pro arbitrio Procuratorum designari, haud e re Academiæ esse, usu compertum est; decretum est, quod, in posterum, stati Delegati per Vice-Cancellarium et Procuratores, cum consensu Domus Convocationis, nominandi sint, qui singulas rationes Universitati reddendas accipient, præterquam de quibus speciali decreto aliter cautum fuerit.

Quorum si major pars in Universitate præsens non fuerit, (quoties rationes quæcunque Universitati reddendæ fuerint,) Procuratores, vel eorum alter, cum consensu Vice-Cancellarii, totidem in locum absentium ad præsens subrogabunt, quot ad majorem partem explendam suffecerint.

Quod si quos e statis hisce Delegatis fatis concedere, vel alias Universitate excedere contingat; alii continuo in ipsorum locum, eadem auctoritate, subrogentur.

Hi autem Delegati, quamprimum nominati fuerint, in ipsa Convocatione (si præsentibus fuerint) alioqui coram Vice-Cancellario, exigente Seniore Procuratore, singuli juramentum præstabunt in hæc verba:

“ Tu jurabis, quod audies strictum et fidelem
“ computum, de omnibus et singulis computan-
“ dis per (&c.—) nec allocabis nisi quæ allo-
“ canda sunt; sepositis dolo, fraude, amore, et
“ invidia. Ita Deus te adjuvet, et hæc Sacro-
“ sancta Christi Evangelia.”

§. 8. *De Degradatione.*

CUM nonnulla sint delicta, quæ, contra Statuta hujus Universitatis admissa, Graduum ^aprivatione plectuntur; alia vero, quæ (licet alibi commissa) tamen propter infame supplicii (quo vindicantur) genus, detrahi prius insignia Academica, et delinquentes exauctorari postulant; ne stigmata, delinquentium personis merito inurenda, simul Graduum Academicorum dignitati labeculam aspergant; unde aliqua ad ipsam Universitatem redundet infamia:

Statutum igitur est, quod, quoties hujusmodi se tulerit occasio, si delinquens intra Universitatem præsens fuerit, Vice-Cancellarius (indicta prius Convocatione) ipsum, habitu Gradui competente indutum, in Domo Convocationis sistendum curet; ubi ipsum Vice-Cancellarius gravi ac severa oratione increpabit, simulque atrocitatem criminis sui ei ob oculos ponet; deinde, ipsius mandato, e Bedellis inferioribus unus singula Gradus sui insignia, primo pileum, mox caputium, deinde capam, postremo togam detrahet; ac eum in modum, cunctis insignibus Academicis exutum et nudatum, e Domo Convocationis proturbabit.

Quod si intra Universitatem præsens non fuerit, Vice-Cancellarius (indicta itidem Convocatione) ibidem delinquentis crimen, et pœnam degradationis per Statuta (aut alias ex decreto superioris Curiaë, vel ex congruo) irrogandam declarabit. Deinde, Doctorum, Magistrorum Regentium et non Regentium assensu rogato, instrumentum publicum a Registrario palam recitari faciet, in quo nomen, Gradus, et crimen

^a Tit. IX. Sect. VII. Tit. XXI. §. 14 et 19.

delinquentis exponantur; et ipse, de consensu Doctorum et Magistrorum Regentium et non Regentium, Gradu omni Academico exutus et exauctoratus pronuncietur et declaretur. Mox idem instrumentum, sigillo officii sui munitum, valvis magnæ Scholarum portæ appendendum curabit.

TITULUS XI.

De Congregationibus et Convocationibus Statuta generalia.

§. 1. *Congregationibus alii necessario, alii libere, intersunt: Convocationibus singuli, rite moniti, tenentur per Fidem interesse.*

STATUTUM est, quod singuli Doctores, et Magistri necessario Regentes (quotquot intra ambitum Academiæ commorantur) statim a cessatione pulsationis solennis campanæ ad Congregationem accedent; cui a principio ad finem intersint, nec, nisi venia a Cancellario aut Vice-Cancellario impetrata, discedant: Regentes vero ad placitum, quoties specialiter requisiti fuerint, aut alias, pro arbitrio suo, intersint.

Si quis ex necessario Regentibus vel venire neglexerit, vel secus quam oportet discesserit, pro prima vice uno solido, pro secunda duobus, pro tertia tribus solidis per Cancellarium vel Vice-Cancellarium mulctetur. Et si, debita præcedente monitione, ulterius in negligentia perseveraverit, a Domo Congregationis penitus excludatur.

Ad magnam vero Convocationem singuli Doc-

tores et Magistri, Regentes et non Regentes, debite præmoniti, venire; ibique, dum negotia ad Universitatem spectantia tractantur, permanere, (nisi justam absentiae causam, a Vice-Cancellario requisiti, ipsi approbaverint,) noverint se fide data Universitati obligari.

§. 2. *De Ordine sedendi in Convocatione et Congregatione.*

STATUIT Universitas et decrevit, quod in omnibus Congregationibus et Convocationibus, Cancellarius vel Vice-Cancellarius, in Cathedra, locum teneat principalem in medio. Deinceps, ex utraque parte Cancellarii vel Vice-Cancellarii, sedeant primo Doctores in S. Theologia: deinde, ex utraque parte Theologorum, ad dextram, Doctores in Medicina, ad sinistram Doctores Juris Civilis: salva tamen consuetudine, quæ hodie inter Juristas et Medicos obtinet, quod qui senior est (id est, prius præsentatus ad eundem Gradum) in sua Facultate, præ juniore in altera loci seu dignitatis prærogativam vendicet ac obtineat. Cui etiam consuetudini ne quicquam eo nomine derogatum volumus, si forte in hisce Statutis vel Rubricis, inter nominandas ex ordine ambas Facultates, unam alteri sæpius præponi vel prænominari contigerit. Juxta vero Cancellarium vel Vice-Cancellarium, utrinque paulo inferius, locum consuetum habeant Procuratores; et ad latera utriusque Domus Magistri Facultatis Artium, absque anterioris loci, vendicatione: præterquam quod Collegiorum et Aularum Præfectis, si qui sunt Magistri Artium duntaxat, et non Doctores, præ aliis Magistris locus superior concedatur.

§. 3. *In Domo Congregationis et Convocationis Latino Idiomate utendum. Loquendi Modus, et Vices servandæ. A Contumeliis abstinendum.*

STATUTUM est, quod quilibet, verba facturus in Domo Congregationis et Convocationis, Latino utatur eloquio, nisi (negotio sic requirente) Cancellarius lingua vernacula utendi libertatem permiserit. Quodque omnes, dum alii loquuntur, silentium præstent; nec quisquam de loco ad locum migret; aut loquendi vices seniori loquuturo præripiat; aut sæpius de eadem materia interstrepat; sed simul atque sententiam suam protulerit, aliorum iudicio ponderandam relinquat. Quodque a dicacitate, præsertim opprobriis, omnique indecenti verbo aut facto, penitus abstineant; sub pœna, quod, si quis in præmissis deliquerit, a Domo Congregationis vel Convocationis iudicio Cancellarii vel Vice-Cancellarii et Procuratorum, pro illo die, vel (si majori parti Domus videbitur) pro longiore tempore, excludatur: et insuper, obnoxius esto pœnis sancitis in Statuto de^a Contumeliis compescendis.

TITULUS XIII.

De Hebdomadali et Ordinario Conventu Præfactorum Collegiorum et Aularum.

QUO melius ea, quæ ad regimen et tranquillitatem Universitatis pertinent, expediantur et

^a Tit. XV.

procurentur; secundum ordinationem Serenissimi Regis CAROLI ejus nominis primi, gratiose nuper ad Universitatem super ea re transmissam, sancitum est, quod die Lunæ cujuslibet septimanæ, per totum annum, tam in vacatione quam Terminorum temporibus, (præterquam in principalibus et solennibus festis, aut ubi Vice-Cancellario videbitur, ex publica aliqua occasione, hujusmodi congressum intermittere,) hora prima pomeridiana (et etiam alias quandocunque Vice-Cancellario, ex urgente aliqua occasione, convocare videbitur) Dominus Vice-Cancellarius ejusve Deputatus, una cum Procuratoribus, et singulis Collegiorum et Aularum Præfectis tum in Universitate præsentibus, in loco certo et stato conveniant, ibique de privilegiis et libertatibus Universitatis (prout occasio emerit) tuendis deliberent; et de Statutis et Consuetudinibus Universitatis observandis, inter se tractent, inquirent, et concilium ineant. Et, si quid super bono regimine, profectu Scholastico, honestate, vel utilitate communi, et ex usu Academiæ, ipsi, vel major pars eorum, deliberato opus esse duxerint, de eodem deliberandi potestatem habeant; quo melius et consultius, post hujusmodi ipsorum deliberationem, in V. Domo Congregationis proponatur; et deinde, maturo cum consilio, in V. Domo Convocationis de eodem statuatur et decernatur. Si quis vero Præfectorum prædictorum in Universitate præsentium (cessante impedimento legitimo per Vice-Cancellarium approbando) ab hujusmodi congressibus frequenter se absentaverit, nomen ejus, tanquam personæ bono Universitatis regimini minus faventis, ad Cancellarium per Vice-Cancellarium deferatur.

TITULUS XIV.

De Vestitu et Habitu Scholastico.

§. 1. *De Vestitu Præfectorum, Sociorum, et Scholarium Collegiorum; et de modo in Vestibus servando a cæteris.*

STATUTUM est, quod omnes Præfecti, Collegiorum Socii et Scholares, necnon omnes sacris ordinibus initiati, prout Clericos decet, vestiantur; et ea observent, quæ canonicis sanctionibus præcipiuntur.

Quodque alii omnes (exceptis filiis Baronum in superiore Parlamenti Domo suffragii jus habentium, necnon Baronum ex gente Scotica et Hibernica) vestibus coloris nigri aut subfusi se assuefaciant; nec, quæ fastum aut luxum præ se ferunt, imitentur; sed ab iis procul absint.

Insuper, ab absurdo illo et fastuoso publice in ocreis ambulandi more, abstinere compellantur.

Etiam in capillitio modus esto; nec cincinnos, aut comam nimis promissam alant.

Si quis vero in præmissis deliquerit; si Graduatus fuerit; pœna 6s. et 8d. plectatur, toties quoties: si non Graduatus (si per ætatem conveniat) pœna corporali; sin minus, arbitrio Vice-Cancellarii vel Procuratorum (ita ut summam præfatam non excedant) coerceatur. Quas multas, partim ad Universitatis, partim ad proprios usus, exigendi Procuratores potestatem habeant.

§. 2. *De reprimendis et puniendis novos et insolitos Habitibus invehentibus.*

STATUTUM est, quod si contingat aliquos

in vestitu novos et insolitos habitus introducere, Vice-Cancellarius, et Præfecti Collegiorum et Aularum, habita inter se deliberatione, de eodem sententias suas in medium proferant.

Deinde, Vice-Cancellarius scissoribus sive sartoribus vestiariis hujusmodi vestes conficiendi potestate interdicat; et Præfecti suis singulis Scholaribus hujusmodi vestimentorum usu interdiciant.

Si majus remedio vitium invaluerit, nec pœnis, quamvis severis, (quas secundum qualitatem delicti pro arbitrio infliget Vice-Cancellarius,) morbi pertinacia expugnari possit; post tres monitiones, vel pœnas ordinarias ter inflictas, ad bannitionem procedere licebit.

§. 3. *De Habitu Academico singulis Gradibus et Facultatibus competente.*

STATUTUM est, quod omnes Doctores cujuscunque Facultatis, Baccalaurei etiam in Sacra Theologia, Medicina, et Jure Civili, Magistri et Baccalaurei in Artibus, Baccalaurei itidem in Musica, togas Gradui et Facultati competentes, hodie usitatas, juxta exemplar in ære incidendum, et in abaco Domus Convocationis reponendum, gerant.

Ambo Procuratores, eorumque Deputati, et Collectores Quadragesimales, habitu hodie usitato, juxta exemplar, induti incedant.

Baronum filii in superiore Parlamenti Domo suffragii jus habentium, necnon Baronum ex gente Scotica et Hibernica, toga talari deaurata, sive toga nigra laxè manicata serica cum epomide, et pileo quadrato cum apice deaurato, induti incedant. Baronetti autem toga talari ni-

gra deaurata, sive toga laxe manicata serica cum epomide, et pileo quadrato cum apice deaurato.

Superioris ordinis Commensales togam talarem sericam, sive ex quovis panno nigro confectam, cum ornamentis secundum exemplar, et pileum quadratum holosericum, Anglice *velvet*, cum apice; Commensales vero sive Communarii togam talarem, ex quovis panno nigro, non serico, confectam, cum ornamentis secundum exemplar, et pileum quadratum panno obductum cum apice, gerant.

Quod non Graduati, quotquot alicujus Collegii Socii, Probationarii, Scholares, Capellani, Clerici, et Choristæ, si modo in matriculam Universitatis sint relati, denique quotquot de fundatione Collegii cujusvis fuerint, Studentes insuper Ædis Christi, quoties in publicum in Universitate prodeunt, togis laxe manicatis, ita ut manicæ longitudo dimidiam partem longitudinis togæ non excedat, et pileis quadratis cum apice, induti incedant.

Batellarii vero, et Servientes, togam talarem hodie usitatam juxta exemplar gerant, et pileum quadratum sine apice.

Studentes in Jure Civili, nondum graduati, qui sedecim Terminos a tempore matriculationis compleverint, (vel etiam antea, modo de fundatione alicujus Collegii fuerint, cujus Statuta id fieri requisiverint,) togam talarem semimanicatum, juxta exemplar, gerant, et pileum quadratum cum apice.

Quod Artium Baccalaurei in omni actu Scholastico caputium fimbria pellita prætextum gerant; in tempore vero Quadragesimali Determinantes, tum in Scholis, tum in Choro Beatæ

Mariæ Virginis, quoties ad celebrandas preces convenerint, pellem etiam lanatam, secundum exemplar, adhibeant.

Graduati omnes, togas Gradui et Facultati competentes, et pileos quadratos cum apice, aut rotundos (Juristæ scilicet et Medici) gestabunt; præcipue in concionibus, ordinariis prælectionibus, et disputationibus publicis.

In concionibus vero solennibus, et singulis diebus Dominicis intra Terminum ante meridiem in templo B. V. Mariæ, etiam in Æde Christi; et in Quadragesima, et in Dominica Paschatis post meridiem ad S. Petri in Oriente, caputiis, sive a serico, sive e minuto-vario, obversis, concionibus intersint.

Concionatores itidem, habitu Gradui suo competente induti, (pro ratione temporis, prout ceciderit intra vel extra Terminum,) ad Ecclesiam accedant, et eodem induti conciones suas habeant, sub pœna *6s. 8d.*

Lectores et Professores publici, in lectionibus suis ordinariis, togis Gradui vel Facultati suæ competentibus, et pileo induti, ad Scholas accedant, et eodem habitu induti legant, ac iterum a Scholis recedant. In solennibus autem lectionibus in Vesperiis, pileis et caputiis Gradui et Facultati suæ competentibus induti, ad Scholas accedant, legant, ac iterum recedant.

Quoties vero ad Congregationes, Convocationes, preces publicas, et conciones ad Clerum accedant, omnes præter togas, caputia Gradui congrua; Doctores etiam capas, vel clausas vel apertas, adhibeant.

Doctores singulis diebus Dominicis intra terminum, ante meridiem, in Ecclesia B. Virginis

Mariæ; et in Quadragesima, et in Dominica Paschatis post meridiem in Ecclesia S. Petri in Oriente, capa, et caputio coccineo induti, concionibus intersint.

Insuper statutum est, quod omnes Academici, cujuscunque ordinis aut gradus fuerint, collari, vulgo vocato *band*, juxta exemplar, tum in privato tum in publico se induant.

Si quis vero in præmissis delinquere deprehensus fuerit, si non Graduatus fuerit, pro arbitrio Vice-Cancellarii vel Procuratorum, penso aliquo literario puniatur. Si Graduatus, pro prima vice qua deliquerit, *20d.* pro secunda, *3s. 4d.* pro tertia, *5s.* pro quarta, *6s. 8d.* et sic toties quoties. Si quis vero ad Congregationem vel Convocationem accesserit habitu competente destitutus, præter mulctam prædictam, nullam omnino suffragandi potestatem ea vice habeat. Quas mulctas ad usum Universitatis exigendi Vice-Cancellarius vel Procuratores potestatem habeant.

Ne vero quis præ novandi libidine ab exemplaribus in hoc statuto descriptis desciscere, novosque habitus introducere moliatur, statutum est, quod Vice-Cancellarius et Procuratores singulorum habituum exemplar aliquod ære incidendum, et in abacum huic usui destinatum, reponendum curabunt.

De Usu Habitus Academici.

CUM propter remissionem habitus Academici usum multa ac gravia incommoda huic nostræ Universitati proculdubio accrescant; Statutum est, quod Juniores omnium ordinum, quoties in

publicum in Universitate prodeunt, justo habitu Academico induti incedant.

Si quis vero infra Gradum Magistri in Artibus, aut Baccalaurei in Jure Civili, in hac parte deliquerit, pro prima, secunda, ac tertia vice, penso aliquo literario per Vice-Cancellarium, vel Procuratorum alterum, vel quemvis ex eorum Deputatis, puniatur.

Denique, si quis post hujusmodi pœnam ter impositam iterum in consimili delicto deprehensus fuerit, suspendatur insuper a Gradu quem ambit (si Vice-Cancellario et Procuratoribus visum fuerit) per unum terminum, toties quoties, et Libro Nigro, sive Registro Procuratorum, nomen ejus inseratur.

TITULUS XV.

De Moribus Conformandis.

Sect. I. *De Reverentia Juniorum erga Seniores.*

QUUM ad mores rite conformandos plurimum conducat ut singulis ordinibus pro dignitate cujusque sua tribuatur observantia; Statutum est, quod Juniores Senioribus, id est nondum Graduati Baccalaureis, Baccalaurei Artium Magistris, Magistri itidem Doctoribus, debitam et congruam reverentiam, tum in privato, tum in publico exhibeant; exempli gratia, ubi convenierint, locum potiolem cedendo, ubi obvii venerint, de via decedendo, et, si occasio postulet, ad justum intervallum caput aperiendo. Insuper quilibet Baccalaureus in Jure Civili vel

in Medicina (qui non etiam inceperit in Artibus) cuilibet Magistro in Artibus ejusdem anni cedere debet intra Universitatem, locumque dare.

- ² Si vero aliqui secus se gesserint (si intra Gradum Magistri in Artibus vel Baccalaurei in Jure Civili, vel in Medicina fuerint) a Vice-Cancellario aut Procuratoribus castigentur, vel admonitione gravi, vel penso aliquo literario, vel si Vice-Cancellario et Procuratoribus visum fuerit, repellantur a gradu per unum terminum toties quoties, et Libro Nigro Procuratorum inserantur nomina ipsorum. Cæteri autem, a Vice-Cancellario admoneantur, et si contumaces perstiterint, mulctentur insuper pro delicti gravitate, modo ne quinque librarum summam mulcta ista excedat; vel, si quando ulteriorem gradum ambient, repellantur a gradu per unum terminum toties quoties; et in Libro Nigro Procuratorum nomina ipsorum inserantur.

Sect. 2. *De coercendis otiosis et male feriatis Scholaribus in Civitate oberrantibus.*

Statutum est, quod Scholares per Civitatem ejusve Suburbia otiosi non obambulent; neque in Plateis, aut publico Foro, stantes aut comorantes conspiciantur.

- ² Si quis absque rationabili causa, a Procuratoribus vel Vice-Cancellario approbanda, hac in parte deliquerit, pro arbitrio Vice-Cancellarii vel Procuratorum puniatur.

Sect. 3. *De Domibus Oppidanorum non frequentandis.*

Statutum est, quod Scholares Oppidanorum seu Artificum Domos vel Officinas sine causa

rationabili non frequentent. Academici vero omnes abstineant ab ædibus infames seu suspectas Mulieres vel Meretrices alentibus, aut recipientibus; quarum consortio Christianis prorsus interdictum est. Et si quis in supradictis deliquerit, pro arbitrio Vice-Cancellarii, vel Procuratorum, puniatur.

- ² Quem in finem (in subsidium Vice-Cancellarii et Procuratorum) potestas sit Præfectis Ædium Domos Oppidanorum intrandi; ut explorent an aliqui e suis illic versentur de die vel de nocte. Si quis vero Magistratui vel Præfecto Domus, de nocte post clausas fores ostium pulsanti, fores sine mora vel tergiversatione non recluserit, pro prima vice mulctetur viginti solidis: secunda vero, commercio cum Privilegiatis, si Oppidanus fuerit; alias, Privilegio, ipsi interdicatorum.

Sect. 4. Quod Scholares Conventibus Municipii Oxoniensis, et Sessionibus et Assisis non intersint.

Statutum est, quod Scholares ad cœtus publicos quoscunque Municipii Oxoniensis non accedant: nisi qui per Statuta regni iisdem interesse debent. Vice-Cancellarius insuper, quandoque res ita postulet, Scholaribus omnino interdicit ne Conventibus Juridicis, vel Civitatis vel Comitatus Oxoniensis (qui Sessiones aut Assisæ vocantur) intersint. Si quis vero vel in hac, vel in illa parte, deliquerit, pro arbitrio Vice-Cancellarii aut Procuratorum pœnas dare teneatur.

Sect. 5. *De Cœnopoliis, seu Tabernis vinariis, Popinis, et Diversoriis non frequentandis, necnon de Oppidanis epulas Scholaribus sine venia pretio præbentibus.*

Statutum est, quod Scholares cujuscunque conditionis a Diversoriis, Cauponis, Cœnopoliis, ac domibus quibuscunque intra Civitatem, vel Præcinctum Universitatis, in quibus vinum, aut quivis alius potus, aut herba Nicotiana sive Tobacco, ordinarie venditur, abstineant: nisi ex causa necessaria et urgenti, per Vice-Cancellarium aut Procuratores approbanda. Quodque si quis secus fecerit, pro arbitrio Vice-Cancellarii aut Procuratorum puniatur.

² Insuper Oppidani (sive Privilegiati fuerint, sive non) qui, contra formam hujus Statuti, Scholares in illum finem in domus vel loca hujusmodi receperint, pro prima vice, viginti Solidos Universitati numerent; si secundo deliquerint, per duos menses; si tertio, per totum annum, commercium iis cum Scholaribus et Personis Privilegiatis interdicator; vel Privilegium, si fuerint Privilegiati.

³ Modis iisdem mulctator punitorque, si quis Oppidanus Scholari cuivis epulas pretio præbuerit, vel cibos ad mensam apparatus in Scholaris cujusvis usum in quodlibet Collegium sive Aulam quamlibet, vel in domum aliam quamcunque, intulerit vel immiserit; nisi veniam Collegii vel Aulæ Præfecti, cui sibi ex Legibus Academicis parendum est, idem Scholaris prius impetraverit.

Sect. 6. *De Nocturna Vagatione reprimenda.*

Statutum est, quod omnes Scholares cujus-

cunque conditionis, quos occasione quacunque extra Collegia sua vel Aulas vesperi agere contigerit, ante horam nonam (quæ pulsatione magnæ Campanæ Collegii Ædis Christi denunciari solet) ad Collegia et Aulas proprias se recipiant; et quod, statim a pulsatione ejusdem magnæ Campanæ, singulorum Collegiorum et Aularum Portæ occludantur et obserentur. Quibus occlusis explorent, si res ita postulet, Ædium Præfecti, perlustratis singulorum cubiculis (ex præscripto S. Regis Jacobi) utrum e suis aliqui extra Collegium vel Aulam suam pernocent seu vagentur. Quodque si quis postea extra Collegium proprium vel Aulam, in Domo quacunque vel Platea, vel alibi intra Præcinctum Universitatis repertus fuerit, (nisi causam rationabilem ostenderit, per Vice-Cancellarium vel Procuratores approbandam) pro arbitrio Vice-Cancellarii vel Procuratorum puniatur.

Sect. 7. De Ludis prohibitis.

Statutum est, quod Scholares, cujuscunque conditionis, abstineant ab omni lusus genere, in quo de pecunia concertatur; nec hujusmodi lusibus intersint sub pœna a Vice-Cancellario vel Procuratoribus infligenda. Quodque nemo intra Universitatem hujusmodi Ludis se exercentes excipiat: sub pœna viginti Solidorum pro prima vice; si vero secunda vice deliquerit, commercium cum Academicis ei interdicator.

Item quod abstineant ab omni genere lusus² vel exercitii, ex quo aliis periculum, injuria, vel incommodum creatur; veluti a Venatione ferarum cum Canibus cujuscunque generis, Viverris, Retibus, aut Plagis; necnon ab omni apparatu et gestatione Bombardarum, et Arcubalistarum;

sive etiam accipitrum usu ad aucupium: sub pœna pro arbitrio Vice-Cancellarii aut Procuratorum infligenda.

- 3 Item quod, intra Universitatem Oxoniensem aut Præcinctum, absque speciali venia Vice-Cancellarii, nec Funambuli nec Histriones (qui quæstus causa in Scenam prodeunt) nec Gladiatorum certamina sive spectacula permittantur; nec Academici eisdem intersint. Histriones vero, Funambuli, et Gladiatores contravenientes incarcerentur. Et Scholares (si qui ad hujusmodi spectacula confluentes deprehensi fuerint) arbitrio Vice-Cancellarii, vel Procuratorum puniantur.

Sect. 8. *De famosis Libellis cohibendis, et de Contumeliis compescendis.*

Statutum est, quod si quis aliquid scripto composuerit, unde alicujus existimatio et fama lædi possit; vel aliquid ejusmodi ab alio compositum exscripserit; vel quoquo modo in vulgus sparserit aut disseminaverit; vel si quis verbis contumeliosis quenquam impetiverit, vel in Concione, Oratione, Fabula, vel alio quocunque modo, quicquam publice protulerit vel ediderit, in quo Academici cujusquam existimatio et fama lædi possit, vel persona derisui seu ludibrio exponi; tanquam Pacis Universitatis Perturbator coram Vice-Cancellario conveniatur; et exemplar Libelli, Concionis, Orationis, sive Fabulæ exhibere, vel (si nullum habere se exemplar præ se ferat) ad objecta respondere teneatur. Et, si judicio Vice-Cancellarii convictus super horum aliquo fuerit, pro qualitate delicti (quæ ex circumstantiis et personis, tum profe-

rentibus, tum in quas convitia prolata sunt, censenda est) Incarceratione, vel Recantatione publica, vel Bannitione (pro arbitrio Vice-Cancellarii) præter satisfactionem Parti læsæ exhibendam, puniatur.

Sect. 9. De Vi et Injuria prohibenda.

Statutum est, quod si quis Academicus aut alius cujuscunque conditionis alteri damnum corporale quoquo modo intulerit vel de eo inferendo minatus fuerit, vel si quis alium ad pugnam laccessiverit, vel laccessitus acceptaverit, vel cultellum, pugionem, gladium, aut aliquod aliud genus teli, aut distrinxerit, aut intentaverit cum minis, aut ita, ut conjicere liceat animo lædendi factum, in his omnibus et similibus pars peccans satisfacere parti læsæ teneatur (pro ratione damni illati) arbitrio Vice-Cancellarii: et præterea, vel penso literario, vel mulcta, pro qualitate delicti, vel suspensione a gradu, si quem ambiat, vel etiam bannitione, ad arbitrium Vice-Cancellarii, puniatur.

Sect. 10. De Armis non gestandis.

Statutum est, quod nullus Academicus, aut alius, intra Universitatis ambitum, sive offensiva, sive defensiva arma vel tela de die vel de nocte gestet, exceptis, qui honestæ recreationis causa arcus cum sagittis portaverint. Et si quis secus fecerit, tanquam Pacis perturbatæ suspectus, fide-jussores de pace conservanda præstare teneatur, præter amissionem Armorum, quæ a Vice-Cancellario vel Procuratoribus, ut forisfacta, capiantur.

Sect. 11. *De Conventiculis illicitis reprimendis.*

Statutum est, quod nullus cujuscunque Gradus, sive Status, conventicula illicita intra Universitatis Præcinctum instituat, aut iis quovismodo intersit, aut in domo vel hospitio suo haberi permittat. Qualia censenda sunt, in quibus, contra Pacem publicam, Doctrinam vel Disciplinam Ecclesiæ, vel regimen et tranquillitatem Universitatis, quicquam deliberatum vel gestum fuerit: vel in quibus homines (secus quam Statutis Regni, Canonibus Ecclesiæ, vel Ordinationibus Universitatis permittitur) vel palam, vel occulte conveniunt.

- 2 Insuper, ne quis confœderationes sive conspirationes ineat, unde Cancellarius, Procuratores, seu alii Ministri Universitatis, in executione Officiorum suorum secundum Statuta et Ordinationes ejusdem, impediri vel perturbari possint, sub pœna bannitionis ab Universitate, vel in tempus aliquod, vel in perpetuum. Eisdem pœnæ obnoxius esto, quicumque hujusmodi conventicula ineuntes (sibi notos aut probabiliter suspectos) celabit; aut cum requisitus fuerit, eorum nomina prodere recusabit.

Sect. 12. *De Auctoribus et Fautoribus Dissensionis puniendis.*

Statutum est, quod nullus Academicus, cujuscunque conditionis, Pacem vel Concordiam impediatur; aut si qua inter aliquos dissensio exorta fuerit, (occasione Nationis, aut Patriæ, aut Facultatis, aut quacunque alia de causa,) eam foveat vel accendat; aut alteri partium opem aut consilium præbeat. Cujus criminis qui suspec-

tus fuerit, ut Perturbator Pacis conveniatur; et, si convictus fuerit, eisdem pœnis, quibus Pacis Perturbatores, subjiciatur.

Sect. 13. *De Oppugnatoribus et Violatoribus publicæ Auctoritatis, et Manuinentibus coercendis.*

Statutum est, quod nullus Academicus, aut alius, cuivis causæ ad alium pertinenti se immisceat coram Vice-Cancellario vel Procuratoribus, nisi fuerit alterius Partis in iudicium vocatæ Tutor, Procurator, Advocatus, Assignatus, Testis necessarius, Creditor, Fidejussor, Sponsor, Executor, Judex, Impar, aut Arbitrator in quacunque causa electus, vel alias, ex honesta aliqua causa, conjuncta persona.

- 2 Nec in causa propria vel aliena, contra Vice-Cancellarium, vel Procuratores, eorumve Deputatos, verba injuriosa vel opprobriosa proferat, aut quicquam, quod eosdem in executione Officiorum suorum quoquo modo (in iudicio aut extra) impediatur aut inquietet, agat aut conetur.
- 3 Quorum criminum qui rei fuerint (sive per convictionem, sive evidentiam facti) ut Pacis Perturbatores tractentur. Et qui se alienis causis et negotiis immiscet, tredecim solidos et quatuor denarios, qui autem verba contumeliosa (in iudicio vel extra) protulisse, vel publicos Officiarios præfatos in executione Munerum et Officiorum suorum impedivisse, convictus fuerit, quadraginta solidos Universitati solvere teneatur; ac demum a Gradu (si quem ambiat) per integrum annum repellatur. Quod si Privilegiatus fuerit aut Oppidanus, pro arbitrio Vice-

Cancellarii et quantitate delicti ad tempus Privilegio, aut commercio cum Privilegiatis, ei interdicitur.

- 4 Si quis vero eo audaciæ proruperit, ut in Cancellarium, vel Vice-Cancellarium, Procuratores, vel eorum Deputatos, sive Locum-tenentes, manus violentas injecerit, vel injicere tentaverit, vel minatus fuerit; eo ipso ab Universitate perpetuo expellatur, si Academicus fuerit; alias Privilegio vel commercio cum Privilegiatis respective ipsi interdicitur.

Sect. 14. *De Vehiculis.*

Statutum est, quod Scholares omnes ab usu Vehiculorum, quibus invehit solent ipsi aurigantes, quocumque nomine dicta sint, prorsus abstineant, nisi cui propter infirmam valetudinem aut rationabilem aliquam causam licentia a Procuratoribus concessa sit. Quod si quis secus fecerit, pro prima vice viginti solidis, pro secunda quadraginta solidis, Universitati multetur; pro tertia vero vice, libro nigro, sive Registro Procuratorum, inseratur nomen ejus; et ab omni gradu (si quem ambiat) per annum integrum repellatur. Si quis autem quarta vice hac in parte deliquerit, ab Universitate expellatur.

- 2 Insuper Oppidani qui, contra formam hujus statuti, istiusmodi vehicula Scholaribus elocasse deprehensi fuerint, pro prima vice quadraginta solidos, pro secunda centum solidos, Universitati numerent. Si tertio autem deliquerint, per sex menses; si quarto, iis per totum annum, commercium cum Academicis interdicitur.

Sect. 15. *De reprimendis sumptibus non Academicis.*

Quo melius studiis vacare possint, uti par est, Juniores Academici; et luxus atque fastus ab his sedibus repellantur; et porro sumptus non Academici imminuantur, atque etiam, si fieri possit, reprimantur; Statutum est,

2 Primum; Quod nulli Academico priusquam Gradum Baccalaurei in Artibus adeptus sit, vel, si Studiosus fuerit in Medicina vel in Jure Civili, priusquam quatuor annos a Matriculatione sua compleverit, liceat Equum aut Servum alere aut retinere, seu proprium, sive alienum, aut conductitium, nisi ex petitione sub chirographo Parentis vel Guardiani, (si quis sit, si non, ex sui ipsius petitione,) Tutori suo Præfectoque Collegii vel Aulæ, in qua degit, significanda, et, propter rationabilem causam, ab iisdem approbanda. Quorum approbatio a prædicto Collegii vel Aulæ Præfecto ad Vice-Cancellarium illico deferatur, et ab eo in Registro quodam peculiari penes ipsum asservando inseratur. Si quis vero Scholaris in præmissis deliquisse coram Vice-Cancellario vel Procuratoribus deprehensus fuerit; pro prima vice moneatur, et nomen ejus tanquam delinquentis in Registro prædicto inseratur; pro secunda, ab Academia amoveatur per unum terminum; pro tertia, per integrum annum.

3 Oppidanus insuper, si contra vim et formam hujus Statuti, cujusvis Scholaris, cui venia modo prædicto non antea concessa fuerit, Equum aluisse, vel consilio, dolo, aliove quocunque modo quo minus præsens Statutum ratum fiat, operam dedisse deprehensus fuerit: pro prima vice

quadraginta solidis mulctetur; pro secunda Commercium cum Academicis per sex menses, pro tertia per integrum annum, ei interdicator; necnon Privilegium, si fuerit Privilegiatus.

4 Et, quo melius hæc vim atque effectum habeant, tenentur singuli Collegiorum et Aularum Præfecti, ut a suis observentur Scholaribus, diligenter curare; et si qui contra hæc contumaciter deliquerint, eorum nomina ad Vice-Cancellarium deferre, ut rite puniantur.

5 Secundo; quod nulli Academico, priusquam Gradum Magistri in Artibus aut Baccalaurei in Jure Civili vel in Medicina susceperit, liceat Canem vel Canes cujuscunque generis alere vel habere sub quovis prætextu.

6 Porro Statutum est, quod nullus Academiae alumnus aut principalem aut consortem in cursu equorum se adhibeat, vel ipse equitando, vel pecuniam collatitiam ad eam rem subscribendo, aut alio quocunque modo: neque equorum cursui, neque gallorum pugnacium commissionibus, neque cujuscunque generis duellis adsit, aut ullo modo se immisceat; sub pœna amotionis ab Academia pro prima vice per unum terminum; pro secunda, per integrum annum; pro tertia vero, in perpetuum.

7 Denique ab omni certaminis genere interdictum est in quo volucres feræve e caveis emissæ, vel scopus aliquis, bombardis petuntur; et si quis hac in parte deliquerit, a Vice-Cancellario aut Procuratoribus vel penso aliquo literario, vel mulcta, vel bannitione, puniatur.

Sect. 16. *De delictis contra quæ nullo speciali Statuto cautum est, et de pœnis pro arbitrio infligendis.*

Statutum est, quod si quis pacem perturba-

verit, vel contumaciter se gesserit, vel aliquid contra bonos mores admiserit, de quo nullo speciali Statuto cautum est, licebit Vice-Cancellario aut Procuratoribus pœnam ei pro arbitrio irrogare.

- ² Denique Statutum est, quod Procuratoribus neque mulctam ultra quinque Librarum summam neque pœnam bannitionis vel in perpetuum, vel in tempus aliquod, licebit irrogare, nisi cum consensu Vice-Cancellarii; et quod nemo Gradu Artium Magistri, vel Baccalaurei in Jure Civili, vel Medicina insignitus, inquisitione extra curiam facta, puniatur, nisi salvo unicuique jure Appellationis ad Academiæ Cancellarium.

TITULUS XVI.

De Concionibus.

§. I. *De Concionibus ante Meridiem, Diebus Dominicis intra Terminum, habendis.*

STATUTUM est, quod quolibet die Dominico intra Terminum ante meridiem (nisi quatenus in his Statutis aliter provisum fuerit) Concio Anglice habeatur per Collegiorum Præfectos, per Decanum et Præbendarios Ædis Christi, per duos Theologiæ Professores, et per Hebraicæ Linguae Professore, ordine sequenti: cauto semper, quod Collegiorum Præfectis fas sit hasce concionandi vices inter se pro arbitrio commutare.

Ecclesiæ Christi.	Ecclesiæ Christi.
Coll. Magdal.	Coll. Wadham.
Coll. Novi.	Coll. Lincoln.

Ecclesiæ Christi.	Ecclesiæ Christi.
Coll. Omnium Anim.	Coll. Univers.
Coll. Merton.	Coll. Exon.

Ecclesiæ Christi.	Ecclesiæ Christi.
Coll. Corp. Christi.	Coll. Balliol.
Coll. Reginæ.	Coll. Jesu.

Ecclesiæ Christi.	Ecclesiæ Christi.
Coll. S. Jo. Bapt.	Coll. Pemb.
Coll. Trinit.	Reg. Prof. Theol.

Ecclesiæ Christi.	Ecclesiæ Christi.
Coll. Ænei-Nas.	Coll. Vigorn.
Coll. Oriel.	Margaretæ Prof.

Ecclesiæ Christi.
 Profess. Ling. Hebr.

Insuper placuit Universitati, quod hæ Con-
 ciones in Ecclesia B. Mariæ Virginis habeantur :
 præterquam quod, quoties Decano vel Præben-
 dario Ædis Christi concionandum est, iis, aut
 etiam aliis ipsorum vices suppleantibus, necnon
 solennes conciones habentibus in Natali Do-
 mini, in die Passionis Dominicæ, et in festo
 Ascensionis Domini, in Ecclesia Cathedrali Æ-
 dis Christi concionari sit permissum. Si quis
 secus fecerit, pœnam conciones omittentium
 incurrat.

§. 2. *De Concionibus habendis ante Meridiem diebus Dominicis extra Terminum, necnon Dominicis Quadragesimalibus et Diebus Fests ante Meridiem, ac Dominicis post meridiem per totum Annum.*

STATUTUM est, quod extra Terminum, in quolibet die Dominico ante meridiem, (præterquam in Dominica Paschatis quando in singulis Collegiis conciones ante sacram Synaxin sunt habendæ,) necnon in Dominicis Quadragesimalibus ante meridiem et in quolibet die Dominico post meridiem per totum annum, (excepto tempore magnæ Vacationis;) et in quolibet die festo per totum annum, (exceptis iis qui in tempore magnæ Vacationis occurrunt;) in Ecclesia Beatæ Mariæ Virginis, nisi quatenus in his Statutis aliter provisum fuerit, Concio vernaculo sermone habeatur. Has vero conciones seriatim peragere tenebuntur Sacræ Theologiæ Doctores et Sacræ Theologiæ Baccalaurei, Juris Civilis Doctores et Baccalaurei ac Artium Magistri, (sive in Theologia sive in Jure Civili studentes,) quotquot Presbyteri vel Diaconi fuerint; Magistri non ante duos annos ab Inceptione sua, Baccalaurei autem Juris non nisi post tres annos completos a suscepto Gradu: ita ut, cum ad simpliciter Juniorem Theologum deventum fuerit, ad Sacræ Theologiæ Doctores concionandi vices denuo revertantur. Proviso, quod tum Vice-Cancellarius et Procuratores pro tempore existentes, tum ii omnes qui Conciones ante meridiem diebus Dominicis intra Terminum habere tenentur, ab his vicibus seriatim obeundis semper excusentur.

§. 3. *De Concionibus Quadragesimalibus et in Dominica Paschatis post meridiem.*

STATUTUM est, quod solennis Concio quæ, in quolibet die Dominico durante Quadragesima, necnon in Dominica Paschatis post meridiem, ad Divi Petri in Oriente lingua vernacula haberi consuevit, in Ecclesia B. Mariæ Virginis in posterum habeatur; ad quas quidem Conciones habendas, viros idoneos nominandi ac designandi potestas penes Vice-Cancellarium sit: ita tamen ut eorum ratio imprimis habeatur, qui, per Statuta Collegiorum suorum, aliquam ex istis Concionibus in propriis personis habere adstringuntur.

Et quod nomina hujusmodi Concionatorum, quos privata Collegiorum suorum Statuta ad has Conciones adstringunt, Academiae Registro inserantur, prout antiquitus obtinuit.

Insuper placuit Universitati clausulas illas abrogare, quæ ad Conciones apud D. Petri in Oriente habendas quocunque modo pertineant.

§. 4. *De Concionibus quibusdam extraordinariis ad Ecclesiam B. Mariæ.*

STATUTUM est, quod (præter illas Conciones quæ in diebus Dominicis et Festis a Collegiorum Præfectis, Doctoribus et Baccalaureis S. Theologiæ, et Magistris Artium, et Baccalaureis Juris, ut præfertur, seriatim præstandæ sunt,) aliæ quoque extra ordinem, certis et statis temporibus, in Ecclesia Beatæ Virginis Mariæ habeantur: nimirum in Festo Inaugurationis Regiæ; et quinto Novembris pro communi liberatione totius Reipublicæ a Proditione Sulphurea; trigesimo Januarii, die martyrii Caroli

primi Regis ; et vigesimo nono Maii, die gratiarum actionis pro Rege ac Regia familia restauratis. Quas Conciones, aliquis ad id muneris a Vice-Cancellario assignatus habebit.

Porro Concionibus hisce extraordinariis annumerandæ sunt Prælectiones octo Theologicæ, quas, supremo Testamento suo, vir Rev. Johannes Bampton, A. M. in Ecclesia B. Mariæ, intra initium ultimi mensis Termini Hilarii atque finem tertiæ septimanæ Termini Trinitatis, quolibet anno, haberi mandavit. Statuit autem et declarat Academia, quod hæ Prælectiones, sive Conciones, diebus Dominicis intra Terminum ante meridiem, intra tempus præstitutum, semper habeantur.

Necnon in Dominica Quinquagesimæ, et ultima mensis Junii Dominica, ante meridiem ; ac in Dominica Pentecostes, tam ante, quam post meridiem ; Conciones lingua vernacula habendæ sunt per aliquos ad id muneris a Vice-Cancellario specialiter deputatos. Item in die Dominico Comitiorum, cum ante, tum post meridiem, et in die Mercurii proxime post Comititia ; et in utroque Conventu Comitatus, qui Assisæ vocantur ; ad quas aliqui per Vice-Cancellarium specialiter sunt designandi. Et in initio cujusque Termini, ac in Die Cineris in Capite Jejunii, coram Baccalaureis Determinaturis, Caputia, (obverso Rhene, seu pelle agnina,) gestantibus, et pro more in Scamnis Magistrorum sedentibus, Concio Latina habeatur, quam seriatim obire tenentur S. Theologiæ Professores, et alii in Theologia Graduati, sacris Ordinibus initiati ; aut vice illorum alii per Vice-Cancellarium approbandi.

§. 5. *De Concionibus Anniversariis habendis extra Templum Beatæ Mariæ.*

CUM Collegiorum quorundam Statuta, et cum Benefactoribus Conventiones, requirant, ut in quibusdam Collegiis Conciones publice coram Universitate habeantur; Statutum est, quod, prout fieri consuevit, in Collegiis hic nominatis, stans quibusdam diebus, Conciones publicæ habeantur.

Nimirum in Ecclesia Cathedrali Ædis Christi, in Natali Domini, in die Passionis Dominicæ, et in Festo Ascensionis Dominicæ.

In Collegio Beatæ Mariæ Magdalenæ, in Festo S. Marci Evangelistæ, et in Festo S. Joannis Baptistæ.

In Collegio Novo, in Festo Annunciationis Beatæ Mariæ Virginis, et in Dominica Trinitatis.

In Collegio Mertonensi, in Festo Sanctorum Philippi et Jacobi, et in Dominica prima mensis Augusti.

§. 6. *De Concionatoribus approbandis.*

STATUTUM est, quod in Ecclesia Beatæ Virginis Mariæ, aut alibi coram Universitate, nemo unquam concionari præsumat, nisi qui iudicio Vice-Cancellarii approbatus fuerit; quique sacris insuper Ordinibus initiatus, saltem Gradum Magistri in Artibus ante duos annos, aut Baccalaurei in Jure Civili ante tres annos susceperit.

Si quis secus fecerit, mulctetur, toties quoties, quinque libris.

§. 7. *De præmonendis Concionaturis, et Pæna eorum qui deficiunt.*

STATUTUM est, quod concionaturi Anglice ante duos saltem menses, Latine vero ante tres menses, præmoneantur, per Bedellum superiorem Sacræ Theologiæ, si in Universitate præsentés fuerint; sin minus, schedula tempus quo quis concionaturus sit indicans penes Præfectum Ædis, ejusve Deputatum, aut Thesaurarium, sive Bursarium, qui pro tempore fuerit, relinquatur. Ad has autem conciones seriatim habendas præmoneantur non solum ii qui actu in Universitate commorantur, verum etiam quotquot nomina sua in Promptuarii libro Collegii cujusvis, vel Aulæ, inscripta habent. Unusquisque vero sic præmonitus tenetur, intra spatium unius mensis ab accepta monitione, schedula tradita Bedello superiori Sacræ Theologiæ per se, vel per Præfectum Ædis suæ ejusve Deputatum, aut Thesaurarium, sive Bursarium, palam renunciare, utrum, tempore destinato, propria persona officio suo sit functurus. Quod si ipse non sit concionaturus, et tempus, quo concionari debet, acciderit extra Terminum, vel alio quovis die intra Terminum præter diem Dominicum, tenetur insuper eadem schedula idoneum aliquem substitutum nominare, (a Vice-Cancellario approbandum,) qui vicibus ejus fungi et possit et velit. Sin vero die Dominico intra Terminum habenda sit concio, (exceptis tantum iis Concionibus, quas, juxta Statuta, extra Templum Beatæ Mariæ haberi sit permissum,) nemini, quacunque de causa, præter aliquem e selectis Concionatoribus, posthac designandis, locum ejus supplere fas esto.

Si quis autem sic præmonitus vel schedulam

prædictam, intra tempus præstitutum, Bedello tradendam non curaverit; vel Concionem aut per se, aut per alium, uti præfertur, non habuerit; quinque libris Universitati mulctetur. Quam pœnam similiter incurrat Bedellus prædictus, si quem, culpa illius, (prout oportuit non præmonentis,) deficere contingat.

§. 8. *De selectis quibusdam Concionatoribus designandis.*

STATUTUM est, quod designentur decem Concionatores, selecti e numero Doctorum et Baccalaureorum in Sacra Theologia et in Jure Civili, ac Magistrorum in Artibus, qui, sacris Presbyteratus Ordinibus initiati, duos saltem annos ab Inceptione sua compleverint; vel, si Baccalauri fuerint in Jure Civili, qui tribus saltem annis Gradu prædicto fuerint insigniti. Horum vero Concionatorum (non sine ipsorum consensu) designatio fiat per Vice-Cancellarium et Procuratores, Sacræ Theologiæ Professorem Regium, et Prælectorem Dominæ Margaretæ Comitissæ Richmondiæ, tribus saltem eorundem consentientibus, quorum unus semper sit Vice-Cancellarius. Proviso quod, statim post hujusmodi designationem, Concionatoris cujusque nomen sigillatim, frequenti Convocatione, suffragiis venerabilis istius Domus probandum, sive improbandum, permittatur.

Horum erit Concionatorum, seriatim, juxta senioritatis ordinem quantum fieri potest, (nisi aliter inter se convenerint,) Conciones diebus Dominicis intra Terminum, tam ante quam post meridiem in Ecclesia B. Mariæ habendas, eorum omnium loco peragere, qui, rite præmoniti, se partes suas impleturos esse Sacræ Theologiæ Be-

dello superiori ante mensem non renunciaverint ; qui quidem Bedellus prædictos Concionatores de qualibet hujusmodi concionandi vice, nulla mora interposita, certiores facere tenetur. Cauto semper, quod Collegiorum Præfectis, si qui inter Concionatores hosce selectos numerentur, quotiescunque illis concionari contigerit, fas sit, si velint, concionandi ante meridiem sibi jus vindicare.

Ex his decem Concionatoribus officio suo cedant quinque quotannis ; prima vice sorte, vel comparatione inter seipsos facta ; deinde qui eodem munere per duos annos functi fuerint ; et subrogentur in eorum locum quinque alii, modo supra definito designandi, et a venerabili Domo Convocationis approbandi. Si quis vero ex hisce Concionatoribus fatis concesserit, vel se officio suo abdicaverit, alius in ejus locum, qui vices ejus suppleat in partem biennii nondum elapsam, forma supra definita continuo subrogetur.

Proviso semper, quod nemo, qui selecti Concionatoris officio per biennium integrum functus fuerit, in idem officium, nisi post annum alterum elapsam, iterum designetur.

§. 9. *De Concionatoribus remunerandis.*

CUM nihil fere vel ad veram Religionem, vel ad ipsius Academiæ dignitatem promovendam magis pertinere videatur, quam ut sacræ Conciones rite peragantur ; cumque æquum omnino ac justum sit, ut iis, qui gravissimo hoc munere funguntur, condigna quodammodo remuneratio accedat ; Statutum est, quod S. Theologiæ Doctores et Baccalaurei, Juris Civilis Doctores et Baccalaurei, ac Artium Magistri, quotquot Presbyteri vel Diaconi fuerint, (Magistri non ante

duos annos ab Inceptione sua, Baccalaurei autem Juris non nisi post tres annos completos a suscepto Gradu,) singuli qualibet anni quarta parte summam unius solidi et sex denariorum solvere teneantur; exceptis Vice-Cancellario et Procuratoribus pro tempore existentibus, quos Academia semper ab omni concionandi vice immunes esse voluit; et exceptis etiam iis omnibus, qui Conciones ante meridiem diebus Dominicis intra Terminum habere tenentur. Horum autem unusquisque, pro qualibet sua concionandi vice, solvat in fiscum Academiae quinque libras ac quinque solidos.

Has autem summas, ratione habita non solum eorum qui actu in Universitate commorantur, verum etiam eorum quotquot nomina sua in Promptuarii libro Collegii cujusvis vel Aulæ inscripta habent, a Præfecto Ædis cujusque, vel a Thesaurario, sive Bursario, exigere tenetur Sacrae Theologiæ Bedellus superior, ac easdem Vice-Cancellario protinus deferre.

Ex hisce quidem pecuniis Vice-Cancellarius primum dicto Bedello, in proprios usus, pro studio et labore adaucto, quinque et septuaginta libras annuatim numerabit; deinde vero, aliis etiam pecuniis, siquando opus fuerit, e fisco Academiae desumptis, (iis scilicet quæ per Decretum Convocationis anno 1802. sancitum ab Academicis exiguntur,) id præcipue curabit, ut cuilibet Concionatori, pro re nata, hæ quæ sequuntur summæ, statim post habitam Concionem, semper solvantur; scilicet,

Cuilibet Concionem extraordinariam, vernaculo sermone, ad Ecclesiam Beatæ Mariæ habenti, (excepto Prælectore Bamptoniano,) necnon Concionem in Dominica Paschatis post me-

ridiem ad Ecclesiam D. Petri in Oriente, sex libræ ac sex solidi ;

Cuilibet, die Dominico intra Terminum, coram Universitate Concionem habenti, (exceptis Concionibus istis anniversariis quæ juxta Statuti hujusce Sect. 5. extra templum B. Mariæ habendæ sunt,) quinque libræ ac quinque solidi ;

Cuilibet, die Dominico post meridiem, durante Quadragesima, ad Ecclesiam D. Petri in Oriente Concionem habenti ; vel die Festo intra Terminum ad Ecclesiam B. Mariæ ; quinque libræ ac quinque solidi ;

Denique, cuilibet coram Universitate, juxta hæc Statuta, Concionem habenti die Dominico, vel die Festo, extra Terminum, (exceptis Concionibus istis anniversariis quæ juxta Statuti hujusce Sect. 5. extra templum B. Mariæ habendæ sunt,) quatuor libræ ac quatuor solidi.

Statutum est etiam, quod de pecuniis omnibus ab Academia, juxta hanc Ordinationem receptis et expensis, Vice-Cancellarius quotannis rationem reddet ; quodque insuper, in Termino Michaelis, schedulam parabit, quam ad singulos Collegiorum et Aularum Præfectos, necnon ad cujuslibet Collegii ac Aulæ Bibliothecam, curabit deferri ; ut cunctis liquido appareat qui sit rei hujusce status, quid intra annum receptum et expensum fuerit, quantumque harum pecuniarum, subductis rationibus, in fisco Academiae supersit.

§. 10. *De Commemoratione publicorum Universitatis Benefactorum, præ Concionibus solennibus intra Universitatem habendis.*

STATUTUM est, quod in Precatione ante Conciones Latinas cujusque Termini initiales ;

item in Concionibus ante et post meridiem in Comitibus; etiam in Festivitate Inaugurationis Regiæ, et coram Judicibus sive Justitiariis Assisarum; per quemcunque Universitatis nostræ Oxoniensis concionaturum, expressa et grata fiat Commemoratio publicorum Universitatis Oxoniensis Benefactorum; scilicet, Illustrissimi Principis *Humfredi* Glocestriæ Ducis, *Johannis Kempe* Cantuariensis Archiepiscopi, *Thomæ Kempe* Londinensis Episcopi, *Margaretæ* Comitissæ Richmondiaë, *Henrici VII.* et *Elizabethæ* Uxoris ejus, *Richardi Lichfield* Archidiaconi Middlesexiæ, *Thomæ Wolsey* Cardinalis et Archiepiscopi Eboracensis, *Henrici VIII. Mariæ* Reginæ, *Elizabethæ* Reginæ, *Jacobi* Regis, *Thomæ Bodley* Militis, *Henrici Saville* Militis, *Gulielmi Sidley* Militis, *Nicolai Kempe* Militis, *Thomæ White* S. Theologiæ Doctoris, *Gulielmi Cambden* Armigeri, *Richardi Tomlins* Armigeri, *Gulielmi Heather* Musicæ Doctoris, *Caroli I.* Regis et Martyris, *Edvardi* Comitis de Clarendon, *Gulielmi Laud* et *Gilberti Sheldon* Archiepiscoporum Cantuariensium, *Henrici* Comitis de Danby, *Henrici Birkhead* Armigeri, *Georgii I.* Regis, *Johannis Radcliffe* Medicinæ Doctoris, *Nathanielis* Baronis Crewe Episcopi Dunelmensis, *Richardi Rawlinson* Juris Civilis Doctoris, *Caroli Viner* Armigeri, *Georgii Henrici* Comitis de Litchfield, *Caroli Godwyn* Sacræ Theologiæ Baccalauræi, *Johannis Bampton* Artium Magistri, *Francisci* Baronis Godolphin, *Johannis Sibthorpe* Medicinæ Doctoris, *Johannis Wills* S. Theologiæ Doctoris, *Georgii Aldrich* Medicinæ Doctoris, *Georgii III.* Regis, *Josephi Boden* Armigeri, *Annæ Kennicott* Viduæ, et *Roberti Taylor* equitis aurati: vel cu-

juscunq̄ue alterius, quem posthæc in Album Benefactorum referre Universitati placebit: sub pœna decem solidorum, toties quoties. Alias vero ipsos commemorare nemo teneatur. *

§. II. *De Offensionis et Dissensionis Materia in Concionibus evitanda.*

STATUTUM est, quod si quis pro Concione aliqua, intra Universitatem ejusve præcinctum habita, quicquam Doctrinæ vel Disciplinæ Ecclesiæ Anglicanæ publice receptæ dissonum aut contrarium, aut publica auctoritate, ad tempus vel aliter, prohibitum, protulerit, sive protulisse ab ipso Vice-Cancellario suspectus, vel ab alio aliquo, rationabilem suspicionis causam afferente, delatus fuerit; quod postulanti Vice-Cancellario, sive ejus Deputato, Concionis suæ verum exemplar, eisdem terminis conscriptum, virtute juramenti tradet; vel, si prætendat se exemplar non habere, de iis, de quibus suspectus vel delatus fuit, directe virtute juramenti respondebit.

Deinde vero Vice-Cancellarius, sive ejus Deputatus, verbis sensuve eorum, quæ in quæstionem vocantur, in medium prolatis, et rite perpensis, adhibito consilio sex aliorum S. Theologiæ Doctorum, (quorum unus sit S. Theologiæ Professor Regius, si Concioni interfuerit,) si quem criminis objecti reum invenerit, eum pro arbitrio vel a munere prædicandi intra præcinctum Universitatis suspendet; vel ad ea, quæ protulit, recantandum adiget. Sin verba ad seditionem aliquam in Universitate, vel Societate, sive Communitate aliqua excitandam, Vice-Cancellario tendere videantur, ipse solus Vice-Cancellarius, adscito sibi uno aliquo Sacræ Theologiæ Doctore, qui interfuit, incarceratione, mulcta

pecuniaria, vel recognitione publica (prout ipsi videbitur) puniat: et prædictorum criminum suspectus perturbatæ pacis reus habeatur.

§. 12. *De Officiis Divinis, seu Precibus solennibus juxta Liturgiam Ecclesiæ Anglicanæ, et Concionibus publicis, frequentandis.*

STATUTUM est, quod ad Officia Divina, sive Preces solennes juxta Liturgiam Ecclesiæ Anglicanæ, et Conciones publice coram Universitate habendas, omnes Doctores, Magistri, Graduati et Scholares, diligenter accedant, et eisdem debita cum reverentia et attentione, quoad peractæ fuerint, a principio usque ad finem intersint; nec quisquam, dum ejusmodi Divina Officia et Conciones coram Universitate habentur, ad aliam Ecclesiam, vel Ecclesias, divagetur; sub pœna quod si quis secus fecerit, tribus solidis ac quatuor denariis mulctetur.

Nemo autem unquam, cujuscunque demum Gradus et conditionis fuerit, vel cuilibet istorum cœtui, qui ab Ecclesiæ Anglicanæ Doctrina vel Disciplina dissentiunt, sese quovismodo immisceat; vel Concionibus, aut Divinis Officiis quibuscunque, intersit, nisi quæ palam habeantur in locis ab auctoritate Episcopali (prout in Ecclesia Anglicana recepta est) ad hos usus destinatis.

At si quis contra hoc Statutum deliquisse deprehensus fuerit, mulctetur, prima vice, sex solidis et octo denariis; secunda vice, tredecim solidis ac quatuor denariis, atque insuper a Vice-Cancellario, assidentibus ipsi Procuratoribus et Ædium Præfectis in conventu suo ordinario, serio admoneatur; tertia autem vice, ab Academia in perpetuum amoveatur.

Denique Statutum est, quod in Termino Mi-

chaelis, mense scilicet Novembris, quolibet anno, modo supra præfinito, selectorum Concionatorum designatio semper fiat.

Omnes insuper, qui Termino Michaelis proxime sequenti concionari debent, ante duos menses præmoneantur; ac schedulam, forma supra præfinita, intra mensem ab incepta monitione, Sacræ Theologiæ Bedello superiori tradere teneantur.

TITULUS XVII.

De Officiariis Universitatis.

SECTIO V.

§. I. *De Nominatione et Officio Magistrorum Scholarum.*

MAGISTRI Scholarum tres sunt, quorum unus a Domino Vice-Cancellario, unus ab utroque Procuratore, in venerabili Domo Convocationis, primo die Termini Trinitatis, ex Magistris in Artibus qui ad regendum admissi fuerint quotannis nominetur; exceptis semper iis, qui Procuratorum Deputati in Termino Paschatis proxime præcedenti nominati fuerint. Proviso semper, quod nemo, qui Magistri Scholarum officio per biennium functus fuerit, in idem officium, nisi post annum elapsum, iterum nominetur. Cautio etiam, quod nemo Magistri Scholarum et Examinatoris Publici officio simul fungetur.

Hi Magistri Scholarum statim a nominatione sua officium suum ineant, prius tamen in Domo

Convocationis per Seniores Procurores juramento onerentur sub hac forma :

Magister, tu jurabis quod ea omnia et singula quæ ad officium Magistri Scholarum spectant bene et fideliter, omnimoda partialitate seposita, durante tuo Officio exequeris.

Horum igitur munus esto in Scholium **RESPONSIONIBUS** in Parvise Quæstiones proponere, secundum Statuti de hisce **RESPONSIONIBUS** sanciti vim et vigorem ; item Quadragesimalibus Baccalaureorum Determinantium **LECTIONIBUS** præesse, juxta Statuti de hac re sanciti exigentiam : ita ut Baccalaureorum Determinantium **LECTIONIBUS** in singulis Scholis unus saltem ex Magistris Scholarum, **RESPONSIONIBUS** autem Scholium in Parvise bini ad minimum, per integrum tempus intersint, et, quantum in ipsis est, ne quid vel in **LECTIONIBUS**, vel in **RESPONSIONIBUS**, contra bonos mores aut pacem Universitatis peccetur, provideant.

Magistri autem Scholarum, in absentia Procuratorum, singulis diebus Exercitiis hisce destinatis, intra Scholarum præinctus Procuratoriam habeant potestatem.

§. 2. *De Magistris Scholarum et Procuratorum Deputatis remunerandis.*

QUO Scholarum Magistris et Procuratorum Deputatis debitæ accedant remunerationes, Statutum est, quod, post annum finitum, Dominus Vice-Cancellarius, acceptis a ^aProcuratore Ju-

^a Vide Tit. VI. Sect. I. §. 4.

niore et ^bSeniore Scholarum Magistro pecuniis quas ei in manus tradere tenentur, et aliis insuper, quantum opus fuerit, e Cista Academica depromptis, (iis scilicet quæ per Decretum Convocationis anno 1802 sancitum ab Academicis exiguntur,) id semper curabit, ut unicuique e tribus Scholarum Magistris annua octoginta librarum pensio, et unicuique e Procuratorum quatuor Deputatis annua octoginta librarum pensio, persolvatur. Proviso semper, quod in pensionibus hisce solvendis pecuniarum earum ratio habeatur, quæ jam Magistris Scholarum, et Procuratorum Deputatis, vel ex legatione Benefactorum, vel ex decreto Convocationis, vel alio quocunque nomine debentur; ita ut, connumeratis omnibus, pensiones istæ modum supra præscriptum non excedant.

SECTIO VI.

De Magistris Vicorum designandis, et eorum Officio.

PRÆTER internos Regentiæ suæ actus, quos Magistri necessario Regentes intra Domum Congregationis (ut præfertur) exercent, iidem etiam, tanquam annui Universitatis officarii, alios externos Regentiæ suæ actus, foris et extra Domum Congregationis, exercere tenentur. Consuetudo enim est, quod, incipiente Termino Michaelis, Procuratores Universum municipii Oxon. et suburbiorum ejusdem circuitum, in quosdam vicos seu plateas distributum, inter aliquot Regentes partiantur, qui Magistri vicorum nuncupantur.

^b Ibid. Sect. II. §. 7.

Quorum est, pacem Domini Regis et Universitatis in eisdem vicis (si qua tulerit occasio) custodire; munditiæ vicorum, et ne quid incommodi aut detrimenti, ex communibus nocumentis, sordibus, et fimis illic congestis oriatur, prospicere: eosque, quorum interest, hujus rei admonere; et negligentes sive non curantes, modis quibus poterint, ad remedium adhibendum cogere.

Juniores Scholares, in iisdem vicis otiose, et absque habitu sibi competente, obambulantes, aut commorantes, aut immodeste se gerentes, aut debitam reverentiam senioribus non exhibentes, corripere et increpare, eosque, ut ad Aulas et Collegia sua se recipiant, cogere.

Recusantes autem et inobedientes, tum Vice-Cancellario et Procuratoribus denunciare, tum a Gradibus Scholasticis impedire et prohibere, secundum Statuta prius posita, et non aliter.

TITULUS XIX.

De Feodis ad Universitatem, Officiarios, et Servientes pertinentibus.

QUONIAM varia ac multiplicia Feoda, pro diversa personarum et Graduum conditione, multis nominibus exigenda veniunt; quæ omnibus nota et perspecta esse illorum interest, tum quibus, tum a quibus debentur, (horum siquidem ignorantio, et hos fraudi magis opportunos, et illos iniquis suspicionibus magis obnoxios reddit;) statutum est, quod *Feoda* ad Universitatem, officia-

rios, et servientes quoscunque spectantia, severe ac diligenter examinata, et in *tabulas pensiles* redacta, in Apodyterio Domui Congregationis vicino, palam omnibus spectanda et legenda proponantur; nec ultra Feoda illic præstituta, quisquam a quovis, Feodi nomine, quicquam exigere præsumat, sub pœna pro arbitrio Cancellarii irroganda. Sed nec Feoda sibi debita quisquam per se et immediate a quovis recipiat, sed Bedellorum opera et ministerio in colligendis Feodis sibi debitis utatur.

Illud ante omnia cavendum districte præcipimus, ne Feoda expressa in *tabulis Archetypis* (sigillo Honoratissimi Cancellarii Gulielmi Archiepiscopi Cantuar. signatis, et una cum authentico Statutorum exemplari in chartarum ac munitamentorum abaco repositis) quovis prætextu aut colore posthac augeantur seu amplificentur; neve quis de amplificandis Feodis hisce, aut eorum quocunque, supplicationem ullam in *Domo Convocationis* proponere præsumat, sub pœna *bannitionis* ipso facto incurrendæ, nisi prius Cancellarius Præfactorum arbitrio rem permiserit, iique in conventu ipsorum ordinario, supplicationis æquitate rite pensata, dignam censuerint quæ ad venerabilem *Domum Convocationis* referatur.

Supplementum ad Statutum Tit. XIX.

COLLECTIS, denique, vel Procuratorum vel Bedellorum opera, omnibus Feodis, ad Universitatem spectantibus, in Cista quidem Academica reponantur ea, quæ hactenus Bedellorum et Clerici sive Æditui Universitatis propria sunt habita,

et, eorum vice, posthac annuatim percipiant Bedelli Superiores integram quisque summam Ducen-
tarum et Quinquaginta Librarum, et Bedelli
Inferiores integram quisque summam Centum
Librarum, Clericus autem sive Ædituus Univer-
sitarum integram Centum et viginti Librarum
summam, a Vice-Cancellario post finitum quem-
que Terminum æqualibus portionibus dinume-
randam.—Proviso tamen, quod hæc ratio Be-
dellorum remunerandorum, non nisi post vaca-
tionem officii per Bedellos anno 1823 existentes,
prout respective contigerit, effectum habeat.

TITULUS XX.

De Bonis et Locis publicis Universitatis.

§. 6. *De Platearum Regimine.*

QUONIAM indecorum juxta et insalubre est,
plateas aut angiportus intra præcinctum Univer-
sitarum (illas præcipue, quæ ad loca publica du-
cunt, et vulgo pedibus hominum teruntur) ne-
glectas jacere, fimo ac sordibus oppletas; alibi,
omnino non stratas; alibi, extrito et comminuto
pavimento salebrosas; Statutum est, quod dein-
ceps, singuli præ foribus suis pavementum lapi-
dibus sterni et complanari curabunt. Si quis
autem a Vice-Cancellario monitus, intra tempus
præstitutum sternendum non curaverit, poena
esto pro arbitrio Vice-Cancellarii: quod si in
contumacia sua perstiterit, si privilegiatus, pri-

vilegio, si oppidanus, commercio cum privilegiatis, ipsi interdicatur.

Item, quod nemo sordes, retrimenta, vel ruderata, imbris tempore in plateam projiciat, pluviæ beneficio pro fimigerulo usus; sub pœna 20s. legitime super hoc convicto, toties quoties, per Vice-Cancellarium infligenda.

Item, quod nemo præ foribus suis fimetum aut sterquilinum congerat; sed intra domesticos parietes contineat quicquid sordium aut fimi egerendum habet, quoad fimigerulus (vulgo *scavenger* dictus) cum plaustro fimum omnem avecturus accesserit, sub mulcta 3s. 4d. toties quoties, irroganda.

Quem in finem statutum est, quod Universitas ad hoc fimigeruli munus, semper honestæ conditionis aliquem sub sigillo suo deputatum habeat, qui juxta condiciones, et pacta conventa inter ipsum et Universitatem, hoc munus sedulo exequetur, et pactam mercedem, pro rata cujusque domus, recipiet.

Quod si quis pro rata ad hunc usum contribuere recusaverit, præter mulctam arbitrio Vice-Cancellarii irrogandam; si privilegiatus fuerit, privilegio; si oppidanus, commercio cum privilegiatis, ipsi interdicatur.

Insuper ne tempore hiberno, cum illunes fuerint noctes, cæci in tenebris palpare necesse habeant, quos urbem vesperi obambulare cogunt aliquando negotia; statutum est, quod deinceps, singulis annis, a festo Omnium Sanctorum usque ad festum Purificationis B. Virginis, ab hora sexta vespertina usque ad nonam, lucernæ præ foribus singulorum Collegiorum ac Aularum, necnon privatarum ædium, suspendentur, sub

pœna 1s. omittentibus, toties quoties, per Vice-Cancellarium infligenda.

TITULUS XXI.

De Judiciis.

§. I. *De Jurisdictione Universitatis tuenda.*

CUM non solum juxta privilegia, a Serenissimis Regibus inclyti hujus Regni, et Prælatibus (Studiosorum tranquillitati gratiose consulentibus) concessa et indulta; verum etiam secundum diuturnam consuetudinem, quæ memoriam hominum excedit, potestas cognoscendi ac terminandi omnes causas, Scholares aliasque personas privilegiatas quoquo modo concernentes, (exceptis causis liberi tenementi, mahemii, felonæ, et prodicionis,) ad Cancellarii Universitatis jurisdictionem spectet et pertineat; Statutum est, quod nullus Scholaris vel persona privilegiata, de quacunque causa in Universitate terminabili, quempiam in Curia aliqua extra Universitatem (nisi ordine appellationis servato) conveniat: nec cujusquam alterius Curie jurisdictioni ultro se submittat; sed alibi impeditus, Cancellarium vel Vice-Cancellarium, quamprimum poterit, de lite sibi intentata certio-rem faciat; et modis quibus poterit, privilegiorum Universitatis hac in parte conservatio- nem sollicite curet; sub pœna, quod, si quis Scholaris vel persona privilegiata secus fecerit, ut perturbator pacis incarceretur et mulctetur;

et, si in contumacia perstiterit, privilegiis Universitatis exuatur. Persona vero non privilegiata, vel oppidanus, qui Scholari vel personæ privilegiatæ extra Universitatem in hujusmodi causis litem intentaverit, commercio cum Scholaribus et personis privilegiatis interdicto, donec satisfecerit, coerceatur: extraneus vero, tanquam jurisdictionis Universitatis contemptor, si apprehendi poterit, incarceretur. Cancellarius etiam, et Vice-Cancellarius, omnesque alii, pro sua cujusque auctoritate ac potestate, quo minus in hac parte Universitatis privilegia violentur, se, virtute juramenti Universitati præstiti, teneri et obligari noverint.

§. 2. *De Curia Commissarii sive Vice-Cancellarii Universitatis.*

PRO expediendis majoris momenti causis in Universitate controversis, Statutum est, quod semel in qualibet septimana Terminorum temporibus, et vacationum etiam, (quamdiu Vice-Cancellario expedire videbitur,) die scilicet Veneris post meridiem, in Boreali Sacello Ecclesiæ B. Virg. Mariæ, aut alio loco per Universitatem assignando, Curia habeatur. Cui præsit Commissarius sive Vice-Cancellarius Universitatis, ejusve Deputatus; assidentibus sibi duobus, (cum ipsis videbitur,) qui pro tempore fuerint, Universitatis Procuratoribus.

Coram quibus, Procuratores ad lites, quiete et modeste, ea omnia edant, proferant, et exhibeant, quæ ad causas directe facere videbuntur: edita vero, prolata, et exhibita, Curia Registrarius ex mandato judicis, vel ad requisitionem

partis, fideliter describat, in acta redigat, et custodiat.

Singulis item Curiis intersit Bedellus inferior Facultatis Juris, aut alius ab eo substitutus, qui mandatarii et præconis officio fungatur, et alia, quæ Vice-Cancellarius vel ejus Deputatus imperabit, exequatur.

In qua Curia, Vice-Cancellarius ejusve Deputatus secundum jura, privilegia, et consuetudines ipsius Universitatis procedat, decernatque quæ ad causas ordinandas et terminandas conducent. Quin et (si quid tumultuose, proterve, vel indebite a Procuratoribus causarum, vel aliis Curie officariis, actum vel gestum fuerit) mulcta pecuniaria corrigendi, incarcerandi, suspendendi ab officio, aut etiam officio Procuratoris privandi et amovendi, potestatem habeat.

§. 3. *De Assessore, sive Deputato Vice-Cancellarii.*

QUO melius in Curia Universitatis ordo procedendi observetur, et cum minori molestia Vice-Cancellarii (qui pluribus occupationibus distinetur) negotia forensia expediantur; Statutum est, quod Vice-Cancellarius aliquem e Doctoribus vel Baccalaureis Juris (quem magis idoneum, judicio suo, existimaverit) assumere possit, qui in audiendis causis ipsi assideat; et, cum Vice-Cancellarium abesse contigerit, ejus in judicio vices sustineat.

Qui, tempore admissionis suæ ad hujusmodi officium, corporale juramentum præstet, “quod Statuta, privilegia, libertates, ac consuetudines Universitatis observabit, et, quantum in se fuerit, ab aliis observari procurabit.”

Insuper, “quod sine acceptione personarum,
 “secundum jura, Statuta, privilegia, libertates,
 “et consuetudines ipsius Universitatis, causas
 “sine ulla mora aut dilatione audiet, decidet,
 “ac terminabit.”

§. 4. *De Registrario Curiae Vice-Cancellarii.*

STATUTUM est, quod is, qui officium Registrarii in Curia Universitatis sustinebit, sit Notarius publicus, Artium Magister, vel Baccalaureus Juris, et in ejusdem praxi exercitatus; iudicio et auctoritate Cancellarii, sub literis ipsius patentibus, ad id muneris deputandus; qui etiam in sua admissione juramentum præstet, “De bene et fideliter iis omnibus
 “exequendis, quæ ad officium Registrarii pertinebunt;” Et “de secretis Universitatis celandis.”

Ipsius vero munus est, Vice-Cancellario sive ejus Deputato, in causis tam publice quam privatim audiendis, adesse: coram eo acta registro inscribere, et actorum libros, seu registra, publica Universitatis negotia concernentia, quotquot in ipsius manibus fuerint, sub fideli custodia conservare; data scilicet cautione 100*l.* pro quolibet registro, per obligationem reponendam in abaco; ubi registra vetera in tuto reponenda esse, nec inde promenda sine obligatione 100*l.* pro unoquoque volumine, præsentis Statuti cautum esto.

Denique, registro peculiari (penes Vice-Cancellarium perpetuo adservando) nomina ipsorum, qui coram Domino Vice-Cancellario majorum criminum rei peracti sunt, secundum seriem alphabeti inserere, una cum crimine, condemnatione, cautione, et quota vice sic deliquere-

rint. Quod quidem registrum, ubi ad umbilicum perductum fuerit, in abaco reponendum erit, et aliud ipsi succenturiandum.

§. 5. *De Procuratoribus ad Lites.*

AD officium Procuratorum in Curiis Universitatis admittendi sunt, non nisi Artium Magistri, aut Juris Baccalaurei, in praxi juris exercitati, et arbitrio ac auctoritate Vice-Cancellarii comprobati. Qui etiam, in sua ad prædictum officium admissione, juramentum præstent, super officio Procuratorum Curiae Cancellarii diligenter et fideliter exequendo: et quod causas quas susceperunt, secundum ordinationes et consuetudines Universitatis tractabunt et expedient: nec cuiquam consilium, favorem, aut auxilium dabunt, ex quo jurisdictio Universitatis aliquid detrimenti capiat.

§. 6. *De Contumacia coercenda.*

STATUTUM est, quod si quis alicui in Curia Cancellarii litem intentare velit, primum, partem cui litem intentat, per Bedellum Curiae inservientem, ad comparandum in judicio certo die monendum curet; et, si quæsitus a Bedello conveniri non poterit, (facta fide quod sic quæsitus conveniri non potuerit,) citatio *viis et modis* decernatur, cubiculi foribus in Collegio vel Aula ubi moratur, vel domus in qua habitat, ostio affigenda: et si personaliter monitus, vel post affixionem citationis *viis et modis* (facta itidem fide) definito tempore non compareat, contumax, et in pœnam contumaciæ (h. e. incarcerationem vel excommunicationem) incidisse pronuncietur: et, si in contumacia per tres menses perstiterit, Scholaris aut persona

privilegiata banniat; oppidanus vero commercio interdictus declaretur, quamdiu in contumacia perstiterit; ita ut, cum juri paruerit, absque alio præjudicio restituatur. Quod intelligi volumus duntaxat de bannitione et interdicto commercii, ob contumaciam adversus Curiam, non ob aliam causam quamcunque. Quod si extraneus fuerit, in Universitate moram non facturum, vel quispiam alius de fuga suspectus, licebit, ex decreto judicis, quocunque tempore, per arrestationem corporis, vel distractionem bonorum, (si quæ intra Universitatis præinctum habuerit,) in jus pertrahere.

§. 7. *Cum Reus comparuerit in Judicio, quid agendum.*

DIE juridico, reo comparente, actor, sive is qui eum in jus vocavit, (nisi id antea apud Registrarium fecerit,) statim in Curia stipuletur, et de lite prosequenda, expensisque solvendis, casu quo in causa succubuerit, Fidejussorem interponat: reus item de re judicata, et expensis solvendis stipuletur, et fide jubeat: uterque etiam Procuratorem sibi constituat: in quibus si actor defecerit, reus cum expensis dimittatur; si reus, donec præstiterit, incarceretur. Fidejussoribus vero interpositis, et Procuratoribus constitutis, partes juramentum utrinque suscipiant, quod, super libellis, exceptionibus, aliisque materiis hinc inde proponendis, cum examinati fuerint, omnem quam sciverint vel crediderint veritatem, quatenus ad id de jure adstringuntur, proferent.

§. 8. *De Modo procedendi in Causis levioribus, et in Causis quæ Pecunia æstimandæ non sunt.*

IN causis levioribus, (quales habendæ sunt quæ summam 20s. non excedunt, aut in quibus de injuriis agitur, quæ satisfactione pecuniaria æstimandæ non sunt; utpote, cum nec corpus nec existimatio læditur, et vel recognitio injuriæ, vel reclamatio verborum sufficiat,) licebit Vice-Cancellario, vel ejus Deputato, sine aliqua solennitate aut longiore dilatione procedere; et intra tres dies juridicos, vel tres alios communes, prout sibi visum fuerit, negotium terminare. In quorum primo, pars actrix per se vel per Procuratorem suum, actionem vel querelam, viva voce, vel in scriptis, breviter proponet; et pars rea per se, vel cum Procuratoris consilio, respondebit; et, si quam defensionis materiam habeat, statim proferet. In secundo, actor testes producet: in tertio, reus defensionis probationes faciet; et judex, negotio finem imponens, sententiam feret, quæ per Registrarium in scripta redigetur.

§. 9. *De Modo procedendi in Causis gravioribus.*

STATUTUM est, quod in causis pecuniariis, quæ 20s. summam excedunt, et in quibus agitur de injuriis (ex quibus damnum aliquod infertur, aut inferri poterit, satisfactione pecuniaria resarciendum), modo solenniori, summario tamen, procedatur. Ita ut, primo die juridico quo reus comparet, actor libellum edere; in proximo, reus libello respondere, et materiam exceptivam sive defensivam proponere teneatur. In tertio, actor materiæ exceptivæ sive defen-

sivæ responsionem interponat: deinde tres dies juridici sequentes statuatur, in quibus instrumenta exhibeantur, testes producantur et examinentur, et cujusque generis probationes, quæ antea factæ non sunt, in medium adducantur. Quibus elapsis, publicentur testes, et causa concludatur; qua conclusa, non ultra biduum terminus pro informatione judicis assignetur.

§. 10. *De Modo procedendi in Causis criminalibus.*

IN causis criminalibus, et iis quæ ad reformationem morum spectant, non solum publice in Curia, sed etiam in privato hospitio, aut alibi extra Curiam, Cancellarius sive Vice-Cancellarius, vel ad sectam partis, vel ex officio procedere poterit: ita quod, si quis de delicto aliquo graviori conveniatur, (cui per Statuta mulcta Universitati applicanda irrogatur, vel incarcerationis, suspensionis, vel alterius majoris coercitionis pœna infligitur,) Registrarius ejusve Deputatus adhibeatur; qui crimen objectum, probationes, et sententiam in acta redigat.

§. 11. *De Incarceratione, Custodiæ Causa.*

SI quis de perturbata pace, vel gravi aliquo crimine, Vice-Cancellario delatus, vel suspectus, vel ab ipso deprehensus fuerit, Statutum est, quod carceri custodiæ causa committatur. Et, si Studiosus cujuscunque Gradus, vel persona privilegiata, aut etiam oppidanus, (dummodo in causa cognitionem Cancellarii spectante altera pars exstiterit,) jussus a Vice-Cancellario, vel ejusdem Mandato, a Bedello requisitus fuerit in carcerem se conferre, statim obtemperare

teneatur; vel si recusaverit, ab Universitate penitus expellatur. Quod si privilegiatus fuerit vel oppidanus, privilegio, aut commercio cum privilegiatis, respective, ipsi interdicatur. Proviso tamen, quod (si fide-jussores idoneos, de comparando in judicio, et usque ad sententiam permanendo, interposuerit) a carcere liberetur. Quod si fide-jussores dare non poterit, Vice-Cancellarius, vel is qui detulit, intra duos dies, crimen in judicium deducat; et quamprimum fieri potest, examinato negotio, de eodem secundum juris exigentiam statuatur.

§. 12. *De iis qui majorum Criminum Suspicione tenentur.*

SI quis vel publica fama, vel privata cujusquam fide digni informatione, de perturbata pace, vel gravi aliquo crimine, apud Cancellarium vel Vice-Cancellarium, aut etiam Procuratores delatus fuerit, nec ad convincendum et condemnandum probationes sufficiant; ejusmodi tamen sint, ut ex iis vehemens suspicio oriatur; potest Vice-Cancellarius reo ^apurgationem indicere; et, si in ea defecerit, perinde ac de convicto statuere: (cavebit tamen ne quempiam ad purgationis periculum admittat, quem in perjurium ruiturum crediderit, aut quem sontem esse judicaverit.) Quod si per modum purgationis procedere non libeat, cautionem tamen fide-jussoriam sufficientem, de pace conservanda, et quoad crimina objecta honeste in posterum se gerendo, interponere, priusquam dimittat, coget et compellet.

^a Hoc Statutum Decreto Parliamenti jam rescinditur.

§. 13. *De Reis majorum Criminum convictis.*

SI quis perturbatæ pacis vel gravis alicujus criminis reus, (etiãsi intra privatum Collegium quodcunque vel Aulam perpetrati; si privata Statuta hujusmodi crimini pœnam nullam ponant; aut parti læsæ intra privatos parietes satisfieri non possit,) per probationes legitimas et sufficientes convictus fuerit, aut deprehensus in ipso facto, (actu desuper a Registrario confecto,) in pœnis, juxta juris et Statutorum exigentiam, condemnetur; et quoad satisfecerit, vel de satisfaciendo, et pace conservanda, et honeste se gerendo cautionem sufficientem (scilicet fidejussoriam) interposuerit, incarceretur; ejusque nomen, crimen, condemnatio, et cautio, et quota vice sic deliquerit, in registro Vice-Cancellarii ad hoc specialiter designato, registretur. Et, si quis quarto, in perturbatione pacis, vel in eodem gravioris alicujus criminis genere, deliquisse convictus fuerit, in perpetuum ab Universitate expellatur.

§. 14. *De iis qui de se Justitiam fieri non permittunt.*

SI quis de crimine aliquo accusatus vel suspectus, fugam fecerit; vel si quis in plateis vel domibus, viso Vice-Cancellario vel Procuratoribus, ut culpæ conscius (scilicet galero vel ocreis indutus) in fugam se conjecerit; vel post citationis schedulam ostio cameræ vel domus, in qua morari consuevit, affixam, die ac tempore præstituto coram Vice-Cancellario ejusve Deputato non comparuerit; vel comparens cum numero supra tres vel quatuor se steterit; vel de se justitiam fieri non permiserit, (utpote

jussus a Vice-Cancellario carcerem adire recuserit, vel incarceratus, priusquam legitime solutus vel liberatus sit, exierit,) bannitus statim denunciatur, ejusque nomen in registro Vice-Cancellarii registretur. Et si Clericus fuerit, qui ad locum aliquem extra Universitatem se receperit, (nisi intra mensem, a tempore quo requisitus fuerit, se submiserit,) illius nomen, simul cum delicto, de quo notatus vel convictus fuerit, *Diæcesano* loci in quo moratur, sub sigillo communi Universitatis transmittatur, ut contra ipsum per *Diæcesanum* procedatur.

Quod si quis, mandato Vice-Cancellarii, per Bedellorum aliquem arrestandus, Bedello, *warrantum* Vice-Cancellarii monstranti, vel manus injicienti, protinus sese haud dediderit, in carcerem vel custodiam alicubi compingendum; quin potius fuga se subducere, aut vi e manibus Bedelli eluctari paraverit; ipso facto, si persona privilegiata fuerit, privilegiis Universitatis exuatur; sin Scholaris fuerit, banniatur, et si Graduatus fuerit, Gradu privetur.

§. 15. *De iis, qui Universitatis Juribus ac Privilegiis adversantur, discommunicandis, vel disprivilegiandis.*

QUONIAM oppidani, Academicis plerumque infesti et adversi, privilegia Universitatis oppugnandi nullam non occasionem captant; quin et privilegiati nonnunquam, publicam utilitatem privato commodo posthabentes, privilegiis Universitatis adversantur; Statutum est, quod, ad compescendam hujusmodi insolentiam sive vecordiam, si qui super hoc convicti fuerint, privilegiatis, privilegiis Universitatis; oppidanis vero, commercio cum privilegiatis, interdicatur.

§. 16. *De Perturbatoribus Pacis, sive iis quorum Appellationes recipiendæ non sunt.*

CUM, de jure communi, appellationis beneficium quibusdam denegandum sit; nonnunquam præ odio delictorum quæ commissa sunt; nonnunquam ad compescendam eorum insolentiam, qui in mediis tumultibus (quando silent leges, ac imperio utendum est, ubi lege agi non potest) juris obtentu se contra legum ac magistratum auctoritatem muniunt: Statutum est, quod perturbatæ pacis, sive quorundam criminum inferius enumeratorum reis (hoc est, vel probabiliter suspectis vel convictis) omni prorsus appellandi potestate interdictum sit: cujusmodi sunt,

Primo, ^aqui ad aliorum existimationem minuendam, libellos famosos condiderunt, seu in vulgus sparserunt; aut etiam recitando, vel transcribendo, publicarunt; quive ab aliis recitados vel lectos audiverint, nec protinus ad Vice-Cancellarium recitantis aut legentis nomen detulerint; vel, ^bqui, sive in exercitiis publicis, sive in Scena publice, ad alicujus contumeliam et infamiam quicquam protulerunt; vel, ^cqui de damno alicui inferendo minati sunt.

Secundo, qui aliis vim intulerunt, aut inferentibus opem præbuerunt; scilicet impellendo, percutiendo, verberando, vulnerando, aut simile aliquid committendo.

Tertio, ^dqui arma, secus quam Statutis Universitatis permissum est, portaverunt; et qui de

^a Tit. XV. Sect. 8.

^b Tit. VII. Sect. II. §. 3.

^c Tit. XV. Sect. 9.

^d Tit. XV. Sect. 10.

nocte vagati sunt, et qui ebrietatis, perjurii, fornicationis, vel adulterii, et his similia crimina perpetrarunt, vel horum participes fuerunt.

Quarto, qui coram Domino Cancellario, ejusve Commissario, aut ipsius Deputato, legitime moniti sive citati, comparere recusarunt; vel comparentes, cum multitudine accesserunt; vel in eundem verba opprobriosa conjecerunt; vel carcerem adire jussi, non obtemperarunt, aut inde injussi se proripuerunt; vel, qui de se, aut aliis, justitiam fieri non permiserunt; vel, post tres conformes sententias non acquieverunt.

Quinto, qui privatim conventicula sive conspirationes et confederationes, vel publice turbas hominum congregaverunt, vel eisdem ultro interfuerunt: quive, pro concionibus, quicquam ad seditionem aut factionem in Universitate, vel Collegio aliquo Aulave, alendam aut excitandam, vel, quod doctrinæ aut disciplinæ Ecclesiæ Anglicanæ deroget aut dissentiat, disseminaverunt; aut ^aqui exemplar concionis, aut orationis alicujus publice habitæ, a Cancellario vel ejus Commissario requisiti, exhibere recusaverunt; aut, concionis exemplar non habere se prætendentes, de iis, de quibus suspecti seu delati fuerint, virtute juramenti directe respondere abnuerint.

Decretum est denique, quod, qui rei peraguntur horum criminum, vel alicujus illorum, cui, Statuto aliquo jam edito, vel in posterum edendo, appellationis remedium interdicitur, quodve in aliquo Statuto inter crimina perturbatæ pacis numeratur; quive ab hominibus fide dignis delati, vel judicio Domini Cancel-

* Tit. XV. Sect. 8. et Tit. VII. Sect. II. §. 3.

larii, ejusdemve Commissarii, sive Vice-Cancellarii aut Deputati sui, de iis probabiliter suspecti fuerint; nec a decreto aliquo interlocutorio, prætextu gravaminis, nec a sententia definitiva, prætextu injustitiæ, appellare possint: sed, quacunque appellatione non obstante, ejusdem decreto sive sententiæ obtemperare teneantur; modo graviores pœnam, quam quæ per Statuta irrogatur, (ubi aliqua irrogatur,) alicui non imponat.

§. 17. *De Causis in quibus dubitatur, utrum Appellatio admittenda sit, necne.*

SI contingat aliquem de delicto conveniri vel condemnari, de quo dubium sit, utrum perturbatio pacis sit; vel, utrum sub aliqua delictorum specie, in præcedenti Statuto contentorum comprehendatur; sive, utrum hujusmodi criminis reus, ad appellationem admittendus sit, necne; ordinatum est, quod (hujusmodi occasione appellatione interposita) intra triduum Vice-Cancellarius duos Doctores, qui Procuratoris munus aliquando sustinuerunt, (si qui tales in Universitate existant,) alioqui, duos quoscunque alios Doctores; et Procuratores anni instantis duos alios ejusdem conditionis, nominent, vel saltem duos Magistros, qui Procuratorum munere functi sunt; qui, una cum Juris Professore Regio, vel (in ejus absentia) seniore Graduato in eadem Facultate, qui tunc in Universitate præsens fuerit, intra quatrimum a tempore nominationis (causæ natura summarie inspecta) utrum appellatio illa admittenda sit, determinare teneantur. Quodque, prout major pars eorum determinaverit, Procuratores, vel in

admittenda vel in rejicienda appellatione prædicta, procedant.

§. 18. *De Appellationibus admittendis in Causis civilibus Perturbationi Pacis annexis.*

ORDINATUM est, si contingat aliquem appellationem debite interponere in causa civili, (veluti in causa damni sive injuriarum,) quæ connexa sit causæ perturbationis pacis, vel alteri cuicunque causæ criminali, in qua (ut præfertur) appellare non licet, quod appellatio hujusmodi, quoad causam sic connexam et conjunctam, locum habeat; præterquam cum causa satisfactionis partis læsæ, ob injuriam aliquam illatam, cum causa perturbationis pacis, vel alia causa in qua appellare non permittitur, complicata sit. Et proinde, quemadmodum in causis prioribus, a sententia Cancellarii sive ejus Commissarii aut locum tenentis, sic et ab ipsa hujusmodi sententia, pro taxatione satisfactionis seu rationabilis emendæ parti læsæ applicandæ, omnino appellare non liceat.

§. 19. *Quo Ordine appellandum sit.*

ORDINATUM est, quod in iis causis in quibus appellare permittitur, appellatio gradatim, et absque saltu (ut loquuntur) fiat: i. e. primum a Cancellario ejusve Commissario sive locum tenente ad Congregationem Magistrorum Regentium; tum, a Congregatione Regentium ad Convocationem Doctorum, Magistrorum Regentium et non Regentium; et deinde, si tres conformes sententiæ non præcesserint, a Convocatione Doctorum, Magistrorum Regentium et non Regentium, ad Regiam Majestatem in Cancellaria, sub pœna excommunicationis, ban-

nitiois, et degradationis, ei, qui secus fecerit, infligenda.

§. 20. *De Judicibus delegatis in Causis Appellationum.*

STATUTUM est, quod Procuratores, in prima Congregatione post susceptum officium, pro Congregatione Magistrorum Regentium, septem iudices delegatos nominent; quorum, duo Sacræ Theologiæ, unus Juris, unus Medicinæ Doctor, et tres in Artibus Magistri (necessario vel ad placitum Regentes) sint. Qui ut statim Delegati, cum approbatione illius Domus, causas omnes appellationum, a Cancellario, ejusve Vice-Cancellario sive locum tenente, ad Domum Congregationis devolutas, audiendi ac terminandi, per totum annum insequentem, potestatem habeant. Ita tamen, ut prorogetur et continuetur jurisdictio Delegatorum, quoad causas coram ipsis inceptas, donec sententiam tulerint, vel aliter finem imposuerint, et sententiam debitæ executioni mandaverint. Quodque deinde, in proxima Convocatione, pro Domino Regentium et non Regentium, novem alios iudices Delegatos itidem nominent; quorum, duo Sacræ Theologiæ, duo Juris, duo Medicinæ Doctores, tres Magistri ad placitum Regentes, sint: qui similiter, ut statim Delegati, anno insequente, causas appellationum, a Domino Congregationis ad Domum Convocationis delatas, audiant et determinent; prout supra concessum est Delegatis Congregationis, quoad causas intra annum inceptas, anno insequente determinandas. Et, si quempiam eorum, qui sic nominati fuerint, deficere, vel diutinæ absentiae causam habere, vel ex justa etiam causa

recusari contigerit; Procuratores, vel eorum alter, cum Domino Vice-Cancellario, alium ejusdem facultatis et Gradus (si talis in Universitate præsens fuerit, alias, quemlibet alium, prout ipsis videbitur) in ejusdem locum substituant. Ita tamen, ut liceat tribus quibuscunque ex iisdem utriusvis Domus Delegatis, aliis rogatis et absentibus, quoad citationes et actus alios, usque ad sententiam procedere. Et quicquid, in quacunque causa, major pars omnium Delegatorum utriusvis Domus respective statuerit vel decreverit, ratum sit, et effectum debitum sortiatur. Proviso, quod, priusquam quispiam, vel pro Congregatione vel pro Convocatione, iudicis delegati officium in se suscipiat, palam in Curia (altero Procuratorum, ejusve Substituto, exigente), juramentum præstet, quod, sine acceptione personarum, secundum jura, Statuta, privilegia, libertates, et consuetudines istius Universitatis, causas coram ipsis ventilandas audiet ac decidet.

§. 21. *De Cautionibus ab Appellantibus deponendis penes Procuratores Universitatis, priusquam Inhibitionem obtineant.*

STATUTUM est, quod duo Procuratores, cum iis constiterit appellationem, vel a sententia aut Curia Cancellarii ad venerabilem Domum Magistrorum Regentium, vel ab illa Domino ad venerabilem Domum Convocationis Doctorum, Magistrorum Regentium et non Regentium, legitime interpositam esse, id est, secundum Statuta, et intra quindecim dies a tempore gravaminis vel sententiæ, (si intra triduum a tempore appellationis interpositæ pars appellans petierit, et non aliter,) iudicem a

quo, vel iudices a quibus, inhi-beant, sive ab illis appellatum esse significant; et ne ulterius in hujusmodi causa procedant, moneant sive interdicant. Modo tamen, priusquam inhibuerint, appellans coram iis, aut eorum altero, juraverit, quod non causa frivola dilationis procuranda, sed ex justa causa, quam se probaturum credit, appellaverit. Et cautionem sufficientem (i. e. vicesimam partem condemnationis principalis in priori instantia, in appellatione a sententia definitiva; in appellatione vero a sententia interlocutoria, summam 5s.) deposuerit. Quod si res aliqua in iudicium deducta fuerit, cujus aestimatio non fit, aut certo fieri non poterit, istiusmodi rei aestimatio, ejusque cautio, ad arbitrium Procuratorum, vel alterutrius eorum (puta recipientis) referatur; quæ quidem cautio, ab altero Procuratorum prius petita, penes eundem, intra triduum proxime a tempore quo extitit appellatum, deponatur; alias appellatio pro deserta habeatur. Juramentum autem et cautionem prædictam Procuratores, virtute juramenti Universitati præstiti, petere ac recipere, receptamque cautionem, casu quo appellans obtineat, eidem restituere, et, casu quo succumbat, in computo generali officii sui Procuratorii, coram dicti computi auditoribus, una cum cæteris ad usum et utilitatem Universitatis receptis, hujusmodi cautionis rationem reddere teneantur.

§. 22. *De Modo procedendi in Causis Appellationum.*

STATUTUM est, quod iudices delegati, tam vacationum quam Terminorum temporibus, (exceptis diebus festis,) in causis appella-

tionum procedere possint: quodque, postquam a Procuratoribus, vel eorum altero, appellationem ad eosdem interpositam significatum fuerit, delegatorum munus in se suscipiant, et quolibet die Mercurii, inter horas primam et secundam, (aut sæpius si visum fuerit,) in loco designando conveniant; et sine intermissione, usque ad sententiam ferendam, et executioni demandandam, constanter procedant. Quodque appellationis instrumento, loco libelli, ab appellante, ejusve Procuratore, iis porrecto et oblato, diem competentem statuunt, intra quem appellans ipsam actorem et processum in Curia, a qua appellatur, copiam transmittendam, vel saltem originalia per Registrarium adducenda, et partem adversam citandam, procurare possit. Quo die (si, cessante impedimento legitimo, pars appellans deficiat) causam iudici, a quo, remittant, (sin pars appellata,) contumaciæ censuris, donec comparuerit, coerceatur. Utraque vero comparente, si ex eisdem actis procedere voluerint, uno vel altero die, ea quæ consistunt in facto cognoscent; et, si res ita postulet, unum vel alterum diem pro informationibus in jure concedent. Et quamprimum, habita inter se matura deliberatione, inter omnes, vel majorem eorum partem, convenerit, sententiam ferant. Si vero pars alterutra, vel utraque, de novo aliquid allegare vel probare petierit, ita demum admittent, si pars petens prius fidem fecerit, se verum credere quod allegat, et probare intendit. Deinde, terminos expediendo negotio, quam fieri potest brevissimos, statuent: quibus elapsis quamprimum fieri poterit, eodem modo de facto et de jure cognoscent, et sententiam ferent.

APPENDIX STATUTORUM.

STATUTA

BIBLIOTHECÆ BODLEIANÆ,

PROMULGATA ET CONFIRMATA IN DOMO CONVOCATIONIS, ANNO DOM. 1610.

§. 6. *De Modo studendi. Necnon de Libris in quarto et octavo.*

QUEMADMODUM omnibus Bibliothecam frequentaturis liberum licitumque esse volumus, (si ad eum modum habiles fuerint, quem modo explicabimus,) cuncta volumina pluteis per catenulas illigata perlustrare, dum ea confibulare, adstrigmenta in nodum colligere, implexas eorum catenulas extricare, suis quæque locis digesta (sic ut offenderant) reponere, meminert (si secus fecerint, ære negligentiam suam, pro arbitrio Vice-Cancellarii, luituri :)

Ita, minoris formæ volumina in quarto et octavo, quæque in clathris, et sub custodia Bibliothecarii solius continentur, ne contrectatione nimia, et pervolutatione corrumpantur, (quando ob antiquitatem, raritatem, pretium, speciem, aut aliam denique præstantiorem ob notam, magni æstimanda fuerint,) hac lege visendi cupidis exhibeantur. In manus cuique et numerato tradantur; coram evolvantur; ante discessum reddantur: qui hanc legem

violaverit, in duplum cujusque libri valorem (quem sic retinuerit aut celaverit) condemnatur; et, si destinata animi improbitate id factum comprobetur, e Bibliotheca in perpetuum ejiciatur. Porro, quoad manuscripta volumina (quæ promiscue singulis in Bibliothecam admissis sine discrimine utenda exponi, non potest periculo carere) statutum est, quod (præter volumina dudum archivis inclusa, et MSS. codices H. H. C. C. *Guil. Comitis Pembrochiæ, et Guilielmi Archiepiscopi Cantuariensis* peculiaribus clathris conclusos) reliqua etiam volumina MSS. sparsim nunc collocata, in unum colligantur, et sub clathris seu cancellis conclusa teneantur; nec cuiquam, qui non sit actu membrum Universitatis, utenda permittantur, nisi qui in Artibus Magistrum aut saltem in Jure Civili Baccalaureum adduxerit, sibi adstiturum vel assessurum quamdiu codice quovis MS. utetur, quique de libro indemni et illæso redhibendo spondeat.

§. 12. *De iis quos studendi causa ad Bibliothecam admittere licet.*

SANCITUM esse volumus, quod priusquam Graduato cuicunque, alterive cuiquam præstantioris notæ vel meriti, aditus in Bibliothecam patefiat, coram Vice-Cancellario ejusve Deputato, adstante Bibliothecario, fidem bonam Bibliothecæ præstet, nempe sub juramenti obligatione in hæc verba concipienda:

“ Tu promittes, sancteque coram Deo Optimo Maximo recipies, quod quoties in publicam Academiæ Bibliothecam venire te contigerit, animum ad studia per modestiam et silentium accommodabis; libros cæterumque

“cultum sic tractabis, ut superesse quam diu-
“tissime possint.

“Item quod neque tu in persona tua ali-
“quem vel aliquot libros surripies, permuta-
“bis, rades, deformabis, lacerabis, scindes, an-
“notabis, interscribes, sponte corrumpes, ob-
“literabis, contaminabis, aut alio quocunque
“modo detruncabis, abuteris, deteres, immi-
“nuesve: nec alii cuiquam auctor eris horum
“quidvis perpetrandi; sed, quantum in te est,
“delinquentem vel delinquentes impedies; ip-
“sorumque maleficia Vice-Cancellario, ejusve
“Deputato, intra triduum postquam tibi inno-
“tuerint, denunciabis: Ita te Deus adjuvet,
“tactis sacrosanctis Christi Evangeliiis.”

Anno Dom. 1613.

§. 3. Statuimus, quod Artium Baccalaurei, qui a die præsentationis biennium integrum non compleverint, non permittantur frui beneficio publicæ Bibliothecæ, nisi ab Aulis et Collegiis suis singuli venerint ad Bibliothecam, vestiti habitu seu capa, caputio, sive cucullo, et pileo; quæ non prius exuent, quam a Bibliotheca reversi fuerint: si quis secus facere præsumpserit, sciat se privatum fore omni beneficio ejusdem Bibliothecæ, per spatium trium mensium proxime sequentium. Curabit autem diligenter Bibliothecarius, et (in absentia ejus) inferior Bibliothecarius, sub virtute juramenti, ut hoc Statutum (quantum in illis est) debitæ executioni demandetur. Proviso, quod hoc Statutum non præjudicabit ullo modo filiis Magnatum, et Procerum, aut Dominorum in Parlamento suffragii jus habentium, aut inferiori Bibliothecario, qui, libris distribuendis occupatus, commode ita vestitus incedere non potest.

§. 4. Statuimus, ut Baccalaurei Artium, et omnes alii non Graduati, in posterum a lectione librorum studiis suis minime competentium abstineant; quod si quis deliquerit contra formam hujus Statuti, et admonitus per Bibliothecarium vel ejus deputatum non resipuerit, tradetur statim nomen ejus, per custodem Bibliothecæ sive ejus deputatum, Vice-Cancellario et Procuratoribus, ut debita pœna ab eisdem puniatur.

§. 5. Statuimus, ut non Graduati, Facultatis Artium Baccalaurei, et minoris denique ordinis Graduati omnes, senioribus debitum obsequium et reverentiam præstent; quamprimum eos viderint ad scamnum, sive pluteum, in quo fuerint, accedentes, loco cedendo; vel aliter, librum, quo prius usi fuerant, tradendo, si res ita tulerit: quod si querela aliqua, eaque justa contra aliquem pervenerit ad aures Pro-Cancellarii sive Procuratorum, beneficium unius Terminii in gratia sua deinceps proponenda pars delinquens amittet, aut aliter per Vice-Cancellarium punietur; et Registrarius Academicus delictum hoc in Registro suo fidelissime annotabit.

§. 6. Quia multi, Statutum de non introducendis extraneis, aut injuratis, in Bibliothecam publicam studendi causa, penitus ignorantes, aut non satis attendentes, pœnam incurrunt gravissimam; si quis in posterum deliquerit in hoc genere, sciat se incarcerandum, præter pœnam pecuniariam arbitrio ac judicio Vice-Cancellarii delinquenti infligendam.

§. 7. Statutum est, quod nullus, sub pœna trium solidorum et quatuor denariorum, legendo in aliquem librum incumbat; charta sive

libello aliquo chartaceo aut membranaceo proposito, super librum aliquem scribat: nam hoc modo, vel atramenti suffusione, vel foliorum replicatione, vel sordibus contractis contaminabitur, in non modicum detrimentum librorum tam insignium. Postremo curabit diligenter unusquisque Studiosus, ut libri e manibus suis depositi, ac repositi in locum suum, utramque fasciam, sive fibulam, aut omnes (si plures fuerint) firmiter nectat, atque colligat in nodum: delinquentes contra hoc Statutum solvent (toties quoties) duodecim denarios, nomine pœnæ.

§. 8. Statuimus insuper, si quis a Bibliothecario, vel ejus deputato, aut aliquo officario Bibliothecæ, (interrogatus de nomine suo, et Collegio sive Aula,) non responderit statim juxta rei veritatem; quod ipso facto a Bibliotheca publica amovebitur, quousque per Congregationem Regentium, gratia secundo proposita et concessa, idoneus censebitur.

§. 9. Statuimus, idque sub pœna perjurii, si cui jurato probe constiterit, aliquem injuratum, aut non admissum juxta Statutorum exigentiam, in Bibliotheca commorari studendi ergo; quod statim revelet nomen ejus Bibliothecario aut ipsius deputato, ut ab iisdem mature prospiciatur, ne quid Bibliotheca detrimenti capiat.

Anno Dom. 1615.

§. 5. Pro explanatione cujusdam Statuti controversi, (quo cavetur, quod Baccalaurei Artium, et omnes alii non Graduati, abstineant in posterum a lectione librorum, studiis suis minime competentium;) decretum est, quod Baccalaurei et non Graduati non vagabuntur de loco ad

locum; sed in ea parte Bibliothecæ sedulo studiis suis incumbant, in qua libri Facultatis Artium (iique soli) continentur. Proviso semper, ne exteris et peregrinis, vel Juris aut Medicinæ Studiosis fraudi sit, quin libris Facultatis suæ respective frui liceat.

Anno Dom. 1621.

—Tertio, quod omnes et singuli Studiosi, admittendi ad studendum in Bibliotheca, teneantur emere catalogum librorum ejusdem Bibliothecæ, quodocunque eum denuo typis vulgari usus ac utilitas Studentium postulabit.

Catalogo vero pretium, in singulos libros, statuent Vice-Cancellarius et Curatores.

Anno Dom. 1780.

Statutum de Necessitatibus Bibliothecæ Bodleianæ subveniendis.

AD Academiæ decus nihil magis conducere, aut ad utilitatem ejus propius pertinere videtur, quam ut antiqua illa Bibliothecæ Bodleianæ fama, jam olim omnigenæ suppellectilis literariæ copia, varietate, et delectu insignita, novis perpetuo incrementis sustentetur et augeatur. Cum vero tanta rei nummariæ, huic usui destinatæ, inopia jam laboret Academia, ut librorum, quos recentiorum ingenium, eruditio, aut industria plurimos per totum fere literatum orbem profudit, et quotidie profundit, vix unus et alter Augusto huic Musarum domicilio, publicis sumptibus, adscribi possit et adnumerari; unde verendum est, ne Bibliothecæ celebritas et studentium simul opportunitates minuantur: quo duplici huic malo occurratur, et rei literariæ necessitatibus in hac parte melius in posterum subveniatur, statutum est.

Primum; quod omnes Doctores cujuslibet Facultatis; omnes Sacræ Theologiæ, Medicinæ, vel Jurisprudentiæ Baccalaurei; omnes Artium Magistri, itidem et Baccalaurei; reliqui denique omnes, qui in Academia quadriennium exegerint, aut qui ad Bibliothecæ usum speciali gratia prius admissi fuerint; summam quatuor solidorum, ad usum Bibliothecæ Bodleianæ, annuatim persolvant, in fiscum Academicum, sine fraude aut diminutione, inferendam.

Secundo; quod singuli Scholares, cum in matriculam Universitatis relati fuerint, pro sui quisque patris statu et dignitate (servientibus exceptis) aliam nummorum summam, ei quam in præsens solvere tenentur parem, persolvant, in fisco Academico, ad usum eundem Bibliothecæ Bodleianæ, reponendam.

Placuit item Academiæ, cum consensu Curatorum Bibliothecæ Bodleianæ, discernere, quod semel in unoquoque Termino, aut sæpius, si res tulerit, die et hora a Vice-Cancellario pridie constituenda, Curatores in Bibliotheca, aut (si justa de causa ita expedire videbitur) in alio loco idoneo, conveniant, de libris emendis et disponendis consulturi; et quod catalogum librorum, quos intra annum proxime elapsam publicis sumptibus Bibliothecæ addiderint, quotannis, sub fine Termini S. Michaelis, ad singulos Collegiorum et Aularum Præfectos, necnon ad cujuslibet Collegii sive Aulæ Bibliothecam, current deferri; in quo catalogo, titulus quo quisque liber insignitus fuerit, pretio etiam affixo, describetur; necnon et pecuniarum, ab Academia juxta hanc ordinationem acceptarum et expensarum, ratio simul reddetur.

Anno Dom. 1769.

STATUTUM est, ut Proto-Bibliothecario, propter occupationem moramque in Bibliotheca extraordinariam, quadraginta librarum summa adjecta annum stipendium augeatur, sibi suisque vicariis, prout ipsi visum fuerit, cum relatione ad Curatores, et eorum approbatione, si forte querelæ occasio hac ex parte subministretur, distribuenda.

*Statutum novum Bibliothecæ publicæ
Bodleianæ. 1813.*

§. 1. CUM Bibliotheca Bodleiana, incrementis jam continuis in longum aucta, (quæ etiam ex ipsius Academiæ munificentia indies illustriora sunt,) in eam accreverit amplitudinem, ut Officarii tanto oneri ferendo vix sufficiant, nedum splendori ejus et dignitati respondeant :

Visum est Academiæ, ex relatione Curatorum, ea quæ ad Officiariorum et Ministrorum numerum, ordinem, et stipendia attinent, denuo recognoscere, et singulorum munera definire, necnon alia nonnulla accuratius præscribere, ita ut tota administratio auctiori statu tam nobilis Bibliothecæ non indigna sit.

§. 2. *De Numero, Ordine, et Muneribus Officiariorum et Ministrorum.*

BIBLIOTHECARIUS, sive Protobibliothecarius, uti prius, totius interioris administrationis curam habeat, et omni ex parte Bibliothecæ dignitati et utilitati semper invigilet.

Bibliothecario in partem laboris sui adjungantur Hypobibliothecarii duo gradu Artium Magistri vel Baccalaurei in Jure Civili ad mi-

nimum insigniti, et tempore admissionis suæ, uti Bibliothecarius ipse, nexu conjugali soluti. Horum alter Codices MSS. aliosque libros, qui ob insignem raritatem vel pretium Archivis sive clathris peculiaribus reponuntur, propriæ tutelæ commissos habeat: alter librorum cæterorum custodiæ invigilet. Ambo autem, quantum fieri potest, cum Bibliothecario in Bibliotheca constanter adsint, atque ex ejus mandato libris perquirendis, ac digerendis, et Catalogis confi-ciendis dent operam; tum etiam cætera omnia fideliter exequantur, quæ Bibliothecæ usus et commoda postulare videantur. Ideo enim Offi-cariis hisce propriæ provinciæ assignantur, non solum quo tam pretiosæ supellectilis incolumi-tati rectius consulatur, sed in tanta librorum mole quo melius cognoscantur omnia, et quo facilior ad ea, quorum studiosi egeant, paretur aditus.

Sint præterea Ministri duo, qui Bibliothecario et Hypobibliothecariis præsto adsint, eorum mandata exequantur, libris perquirendis et reponendis dent operam, et aliis Bibliothecæ usibus, prout res tulerit, ex Superiorum præ-scripto diligenter inserviant.

Statutum est insuper, ut, siquando Bibliothecarius præ infirmiori valetudine, aut senectute ingravescente, assiduæ in Bibliotheca moræ impar sit, Vice-Cancellarius, cum majoris partis omnium Curatorum consensu, Vicarium nominet; virum scilicet aliquem qui fide dignus sit, et gradu Artium Magistri vel Baccalaurei in Jure Civili ad minimum insignitus. Vicarius eodem juramento et iisdem legibus obligatus, quibus ipse Bibliothecarius, recipiet annuatim (et eadem ratione pro qualibet anni parte) sum-

mam centum librarum ex stipendio Bibliothecarii deducendam, necnon alteram summam centum librarum ex pecuniis Bodleianis.

Quod si unus ex Hypobibliothecariis in munus Vicarii nominetur, novus Hypobibliothecarius modo infra præfinito quam primum substituat.

Proviso semper, quod non solum tota hæc quæstio de Vicario nominando, sed et Vicarii ipsius nomen, Venerabilis Domus Convocationis suffragiis, decem dierum publica monitione præmissa, permittetur.

Cæterum quod ad quotidianam attinet Bibliothecæ curam, tenendum est imprimis ut Officiarii et Ministri omnes, quantum fieri potest, in ea constanter adsint. Nulla autem unquam de causa Officiarii omnes simul absint, sed vel Bibliothecarius, vel unus ex Hypobibliothecariis, et unus saltem ex Ministris, semper adesse teneantur.

Sed ut aliqua saltem absentiae venia Officiariis hisce concedatur, liceat univique eorum extra Academiæ fines interdum versari, modo per singulos anni semisses triginta dierum spatium (vel continuum vel interpolatum) tempus absentiae non exsuperet. Quod si merito in plures dies proroganda sit licentia quam præsentem hoc statuto definitum est, communibus in Venerabili Domo Convocationis suffragiis (dierum trium ad minimum publica monitione præmissa) arbitrium permissum esto. Hoc autem sic intelligendum est, ne cuivis Hypobibliothecariorum Academia abesse liceat, dum Bibliothecario foris esse contingat; nec Bibliothecarius, cum præsens sit, amborum Hypobibliothecariorum auxilio simul careat, nisi ex gravi

aliqua et perurgenti causa, majori parti Curatorum in Universitate præsentium approbanda.

Ex Ministris nemo absit, nisi speciali venia Bibliothecarii prius impetrata; idque sub pœna amotionis.

Absentis Bibliothecarii munere fungatur Hypobibliothecarius qui Archivorum custodiam sibi traditam habet.

Absolvatur autem Bibliothecarius conditionibus quibus nunc tenetur neque matrimonium contrahere, neque Beneficium curatum nisi prope adjunctum in se recipere. Et in posterum tam Bibliothecario quam Hypobibliothecariis expresse permissum esto, non modo ut Beneficia curata possideant, sed etiam ut post electionem, vel admissionem, matrimonium contrahant.

§. 3. *De Stipendiis Officiariorum et Ministrorum, et de Pecuniis in usum Bibliothecæ exigendis et erogandis.*

QUO autem justa omnibus fiat remuneratio, voluit et decrevit Academia ut annuatim percipiant; scilicet,

Bibliothecarius, (præter feoda ei ex decreto Convocationis concessa,) integram summam librarum 400.

Hypobibliothecarius uterque 150.

Ministrorum stipendium de tempore in tempus statuunt Vice-Cancellarius et reliqui Curatores.

Janitor, 20.

a Vice-Cancellario per singulos anni semisses æqualibus portionibus dinumerandam.

In hos autem usus assumantur,

1. Reditus et proventus prædiorum, tenementorum, sive possessionum, quibus ex ipsius Bodleii munificentia fruitur Bibliotheca.

2. Pecuniæ quæ ex munificentia Crewiana Bibliothecario et Bibliothecæ destinabantur.
3. Stipendia Bibliothecarii, Hypobibliothecarii, et Janitoris, tam antiqua, quam quæ Bibliothecario suisque vicariis Stat. A. D. 1769. assignabantur.
4. Anni proventus e pecuniis M^{ri} Godwyn.
5. Quod superest annuatim e pecuniis quæ juxta decretum Convocationis A. D. 1802. exiguntur, post sumptus in alios usus priore aliquo decreto vel statuto erogandos.
6. Pecuniæ quæ per Statutum A. D. 1780. in usum Bibliothecæ Bodleianæ exiguntur.
7. Denique præsentis hoc Statuto voluit et decrevit Academia, alteram nummorum summam, ei quam per Stat. A. D. 1780. in præsens solvere tenentur parem, ab iisdem omnibus, et eodem modo, in Bibliothecæ usus solvendam esse.

Quicquid ex omnibus hisce pecuniis superfuerit reponatur ad alios Bibliothecæ sumptus suppenditandos: scilicet,

1. Ad libros quoscumque, sive MSS. sive impressos, prout occasio tulerit, coemendos.
2. Ad ea perficienda quæ in Statutis Bodleianis memorantur; ac speciatim, ad lapsa inclinataque resarcienda, prout usus postulet, interioris structuræ, non solum antiquæ Bibliothecæ, sed et Scholarum hactenus annexarum, vel in posterum per decretum Ven. Domus Convocationis annectendarum, ac etiam Pergulæ, Anglice vocat. *the Picture Gallery*, quatenus illa in Bibliothecæ usus cedat, et tecti tam exterioris quam interioris antiquæ Bibliothecæ.
3. Ad reparandos vel de novo compingendos pluteos et abacos, et ad cætera omnia per-

agenda quæ ad justam librorum collocationem distributionemque requirantur.

4. Ad instituendum novum Bibliothecæ Catalogum typis imprimendum.
5. Denique, quoniam fieri non potest ut omnibus speciatim provideatur, ad alios quoscunque Bibliothecæ sumptus erogandos.

Pecuniarum omnium, sive ex Bodleii reditibus et proventibus, sive aliunde, receptarum, ratio quotannis intra mensem Novembris a Vice-Cancellario coram Curatoribus reddetur, et in Domo Convocationis renuntiabitur. Quæ etiam ratio annuo Catalogo librorum in usum Bibliothecæ emptorum juxta Stat. A. D. 1780. subjicietur, et ante finem Terminis S. Michaelis ad singulos Collegiorum et Aularum Præfectos, necnon ad cujuslibet Collegii sive Aulæ Bibliothecam deferetur.

Quo autem proventus Bibliothecæ auctiores fiant, statutum est, quod si quando, pecuniarum receptarum et solutarum rationibus subductis, summa qualiscunque ultra mille libras superfuerit, ista summa publicis quibusvis vadimoniis, Anglice vocat. *Government Securities*, continuo elocabitur.

§. 4. *De Electione, Nominatione, et Amotione Officiariorum et Ministrorum.*

STATUTUM est, quod in posterum nemo ad officium Bibliothecarii eligatur, nisi qui gradu Artium Magistri vel Baccalaurei in Jure Civili ad minimum sit insignitus. Cæterum antequam cuiquam Electorum suffragandi jus permittatur, Sacramento in hanc formam concepto omnes obligentur: “Tu jurabis, quod in hac electione Bibliothecarii hujus Univer-

“ sitatis celebranda unum tantum, gradu *Ar-*
“ *tium Magistri vel Baccalauri in Jure Civili*
“ ad minimum insignitum, nominabis; et quod
“ neminem nominabis, nisi quem habilem et
“ idoneum ad id officium obeundum vel certo
“ sciveris, vel firmiter credideris.”

Cum vero qualicunque de causa locum vacare contigerit, intra decem dies proxime secuturos, sex dierum ad minimum publica monitione præmissa, solennis Convocatio habenda est, in qua novus Bibliothecarius subrogabitur. Hoc autem decem dierum spatium semper obtinebit, nisi in tempore Magnæ Vacationis, in qua intra septimanas tres eodem modo celebrabitur electio.

In electione autem Protobibliothecarii ratio semper habeatur Stat. Tit. IV. Sect. ii. §. 5. ita ut non subrogetur continuo seu immediate successor ex eadem domo, unde præcedens Protobibliothecarius electus fuerat. Qui vero ex una domo in aliam transierunt, censendi sunt ad eam domum pertinere in quam primo admissi fuerunt: exceptis iis, qui in Præfectos, Socios, vel Scholares, quocunque titulo notatos, alterius cujusvis domus admissi fuerint, qui, post istiusmodi admissionem, ad eam domum in quam novissime admissi fuerint censendi sunt perpetuo pertinere.

Hypobibliothecarii nominentur per Bibliothecarium, cum majoris partis omnium Curatorum consensu; quæ quidem nominatio suffragiis Ven. Domus Convocationis permittetur, præmissa semper a Vice-Cancellario sex dierum publica monitione. Idem ab officio removeantur, si quid tale meruerint, ex majoris partis omnium Curatorum sententia. Ministri nomi-

nentur per Bibliothecarium, cum majoris partis Curatorum in Universitate præsentium approbatione, et eadem auctoritate ab officio removeantur.

Omnes autem, quamprimum nominati fuerint, eodem modo quo Bibliothecarius, (Stat. Bod. 1610. §. 2.) mutatis mutandis, in Ven. Domo convocationis (vel coram Vice-Cancellario si in tempore Vacationis fiat nominatio) sub jurisjurandi religione fidelitatem spondeant.

§. 5. *De Custodia Numismatum.*

NUMISMATUM custodiam solus habeat Protobibliothecarius; et quo melius tam pretiosæ suppellectilis integritati consulatur, nemo unquam, nisi ipso præsentente, Museolum ubi conservatur intrandi copiam habeat. Porro Statutum est, ut Bibliothecarius uno eodemque tempore pluribus quam duobus Numismata nunquam ostendat, nisi adstante per integrum tempus Curatorum aliquo, vel uno ex Hypobibliothecariis; quo in casu permissum est ut quatuor (non autem plures) simul ad visendum accedant.

Bibliothecarius, si ex Academia excessurus sit, Museoli hujusce claves Vice-Cancellario in manus tradat. Fas sit autem Vice-Cancellario, propter specialem aliquam causam, quæ moram nequaquam patitur, Hypobibliothecariorum alterutri claves tradere. Sciat autem Hypobibliothecarius iste, se fide data teneri, ut quam primum fieri potest claves Vice-Cancellario restituat; sciat etiam, sibi omnino nefas esse Museolum istud, dum claves apud se retineat, ulla unquam de causa ingredi, nisi aliquo ex Curatorum numero comitante, et per integrum tempus adstante.

Statutum est insuper, ut Numismata quotannis, paucis diebus ante annuam Bibliothecæ visitationem, præsentem Bibliothecario, perlustrentur, duobus ex Curatorum numero a reliquis ad id munus obeundum nominatis.

§. 6. *De Tempore aperiendi et claudendi Bibliothecam.*

APERIATUR Bibliotheca a festo Annunciationis ad festum Divi Michaelis ab hora nona matutina ad quartam postmeridianam.

A festo Divi Michaelis ad festum Annunciationis ab hora decima matutina ad tertiam postmeridianam.

Exceptis diebus omnibus Dominicis, et diebus quibuscunque vel jejunii vel festivitatis publica auctoritate injunctis vel injungendis :

Vigiliis ante Nativitatem Domini, et deinceps usque ad festum Circumcisionis inclusive :

Festo Epiphaniæ :

Die Passionis Domini, Vigiliis Paschatis, ac Feriis Pascha immediate sequentibus :

Die Ascensionis, et Feriis Pentecosten immediate sequentibus :

Diebus Encæniorum, Vesperiarum, Comitiorum, et Commemorationum publicarum :

Septem diebus a primo Septembris numerandis, quo melius Bibliotheca a sordibus purgetur.

Octo diebus visitationem Bibliothecæ immediate præcedentibus.

Festis vero quibuscunque (de quibus supra non aliter ordinatum fuerit) statim post conciones publice coram Universitate habendas Bibliothecam accedentibus pateat aditus.

§. 7. *De Curatoribus Bibliothecæ, et de Bibliotheca ab iis sæpius perlustranda.*

CURATORIBUS iisque solis jus concedatur, sine aliquo ex Bibliothecæ Officiariis comitante, in istas partes Bibliothecæ intrandi quæ claustris obserantur; excepto semper Museolo ubi custodiuntur numismata, de quo supra speciatim statutum est. Hoc autem ita intelligendum est, ne quis, vel absentibus Bibliothecæ Officiariis, prohibeatur ab usu claustrorum istorum, ac præcipue Scholarum Bibliothecæ annexarum, modo libri quorum usum requirit (juxta ordinationes Stat. Bod. 1610. §. 6.) “in manus ei numerato tradantur,” et ab eo “ante discessum reddantur,” cæteri interea clathris obserati adserventur. Curatoribus autem ipsis potestas hæc ideo conceditur, ut in statum et conditionem Bibliothecæ assidue inquirent, et explorent utrum omnia recte conserventur, et justo ordine disponantur. Et si quid invenerint in quo contra statuta et regulas legitime sancitas peccatum fuerit; vel quod in melius mutari poterit, illico Vice-Cancellarium adeant; qui eorum rogatu Curatores cæteros submoneat et convocet, ita ut conjunctis consiliis quod remedium quærendum sit, vel quid sit faciendum, demonstrent, juxta Statutorum vim, et auctoritatem illorum fidei commissam. (Stat. Bodl. 1610. §. 13.) Proviso tamen, quod, in omni Curatorum ad Ven. Domum Convocationis relatione, ratio semper habeatur Stat. Tit. X. Sect. ii. §. 2. et Tit. XIII.

Curatoribus etiam liceat alterum diem perlustrandæ Bibliothecæ, præcipue Archivis, assignare: qui quidem dies 8^{vum} Novembris paux-

illo spatio antecedit, ita ut solenni isto die, juxta Fundatoris voluntatem, de omnibus et singulis fiat relatio.

Denique ea omnia in Statutis antiquitus sancitis, quorum in prædictis alia ratio habetur, vi præsentis Statuti abrogentur. Cætera rata permaneant.

ΕΠΙΝΟΜΙΣ,

Seu Explanatio Juramenti, quod de observandis Statutis Universitatis a singulis præstari solet: quatenus, scilicet, seu quousque obligare Jurantes censendum sit.

QUONIAM aliis restrictior et morosior, aliis contra laxior et discinctior, est conscientia; illi levissimos quosque lapsus suos calumniari nati sunt, et sese non sæpius immorigeros, quam perjuros esse arbitrantur; hi quoscunque legum nexus, jurisjurandi religionem conscientiae laqueos, strophis suis eludere satagunt, et ipsi sibi palpum obtrudunt: non abs re fore visum est explicare, quatenus seu quousque jurisjurandi, de Statutis Universitatis observandis præstiti, religione teneri seu obligari singulos censendum sit; in eoque tale temperamentum sequi, ne, vel durius interpretando, illis crucem figere; vel benignius, his fibulam laxare videamur.

Qua in re, hoc imprimis attendendum est; verbis Statutorum, in quæ jurejurando quis adigitur, sensum genuinum, ut et obligationi sive vinculo juramenti modum ac mensuram, præstitui seu præscribi a mente et intentione, non præstantis, sed exigentis juramentum; scilicet ipsius Legislatoris. Neque enim si quis, inter jurandum, verbis in quæ jurejurando adigitur, sensum affingut alienum ab eo quem Legislatori propositum fuisse ipsi juranti persuasum aliasve verisimile est, (hoc est, hujusmodi sensum qui desidiæ vel socordiæ faveat, quive disciplinæ Academicæ aut morum honestati repugnet,) eo ipso εὐορκεῖν illum, aut Statutis vel jurisjurandi

religioni satisfecisse putandum est; nedum jurisjurandi religione exolutum ut putet se quis, si ad jurandum animum afferat, non obligandi seipsum, sed in nudo verborum cortice sistendi: neque enim poeticum illud *δυσορκίας* remedium, seu verius colludium—Lingua juravi, mentem injuratam gero—homini Christiano satisfacere aut potest aut debet, eo ipso a perjurii crimine excusatum reputare se ut debeat. Quoniam igitur mensura obligationis, sive vinculi juramenti, ab intentione Legislatoris præcipue pendet, operæ pretium utique fuerit, singulos mentem ac intentionem Legislatoris perspectam et exploratam habere; qualis scilicet qualiumque Statutorum transgressio, juratos ad omnia Statuta promiscue observanda perjurio involvat.

Intenditur igitur perjurio se obligare,

Primo, delinquentes contra Statuta sub pœna perjurii sancita, aut contra Statuta ad quæ speciaticim observanda fide sua data Universitati obstringuntur; ut in juramenti assertoriis, affirmantes se aliquid per Statuta requisitum fecisse, quod non fecerint, vel scire credereve, quod non sciverint crediderintve.

Secundo, delinquentes contra Statuta quæcunque, nec submittentes se pœnis per Statuta infligendis, aut (ubi nullæ appositæ sunt) arbitrio Cancellarii vel Vice-Cancellarii irrogandis, ex potestate ipsis permissa. Siquidem omnis vera lex, etiam citra ullius jurisjurandi religionem, (ac multo magis juramento firmata,) resolvitur necessario in aliquam conscientiæ obligationem, ad actum præceptum aut prohibitum, vel simpliciter, vel sub disjunctione; ita

scilicet, ut in conscientia obligentur singuli aut hoc facere vel omittere, aut illud pati.

Tertio, qui, non obstante incapacitate quacun- que ex transgressione alicujus Statuti contracta, se nihilominus actibus ratione illius incapacitatis interdictis ingerunt. Duplex autem est hæc incapacitas: una, quæ dispensationis beneficio removeri potest; alia, cui tali remedio subveniri non potest, in materia scilicet indispensabili.

Quod vero hujusmodi incapacitatem ex aliquibus delictis contrahi intendant Statuta, ex eo patet, quod Statuta passim supponant dispensationes quoad præterita; dispensatio autem in actus præteritos minime cadit seu operatur, (quasi scilicet ipsos retrahere, aut factum infectum reddere, valeret,) sed in pœnam delinquentibus irrogatam, ipsam remittendo vel relaxando. Clausula enim illa in formula juramenti, quo singulos præsentatos obstringit Senior Procurator (nisi aliter tecum dispensatum fuerit), præter mulctas ordinarias secundum Statuta irrogatas, supponit, ratione delictorum contra illa Statuta, adhuc remanere aliquam obligationem ad pœnam, dispensationis beneficio dissolvendam; quæ quidem pœna non alia esse potest, quam incapacitas Gradus capessendi, ex hujusmodi delictis contracta.

Qui igitur, non obstante hujusmodi incapacitate, citra dispensationis beneficium, Gradus capessunt, perjurium incurrunt, ac multo magis illi, qui incapacitatem contraxerunt, cui dispensationis remedio subveniri non potest.

Quoad alia vero delicta; si Statutorum pœnarumve contemptus, et crassa obstinataque negligentia abfuerit, delinquentes, si pœnis per

Statuta sancitis aliasve arbitrariis se submiserint, jurisjurandi religionem temerasse minime censendi sunt. Magistratibus denique, prout major eis debetur reverentia, quam ut pœnis passim intentatis coerceri ipsos et in ordinem cogi par sit, ita major conscientiae obligatio incumbit; utpote qui non solum ea quæ sui muneris sunt fideliter administrare; verum etiam, ut alii omnes suis officiis fungantur, sedulo curare tenentur. Neque tamen eos, ubicunque officiis suis defuerint, perjurio protinus se obligare intenditur. Verum quoniam ipsorum fidei Statutorum custodia et tutela concredita est, si (quod absit) per negligentiam aut socordiam suam Statuta quæcunque inusu ac desuetudine exolescere, et tacite quasi abrogari patiantur, ipsos etiam fidei violatæ ac perjurii teneri decernimus.

CAROLUS R.

ORDO sive series electionis Procuratorum in singulis Coll. Academiæ Oroniensi secundum vices infra scriptas per Statuta Serenissimi Regis Caroli &c. in Domo Convocationis ibidem stabilita et confirmata &c. quotannis faciendæ.

1	{ Coll. S. Joh. Bap. Ecccl. Christi.	1629. 1652. 1675. 1698. 1721. 1744. 1767. 1790. 1813. 1836. 1859. 1882.
2	{ Coll. S. Ma. Mag. Coll. Novum.	1630. 1653. 1676. 1699. 1722. 1745. 1768. 1791. 1814. 1837. 1860. 1883.
3	{ Coll. Mert. Coll. Ænei Nasi.	1631. 1654. 1677. 1700. 1723. 1746. 1769. 1792. 1815. 1838. 1861. 1884.
4	{ Ecccl. Christi. Coll. Omn. Anim.	1632. 1655. 1678. 1701. 1724. 1747. 1770. 1793. 1816. 1839. 1862. 1885.
5	{ Coll. Cor. Christi. Coll. Exoniense.	1633. 1656. 1679. 1702. 1725. 1748. 1771. 1794. 1817. 1840. 1863. 1886.
6	{ Coll. S. Ma. Mag. Coll. Wadham.	1634. 1657. 1680. 1703. 1726. 1749. 1772. 1795. 1818. 1841. 1864. 1887.
7	{ Coll. S. Joh. Bap. Coll. Reginense.	1635. 1658. 1681. 1704. 1727. 1750. 1773. 1796. 1819. 1842. 1865. 1888.
8	{ Ecccl. Christi. Coll. Novum.	1636. 1659. 1682. 1705. 1728. 1751. 1774. 1797. 1820. 1843. 1866. 1889.
9	{ Coll. S. Trinitat. Coll. Orielse.	1637. 1660. 1683. 1706. 1729. 1752. 1775. 1798. 1821. 1844. 1867. 1890.
10	{ Coll. S. Ma. Mag. Coll. Mert.	1638. 1661. 1684. 1707. 1730. 1753. 1776. 1799. 1822. 1845. 1868. 1891.
11	{ Ecccl. Christi. Coll. Ænei Nasi.	1639. 1662. 1685. 1708. 1731. 1754. 1777. 1800. 1823. 1846. 1869. 1892.

12	Coll. Univ. Annm.	1640. 1663. 1686. 1709. 1732. 1755. 1778. 1801. 1824. 1847. 1870. 1893.
	Coll. Lincoln.	
13	Coll. Exoniense.	1641. 1664. 1687. 1710. 1733. 1756. 1779. 1802. 1825. 1848. 1871. 1894.
	Coll. Univers.	
14	Coll. Novum.	1642. 1665. 1688. 1711. 1734. 1757. 1780. 1803. 1826. 1849. 1872. 1895.
	Coll. Wadhams.	
15	Coll. S. Ma. Mag.	1643. 1666. 1689. 1712. 1735. 1758. 1781. 1804. 1827. 1850. 1873. 1896.
	Ecccl. Christi.	
16	Coll. S. Joh. Bap.	1644. 1667. 1690. 1713. 1736. 1759. 1782. 1805. 1828. 1851. 1874. 1897.
	Coll. Mert.	
17	Coll. Cor. Christi.	1645. 1668. 1691. 1714. 1737. 1760. 1783. 1806. 1829. 1852. 1875. 1898.
	Coll. Balliolense.	
18	Coll. Ænei Nasi.	1646. 1669. 1692. 1715. 1738. 1761. 1784. 1807. 1830. 1853. 1876. 1899.
	Coll. Orielse.	
19	Ecccl. Christi.	1647. 1670. 1693. 1716. 1739. 1762. 1785. 1808. 1831. 1854. 1877. 1900.
	Coll. S. Ma. Mag.	
20	Coll. Novum.	1648. 1671. 1694. 1717. 1740. 1763. 1786. 1809. 1832. 1855. 1878. 1901.
	Coll. Omn. Anim.	
21	Coll. Exoniense.	1649. 1672. 1695. 1718. 1741. 1764. 1787. 1810. 1833. 1856. 1879. 1902.
	Coll. Reginense.	
22	Coll. S. Trinitat.	1650. 1673. 1696. 1719. 1742. 1765. 1788. 1811. 1834. 1857. 1880. 1903.
	Coll. Wadhams.	
23	Coll. Jesu.	1651. 1674. 1697. 1720. 1743. 1766. 1789. 1812. 1835. 1858. 1881. 1904.
	Coll. Pemb.	

Quolibet anno quarto teneatur Junior Procurator designare seniore in Comitibus Magistrum ex Aula aliqua.
Quolibet anno quinto Senior Procurator similiter teneatur Magistrum ex Aularum aliqua Scholis præficere.
Inchoanda est hæc computatio anni quarti et quinti ab anno Domini millesimo sexcentesimo vicesimo nono inclusive.

STATUTA CAROLINA *de Cyclo Procuratorio, edita Auctoritate Serenissimi Regis CAROLI Primi, confirmata in Domo Convocationis, A. D. MDCXXVIII.*

SCHEDULA, sive repertorium seriei et circuitus prædicti electionis Procuratorum in singulis Collegiis Academiæ Oxoniensis, manu propria Cancellarii, Vice-Cancellarii, et Collegii cujusque et Aulæ Præfecti consignata, in archivis Universitatis (una cum aliis munimentis) reponatur; habeantque singula Collegia exemplar authenticum, unde vices suas certo possint dignoscere.

2. Neminem ad muneris Procuratorii dignitatem admitti fas esto, priusquam quatuor annos a suscepto Magisterii Gradu (hoc est, a die creationis suæ in Comitibus publicis) compleverit; vel postquam annum decimum excesserit, ab eodem die terminando decennium.

3. Nullus Gradu aliquo in Theologia, vel Jure, vel Medicina insignitus, Procuratoris munus obibit; nec (nisi officio deposito) ad Gradum aliquem Procurator quivis eodem anno promoveatur.

4. Die Mercurii, post primam Dominicam in Quadragesima, in singulis Collegiis, secundum ordinem præscriptum, quotannis Procuratorum fiat electio.

5. Die Mercurii, hebdomadem Paschatis proxime sequente, tempore pomeridiano, in Domo Convocationis, eorundem peragatur admissio; quibus loco et tempore, Procuratores anni superioris insignia officii sui deponant, cum oratiuncula (ut solet); et deinde statim

novi in Domo Convocationis (secundum formam jam olim usitatam) per Vice-Cancellarium admittantur.

6. Procuratoribus vero, sic (ut præfertur) per Vice-Cancellarium adsumendis, Præfecti Collegiorum eligentium, una cum cæteris eorundem alumnis (singuli ornamentis Gradui suo competentibus ornati) comitatum, ad Domum Convocationis eundo, exhibeant personalem; qui quidem Præfecti et Deputati, Procuratores respective suos (secundum ritum antiquum) admittendos Vice-Cancellario præsentabunt: in Senioris Procuratoris locum assumetur, qui in serie Magistrorum eisdem Comitiis creatorum, secundum dispositionem Procuratorum (ut moris est) ordine prior collocatur.

7. In electione Procuratorum in Collegiis facienda, Doctoribus tantum et Magistris in Artibus actualiter creatis, ejusdem Collegii, suffragandi jus competat. Quod si privata cujusvis Collegii Statuta, aliam electionis domesticæ formam præfiniverint, cujus observationi juramenti vinculo arctius adstringuntur, in hoc casu (nec alias unquam) ad evitandum perjurii periculum, præscriptam electionis formam immutandi potestatem facimus.

Nullus Convictor, sive Commensalis, in hac electione suffragandi privilegio gaudebit, qui non a primo ad Academiam adventu in Collegium, Procuratorem ea vice nominaturum, admissus (non noviter ascitus) fuerit; in eoque educatus, electionis hujus tempore ibidem residet et commoratur: residentes vero interpretamur, omnes Collegiorum Socios, Scholares, Clericos, Capellanos, seu quocunque alio vocabulo in charta foundationis ejusdem nominati et

dotati inveniuntur. Convictores non item; nisi per sex menses, in anno electionem hujusmodi immediate præcedente, in eodem personaliter resederint.

8. Procuratorem in unoquoque Collegio (prout vices postulant) rite et legitime electum decernimus, quem major pars omnium suffragantium nominabit. Quod si duo, pari uterque numero suffragiorum, nominentur; ille pro electo habeatur, quem Præfectus vel (eo absente, seu sede vacante) ejus vicem gerens nominabit. Sin plures nominentur, nec unus aliquis majorem partem omnium suffragiorum retulerit, nec eodem die eam ob causam electio absoluta fuerit, et ante horam nonam vespertinam Vice-Cancellario renunciata; Collegium istud jus præsentandi ista vice amittet, et ad Vice-Cancellarium spectabit nominatio; qui intra biduum aptam personam, et secundum conditiones superius assignatas habilem, ex Aularum aliqua assumendam, in Procuratorem cooptabit.

9. Si nullus, in Collegio Procuratorem designaturo, habilis reperiatur, qui possit et velit istud munus subire, tunc Collegii istius Præfectus vel (eo absente, aut vacante sede) ejus vicem gerens, die electionis constituto, alium (quem voluerit) habilem, in Aularum aliqua degentem, nominabit; qui deinde in Procuratorem assumetur.

10. Si Procuratorem aliquem mori contigerit, vel quavis de causa ante anni sui expirationem officio suo cedere, locum ejus supplebit alius ejusdem Collegii, habilis et idoneus, per Præfectum, seu (eo absente, aut vacante sede) ejus vicem gerentem, intra septimanam post mortem vel cessionem, nominandus: quod si talis

non exstiterit, tunc Vice-Cancellarius aliquem habilem, in Aularum quacunq̄ue commorantem, in Procuratorem substituet, ut supra.

11. Nemini Procuratoris absentis vices, ad quamcunq̄ue muneris istius expeditionem, supplere licebit, qui tres annos a suscepto Magisterii Gradu non compleverit.

12. Ut etiam Aularum (quæ in Procuratorum nominatione nullas vices obtinent) ratio aliqua habeatur; volumus, ut (quarto quolibet anno) qui Procuratoris Junioris locum sortitur, primum opponentem in Comitiiis, inceptorem in Artibus, ejusdem anni, Aulæ alicujus alumnus designet. Procurator vero Senior, quolibet quinquennio, Magistrum etiam in Aularum aliqua degentem, Scholis præficiat.

13. Si ambiguitas aliqua, vel dubium aliquod (præter prænominata) occurrat circa electionem, modo præfinito, in Collegiis faciendam, (ne, gliscente inter partes discordia, scandalum exinde oriatur,) per Vice-Cancellarium, Doctorem in Theologia seniore (modo sit Præfectus Collegii alicujus) tempore electionis domi præsentem, et Præfectum Collegii in electione tunc temporis interesse habentem, vel horum duos (quorum Collegii Præfectum unum esse volumus) controversia ejusmodi terminetur. Quod si Præfectus Collegii antedictus, tunc temporis Vice-Cancellarii locum obtinuerit, tum in Theologia Doctores duos maxime seniores (sed Collegiorum, ut præfertur, Præfectos) sibi assumat, quibuscum causæ istius cognitionem habeat.

Atque hæc Statuta, singulasque eorundem particulas (nulli dispensationi, quavis de causa, sub prætextu quovismodo obnoxia) perpetuo inviolata manere volumus.

Statutum de Electione Scholarium qui ex bonis Collegii Hertfordensis annuo præmio donandi sunt.

QUUM ex bonis Collegii Hertfordensis haud ita pridem dissoluti pecuniæ quædam jussu Regio A. D. 1818 Academiæ accreverint, sub hac tamen conditione, ut, post obitum Ricardi Hewitt, A. M. ejusdem Collegii olim Socii, publica examinatione de tempore in tempus habita, Scholaris aliquis eligeretur, secundum Statutum aliquod ab Academia sancendum; quumque modo prædictus Ricardus Hewitt e vivis excesserit:—Placuit Academiæ, quo adolescentium studia ad diligentiorum literarum Latinarum cultum melius dirigantur, certamen proponere quotannis Termino Hilarii habendum.

In hoc certamine Examinatorum infra designandorum munus erit, quocunque examinationis genere iis placuerit, Candidatos omnes tam Latine scribendo, quam auctorum Romanorum scripta interpretando exercere; eumque demum eligere quem præ cæteris eminere judicaverint, tum propter elegantiorum expeditumque sermonis usum, tum propter facultatem criticam literarumque Latinarum in genere peritiam.

Tres igitur sunt Examinatores, qui ante biennium vel in facultate Artium inceperint, vel Gradum Baccalaurei in Jure Civili susceperint, a Vice-Cancellario et Procuratoribus nominandi, et deinceps a Venerabili Domo Convocationis approbandi.

Cuivis autem liceat, modo duos annos integros a tempore matriculationis suæ non compleverit,

Candidatum se præstare; iis solum exceptis, qui in hoc certamine præmium aliquando reportaverint.

Locus Examinationi habendæ aliquis intra Scholarum præcinctus a Vice-Cancellario assignetur.

De loco sic destinato, necnon de tempore examinationis, postquam inter ipsos convenerit, Examinatores per schedulam monitoriam ad Collegiorum et Aularum Præfectos deferendam, et ad portam insuper Refectorii vel Promptuarii cujusque Collegii et Aulæ affigendam, die decimo quarto ante diem constitutum, certiores faciant Academiam.

Unusquisque Candidatorum nomen suum coram Examinatoribus profiteri, et literas simul commendatorias a Præfecto Collegii vel Aulæ suæ, vel ab ejus Deputato, exhibere tenebitur ante diem tertium ad minimum quam ad Examinationem procedatur.

ARTICULI,

De quibus convenit inter Archiepiscopos, et Episcopos utriusque Provinciæ, et Clerum Universum in Synodo Londini, anno 1562. secundum computationem Ecclesiæ Anglicanæ, ad tollendam opinionum dissentionem, et consensum in vera Religione firmandum, editi auctoritate Serenissimæ Reginæ.

I. *De Fide in Sacro-sanctam Trinitatem.*

UNUS est vivus, et verus Deus, æternus, incorporeus, impartibilis, impassibilis, immensæ potentia, sapientiæ, ac bonitatis, Creator et Conservator omnium, tum visibilium, tum invisibilium. Et in unitate hujus divinæ naturæ tres sunt Personæ, ejusdem essentia, potentia, ac æternitatis, Pater, Filius, et Spiritus Sanctus.

II. *De Verbo, sive Filio Dei, qui verus Homo factus est.*

FILIUS, qui est Verbum Patris, ab æterno a Patre genitus, verus et æternus Deus, ac Patri consubstantialis, in utero beatæ Virginis, ex illius substantia naturam humanam assumpsit: ita ut duæ naturæ, divina et humana, integre atque perfecte in unitate personæ fuerint inseparabiliter conjunctæ, ex quibus est unus Christus, verus Deus, et verus homo, qui vere passus est crucifixus, mortuus, et sepultus, ut Patrem nobis reconciliaret, essetque hostia, non tantum pro culpa originis, verum etiam pro omnibus actualibus hominum peccatis.

III. *De Descensu Christi ad Inferos.*

QUEMADMODUM Christus pro nobis mortuus est, et sepultus; ita est etiam credendus ad inferos descendisse.

IV. De Resurrectione Christi.

CHRISTUS vere a mortuis resurrexit, suumque corpus cum carne, ossibus, omnibusque ad integritatem humanæ naturæ pertinentibus, recepit; cum quibus in cœlum ascendit, ibique residet, quoad extremo die ad judicandos homines reversurus sit.

V. De Spiritu Sancto.

SPIRITUS Sanctus, a Patre et Filio procedens, ejusdem est cum Patre et Filio essentiæ, majestatis, et gloriæ, verus ac æternus Deus.

VI. De divinis Scripturis, quod sufficient ad Salutem.

SCRIPTURA sacra continet omnia quæ ad salutem sunt necessaria, ita ut quicquid in ea nec legitur, neque inde probari potest, non sit a quoquam exigendum, ut tanquam articulus fidei credatur, aut ad salutis necessitatem requiri putetur.

Sacræ Scripturæ nomine, eos canonicos libros Veteris et Novi Testamenti intelligimus, de quorum auctoritate, in Ecclesia nunquam dubitatum est.

De Nominibus et Numero Librorum sacræ canonicæ Scripturæ Veteris Testamenti.

Genesis.	Secundus liber Paralipomen.
Exodus.	Primus liber Esdræ.
Leviticus.	Secundus liber Esdræ.
Numeri.	Liber Hester.
Deuteron.	Liber Job.
Josue.	Psalmi.
Judicum.	Proverbia.
Ruth.	Ecclesiastes, vel Concionator.
Prior liber Samuelis.	Cantica Solomonis.
Secundus lib. Samuelis.	4 Prophetæ Majores.
Prior liber Regum.	12 Prophetæ Minores.
Secundus lib. Regum.	
Prior liber Paralipom.	

Alios autem Libros (ut ait Hieronymus) legit quidem Ecclesia, ad exempla vitæ, et formandos mores; illos tamen ad dogmata confirmanda non adhibet; ut sunt

Tertius liber Esdræ.	Canticum trium Puerorum.
Quartus liber Esdræ.	Historia Susannæ.
Liber Tobiaë.	De Bel et Dracone.
Liber Judith.	Oratio Manassis.
Reliquum libri Hester.	Prior liber Maccab.
Liber Sapientiæ.	Secundus liber Maccabæorum.
Liber Jesu filii Sirach.	
Baruch Propheta.	

Novi Testamenti omnes libros (ut vulgo recepti sunt) recipimus, et habemus pro canonicis.

VII. *De Veteri Testamento.*

TESTAMENTUM Vetus Novo contrarium non est, quandoquidem tam in Veteri, quam in Novo, per Christum, qui unicus est Mediator, Dei et hominum, Deus et homo, æterna vita humano generi est proposita. Quare male sentiunt, qui veteres tantum in promissiones temporarias sperasse confingunt. Quanquam lex a Deo data per Mosen (quoad cæremonias et ritus) Christianos non astringat, neque civilia ejus præcepta in aliqua republica necessario recipi debeant, nihilominus tamen ab obedientia mandatorum (quæ moralia vocantur) nullus (quantumvis Christianus) est solutus.

VIII. *De Tribus Symbolis.*

SYMBOLA tria, Nicænum, Athanasii, et quod vulgo Apostolorum appellatur, omnino recipienda sunt, et credenda; nam firmissimis Scripturarum testimoniis probari possunt.

IX. *De Peccato Originali.*

PECCATUM originis non est (ut fabulantur Pelagiani) in imitatione Adami situm, sed est vitium, et depravatio naturæ, cujuslibet hominis ex Adamo

naturaliter propagati : qua fit, ut ab originali justitia quam longissime distet ; ad malum sua natura propendeat ; et caro semper adversus spiritum concupiscat ; unde in unoquoque nascentium, iram Dei atque damnationem meretur. Manet etiam in renatis hæc naturæ depravatio : qua fit, ut affectus carnis, Græce *φρόνημα σαρκός*, (quod alii sapientiam, alii sensum, alii affectum, alii studium carnis interpretantur,) legi Dei non subjiciatur. Et quanquam renatis et credentibus nulla propter Christum est condemnatio, peccati tamen in sese rationem habere concupiscentiam, fatetur Apostolus.

X. *De libero Arbitrio.*

EA est hominis post lapsum Adæ conditio, ut sese naturalibus suis viribus, et bonis operibus, ad fidem et invocationem Dei convertere ac præparare non possit. Quare absque gratia Dei (quæ per Christum est) nos præveniente, ut velimus, et cooperante, dum volumus, ad pietatis opera facienda, quæ Deo grata sunt et accepta, nihil valemus.

XI. *De Hominis Justificatione.*

TANTUM propter meritum Domini ac Servatoris nostri Jesu Christi, per fidem, non propter opera et merita nostra, justi coram Deo reputamur. Quare sola fide nos justificari doctrina est saluberrima ac consolationis plenissima, ut in homilia de justificatione hominis fusius explicatur.

XII. *De bonis Operibus.*

BONA opera, quæ sunt fructus fidei, et justificados sequuntur, quanquam peccata nostra expiare, et divini judicii severitatem ferre non possunt ; Deo tamen grata sunt, et accepta in Christo, atque ex vera et viva fide necessario profluunt, ut plane ex illis æque fides viva cognosci possit, atque arbor ex fructu judicari.

XIII. De Operibus ante Justificationem.

OPERA quæ fiunt ante gratiam Christi et Spiritus ejus afflatum, cum ex fide Jesu Christi non prodeant, minime Deo grata sunt, neque gratiam (ut multi vocant) de congruo merentur. Immo, cum non sunt facta ut Deus illa fieri voluit et præcepit, peccati rationem habere non dubitamus.

XIV. De Operibus Supererogationis.

OPERA quæ supererogationis appellant, non possunt sine arrogantia et impietate prædicari. Nam illis declarant homines, non tantum se Deo reddere, quæ tenentur, sed plus in ejus gratiam facere quam deberent; cum aperte Christus dicat, Cum feceritis omnia quæcunque præcepta sunt vobis, dicite, Servi inutiles sumus.

XV. De Christo, qui solus est sine Peccato.

CHRISTUS in nostræ naturæ veritate, per omnia similis factus est nobis, excepto peccato, a quo prorsus erat immunis, tum in carne, tum in spiritu. Venit ut agnus absque macula, qui mundi peccata per immolationem sui semel factam tolleret; et peccatum (ut inquit Johannes) in eo non erat: sed nos reliqui, etiam baptizati, et in Christo regenerati, in multis tamen offendimus omnes. Et si dixerimus, quod peccatum non habemus, nos ipsos seducimus, et veritas in nobis non est.

XVI. De Peccato post Baptismum.

NON omne peccatum mortale post Baptismum voluntarie perpetratum est peccatum in Spiritum Sanctum, et irremissibile: proinde lapsis a Baptismo in peccata, locus pœnitentiæ non est negandus. Post acceptum Spiritum Sanctum possumus a gratia data recedere, atque peccare, denuoque per gratiam Dei resurgere, ac resipiscere: ideoque illi damnandi sunt, qui se, quamdiu hic vivant, amplius non posse

peccare affirmant, aut vere resipiscentibus veniæ locum denegant.

XVII. *De Prædestinatione, et Electione.*

PRÆDESTINATIO ad vitam est æternum Dei propositum, quo ante jacta mundi fundamenta, suo consilio, nobis quidem occulto, constanter decrevit, eos, quos in Christo elegit ex hominum genere, a maledicto et exitio liberare, atque (ut vasa in honorem efficta) per Christum, ad æternam salutem adducere. Unde qui tam præclaro Dei beneficio sunt donati, illi Spiritu ejus, opportuno tempore operante, secundum propositum ejus vocantur; vocationi per gratiam parent; justificantur gratis; adoptantur in filios Dei; unigeniti ejus Filii Jesu Christi imagini efficiuntur conformes; in bonis operibus sancte ambulant; et demum ex Dei misericordia pertingunt ad sempiternam felicitatem.

Quemadmodum prædestinationis et electionis nostræ in Christo pia consideratio, dulcis, suavis, et ineffabilis consolationis plena est vere piis, et his qui sentiunt in se vim Spiritus Christi, facta carnis, et membra, quæ adhuc sunt super terram, mortificantem animumque ad cœlestia et superna rapientem; tum quia fidem nostram de æterna salute consequenda per Christum plurimum stabilit atque confirmat, tum quia amorem nostrum in Deum vehementer accendit: ita hominibus curiosis, carnalibus, et Spiritu Christi destitutis, ob oculos perpetuo versari prædestinationis Dei sententiam perniciosissimum est præcipitium, unde illos Diabolus protrudit, vel in desperationem, vel in æque perniciosam impurissimæ vitæ securitatem. Deinde, promissiones divinas sic amplecti oportet, ut nobis in Sacris Literis generaliter propositæ sunt; et Dei voluntas in nostris actionibus ea sequenda est, quam in verbo Dei habemus diserte revelatam.

XVIII. De speranda æterna Salute tantum in Nomine Christi.

SUNT et illi anathematizandi, qui dicere audent unumquemque in lege aut secta quam profitetur esse servandum, modo juxta illam et lumen naturæ accurate vixerit; cum Sacræ Literæ tantum Jesu Christi nomen prædicent, in quo salvos fieri homines oporteat.

XIX. De Ecclesia.

ECCLESIA Christi visibilis est cœtus fidelium, in quo verbum Dei purum prædicatur, et Sacramenta, quoad ea quæ necessario exigantur, juxta Christi institutum recte administrantur. Sicut erravit Ecclesia Hierosolymitana, Alexandrina, et Antiochena; ita et erravit Ecclesia Romana, non solum quoad agenda, et cæremoniarum ritus, verum in his etiam quæ credenda sunt.

XX. De Ecclesiæ Auctoritate.

HABET Ecclesia ritus sive cæremonias statuendi jus, et in fidei controversiis auctoritatem; quamvis Ecclesiæ non licet quicquam instituere, quod verbo Dei scripto adversetur, nec unum Scripturæ locum sic exponere potest, ut alteri contradicat. Quare licet Ecclesia sit divinorum librorum testis et conservatrix, attamen ut adversus eos nihil decernere, ita præter illos nihil credendum de necessitate salutis debet obtrudere.

XXI. De Auctoritate Conciliorum generalium.

GENERALIA concilia sine jussu et voluntate principum congregari non possunt; et ubi convenierint, quia ex hominibus constant, qui non omnes Spiritu et verbo Dei reguntur, et errare possunt, et interdum errarunt, etiam in his quæ ad Deum pertinent: ideoque quæ ab illis constituuntur, ut ad

salutem necessaria, neque robur habent, neque auctoritatem, nisi ostendi possint e Sacris Literis esse desumpta.

XXII. *De Purgatorio.*

DOCTRINA Romanensium de purgatorio, de indulgentiis, de veneratione et adoratione, tum imaginum tum reliquiarum, necnon de invocatione Sanctorum, res est futilis, inaniter conficta, et nullis Scripturarum testimoniis innititur : immo verbo Dei contradicit.

XXIII. *De ministrando in Ecclesia.*

NON licet cuiquam sumere sibi munus publice prædicandi, aut administrandi Sacramenta in Ecclesia, nisi prius fuerit ad hæc obeunda legitime vocatus et missus. Atque illos legitime vocatos et missos existimare debemus, qui per homines, quibus potestas vocandi ministros, atque mittendi in vineam Domini, publice concessa est in Ecclesia, cooptati fuerint, et adsciti in hoc opus.

XXIV. *De loquendo, in Ecclesia, Lingua quam populus intelligit.*

LINGUA populo non intellecta, publicas in Ecclesia preces peragere aut Sacramenta administrare, verbo Dei, et primitivæ Ecclesiæ consuetudini plane repugnat.

XXV. *De Sacramentis.*

SACRAMENTA a Christo instituta, non tantum sunt notæ professionis Christianorum, sed certa quædam potius testimonia, et efficacia signa gratiæ atque bonæ in nos voluntatis Dei, per quæ invisibiliter ipse in nos operatur, nostramque fidem in se non solum excitat, verum etiam confirmat.

Duo a Christo Domino nostro in Evangelio instituta sunt Sacramenta ; scilicet, Baptismus, et Cœna Domini.

Quinque illa vulgo nominata Sacramenta ; scilicet, Confirmatio, Pœnitentia, Ordo, Matrimonium, et Extrema Unctio, pro Sacramentis Evangelicis habenda non sunt ; ut quæ, partim a prava Apostolorum imitatione profluxerunt, partim vitæ status sunt in Scripturis quidem probati, sed Sacramentorum eandem cum Baptismo et Cœna Domini rationem non habentes, ut quæ signum aliquod visibile, seu cæremoniam, a Deo institutam non habeant.

Sacramenta non in hoc instituta sunt a Christo, ut spectarentur, aut circumferrentur, sed ut rite illis uteremur ; et in his duntaxat qui digne percipiunt salutarem habent effectum : qui vero indigne percipiunt, damnationem (ut inquit Paulus) sibi ipsis acquirunt.

XXVI. De Vi Institutionum divinarum, quod eam non tollat Malitia Ministrorum.

QUAMVIS in Ecclesia visibili, bonis mali semper sunt admixti, atque interdum ministerio Verbi et Sacramentorum administrationi præsent ; tamen cum non suo, sed Christi nomine agant, ejusque mandato et auctoritate ministrent, illorum ministerio uti licet, cum in verbo Dei audiendo, tum in Sacramentis percipiendis. Neque per illorum malitiam effectus institutorum Christi tollitur, aut gratia donorum Dei minuitur, quoad eos qui fide et rite sibi oblata percipiunt ; quæ propter institutionem Christi et promissionem efficacia sunt, licet per malos administrentur.

Ad Ecclesiæ tamen disciplinam pertinet, ut in malos ministros inquiratur, accusenturque ab his, qui eorum flagitia noverint, atque tandem justo convicti judicio deponantur.

XXVII. De Baptismo.

BAPTISMUS non est tantum professionis signum, ac discriminis nota, qua Christiani a non Christianis discernantur, sed etiam est signum regenerationis, per quod, tanquam per instrumentum, recte Baptismum

suscipientes, Ecclesiæ inseruntur; promissiones de remissione peccatorum, atque adoptione nostra in filios Dei per Spiritum Sanctum visibiliter obsignantur; fides confirmatur; et vi divinæ invocationis gratia augetur.

Baptismus parvulorum omnino in Ecclesia retinendus est, ut qui cum Christi institutione optime congruat.

XXVIII. *De Cœna Domini.*

CEENA Domini non est tantum signum mutuæ benevolentiae Christianorum inter sese, verum potius est Sacramentum nostræ per mortem Christi redemptionis.

Atque adeo, rite, digne, et cum fide sumentibus, panis quem frangimus est communicatio corporis Christi: similiter poculum benedictionis est communicatio sanguinis Christi.

Panis et vini transubstantiatio in Eucharistia ex sacris literis probari non potest: sed apertis Scripturæ verbis adversatur; Sacramenti naturam evertit; et multarum superstitionum dedit occasionem.

Corpus Christi datur, accipitur, et manducatur in Cœna, tantum cœlesti et spirituali ratione: medium autem, quo corpus Christi accipitur et manducatur in Cœna, fides est.

Sacramentum Eucharistiæ ex institutione Christi non servabatur, circumferebatur, elevabatur, nec adorabatur.

XXIX. *De Manducatione Corporis Christi, et impios illud non manducare.*

IMPII, et fide viva destituti, licet carnaliter et visibiliter (ut Augustinus loquitur) corporis et sanguinis Christi Sacramentum dentibus premant, nullo tamen modo Christi participes efficiuntur: sed potius tantæ rei Sacramentum, seu Symbolum, ad iudicium sibi manducant et bibunt.

XXX. De utraque Specie.

CALIX Domini laicis non est denegandus, utraque enim pars Dominici Sacramenti, ex Christi institutione et præcepto, omnibus Christianis ex æquo administrari debet.

XXXI. De unica Christi Oblatione in Cruce perfecta.

OBLATIO Christi semel facta, perfecta est redemptio, propitiatio, et satisfactio pro omnibus peccatis totius mundi, tam originalibus quam actualibus: neque præter illam unicam est ulla alia pro peccatis expiatio: unde missarum sacrificia, quibus, vulgo dicebatur, sacerdotem offerre Christum in remissionem pœnæ aut culpæ, pro vivis et defunctis, blasphema figmenta sunt, et perniciosæ imposturæ.

XXXII. De Conjugio Sacerdotum.

EPISCOPIS, Presbyteris, et Diaconis nullo mandato divino præceptum est, ut aut cœlibatum voveant aut a matrimonio abstineant. Licet igitur etiam illis ut cæteris omnibus Christianis, ubi hoc ad pietatem magis facere judicaverint, pro suo arbitratu matrimonium contrahere.

XXXIII. De Excommunicatis vitandis.

QUI per publicam Ecclesiæ denunciationem rite ab unitate Ecclesiæ præcisus est et excommunicatus, is ab universa fidelium multitudine (donec per pœnitentiam publice reconciliatus fuerit arbitrio judicis competentis) habendus est tanquam ethnicus et publicanus.

XXXIV. De Traditionibus Ecclesiasticis.

TRADITIONES atque cæremonias easdem, non omnino necessarium est, esse ubique, aut prorsus consimiles. Nam ut variæ semper fuerunt, et mutari possunt, pro regionum, temporum, et morum diversitate, modo nihil contra verbum Dei instituat.

Traditiones et cæremonias Ecclesiasticas, quæ cum verbo Dei non pugnant, et sunt auctoritate publica institutæ atque probatæ, quisquis privato consilio volens, et data opera, publice violaverit, is, ut qui peccat in publicum ordinem Ecclesiæ, quique lædit auctoritatem Magistratus, et qui infirmorum fratrum conscientias vulnerat, publice, ut cæteri timeant, arguendus est.

Quælibet Ecclesia particularis, sive nationalis, auctoritatem habet instituendi, mutandi, aut abrogandi cæremonias, aut ritus Ecclesiasticos, humana tantum auctoritate institutos, modo omnia ad ædificationem fiant.

XXXV. *De Homiliis.*

TOMUS secundus homiliarum, quarum singulos titulos huic articulo subjunximus, continet piam et salutarem doctrinam, et his temporibus necessariam, non minus quam prior tomus homiliarum, quæ editæ sunt tempore Edvardi Sexti. Itaque eas in Ecclesiis per ministros diligenter et clare, ut a populo intelligi possint, recitandas esse judicavimus.

De Nominibus Homiliarum.

Of the right use of the Church.

Against peril of idolatry.

Of repairing and keeping clean of Churches.

Of good works.

First, of fasting.

Against gluttony and drunkenness.

Against excess in apparel.

Of prayer.

Of the place and time of prayer.

That common prayers and sacraments ought to be ministered in a known tongue.

Of the reverent estimation of God's word.

Of alms doing.

Articuli Religionis.

Of the nativity of Christ.

Of the passion of Christ.

Of the resurrection of Christ.

*Of the worthy receiving of the sacrament of the body
and blood of Christ.*

Of the gifts of the Holy Ghost.

Of the Rogation-days.

Of the state of matrimony.

Of repentance.

Against idleness.

Against rebellion.

**XXXVI. De Episcoporum et Ministrorum Consecra-
tione.**

LIBELLUS de consecratione Archiepiscoporum et Episcoporum, et de ordinatione Presbyterorum et Diaconorum, editus nuper temporibus Edvardi VI. et auctoritate Parlamenti illis ipsis temporibus confirmatus, omnia ad ejusmodi consecrationem et ordinationem necessaria continet, et nihil habet, quod ex se sit aut superstitiosum aut impium: itaque quicumque juxta ritus illius libri consecrati aut ordinati sunt, ab anno secundo prædicti Regis Edvardi usque ad hoc tempus, aut in posterum juxta eosdem ritus consecrabitur aut ordinabitur, rite atque ordine atque legitime statuimus esse, et fore, consecratos et ordinatos.

XXXVII. De Civilibus Magistratibus.

REGIA Majestas in hoc Angliæ regno, ac cæteris ejus dominiis, summam habet potestatem, ad quam omnium statuum hujus regni, sive illi Ecclesiastici sint sive Civiles, in omnibus causis, suprema gubernatio pertinet, et nulli externæ jurisdictioni est subjecta, nec esse debet.

Cum Regiæ Majestati summam gubernationem tribuimus, quibus titulis intelligimus animos quorundam calumniatorum offendi, non damus Regibus

ostris, aut Verbi Dei aut Sacramentorum administrationem), quod etiam injunctiones ab Elizabetha Regina nostra, nuper editæ, apertissime testantur; sed eam tantum prærogativam, quam in Sacris Scripturis a Deo ipso, omnibus piis principibus, videmus semper fuisse attributam; hoc est, ut omnes status atque ordines fidei suæ a Deo commissos, sive illi Ecclesiastici sint sive Civiles, in officio contineant, et contumaces ac delinquentes gladio civili coerceant.

Romanus Pontifex nullam habet jurisdictionem in hoc regno Angliæ.

Leges regni possunt Christianos propter capitalia, et gravia crimina, morte punire.

Christianis licet, ex mandato Magistratus, arma portare, et justa bella administrare.

XXXVIII. *De illicita Bonorum Communicatione.*

FACULTATES et bona Christianorum non sunt communia, quoad jus et possessionem, (ut quidam Anabaptistæ jactant;) debet tamen quisque de his quæ possidet, pro facultatum ratione, pauperibus eleemosynas benigne distribuere.

XXXIX. *De Jurejurando.*

QUEMADMODUM juramentum vanum et temerarium a Domino nostro Jesu Christo, et Apostolo ejus Jacobo, Christianis hominibus interdictum esse fatemur: ita Christianorum Religionem minime prohibere censemus, quin jubente Magistratu in causa fidei et charitatis jurare liceat, modo id fiat juxta Prophetæ doctrinam, in justitia, in judicio, et veritate.

Confirmatio Articulorum.

HIC liber antedictorum Articulorum jam denuo approbatus est; et per assensum et consensum Serenissimæ Reginæ Elizabethæ Dominæ nostræ,

Dei gratia Angliæ, Franciæ, et Hiberniæ Reginae,
Defensoris Fidei, &c. retinendus, et per totum
regnum Angliæ exequendus. Qui Articuli, et lecti
sunt, et denuo confirmati, subscriptione D. Archi-
episcopi et Episcoporum superioris Domus, et totius
Cleri inferioris Domus, in Convocatione, A. D. 1571.

Three Articles in the 36th Canon.

THAT the King's Majesty, under God, is the only supreme Governor of this realm, and of all other his Highness's dominions and countries, as well in all Spiritual or Ecclesiastical things or causes, as Temporal; and that no foreign prince, person, prelate, state, or potentate hath, or ought to have, any jurisdiction, power, superiority, preeminence, or authority, Ecclesiastical or Spiritual, within his Majesty's said realms, dominions, and countries.

II. That the Book of Common Prayer, and of ordering of Bishops, Priests, and Deacons, containeth in it nothing contrary to the Word of God, and that it may lawfully so be used; and that I myself will use the form in the said Book prescribed, in public Prayer, and administration of the Sacraments, and none other.

III. That I allow the Book of Articles of Religion agreed upon by the Archbishops and Bishops of both provinces, and the whole Clergy in the Convocation holden at London in the year of our Lord God one thousand five hundred sixty and two; and that I acknowledge all and every the Articles therein contained, being in number nine and thirty, besides the ratification, to be agreeable to the Word of God.

The Oath of Allegiance.

I *A. B.* do sincerely promise and swear, That I will be faithful, and bear true allegiance to her Majesty Queen *Victoria*.

So help me God, &c.

The Oath of Supremacy.

I *A. B.* do swear, That I do from my heart abhor, detest, and abjure, as impious and heretical, that damnable doctrine and position, *That Princes excommunicated or deprived by the Pope, or any authority of the See of Rome, may be deposed or murdered by their subjects, or any other whatsoever.*

And I do declare, that no foreign prince, person, prelate, state, or potentate hath, or ought to have, any jurisdiction, power, superiority, preeminence, or authority, Ecclesiastical or Spiritual, within this realm.

So help me God, &c.

The Monition at the Matriculation of a Scholar.

Scito te in matriculam Universitatis hodie relatum esse, sub hac conditione, nempe, ut omnia Statuta, hoc libro comprehensa, pro virili observes.

The Oath at the Matriculation of a Privileged Person.

YOU shall swear to observe all Statutes, Privileges, and Customs of this University. So help you God.

YOU shall further swear, that you will never sue in any Cause of yours before the Mayor and Bailiffs of this town, nor answer before them as your judge, so long as you continue to enjoy the privileges of this University.

